

MAT.  
C O R D E R I I  
C O L L O Q U I O R U M

SCHOLASTICORUM,

Libri IV,

*Diligenter recogniti.*


---

Protrepticon,

Ad bene vivendi, recteque loquendi  
studiosos.

Calvinus didicit quo præceptore Latine  
Grammaticęq; loqui, Quantus hic autor erat?  
Hinc bene vivendi documenta apteque loquendi,  
O pueri, à teneris imbibite unguiculis.

---



---

CANTABRIGIÆ,  
Ex Officina Joann. Hayes, celeberrimæ  
Academix Typographi.  
MDCXCIII.








# MATURINI CORDERII

in *Colloquiorum suorum* libros

P R Æ F A T I O.

 Nnus agitar minimùm quinquagesimus, ex quo, susceytâ docendi pueros provinciâ, in hanc cogitationem totus incubui, quâ possem ratione efficere, ut pueri pietatem bonosq; mores cum humanarum literarum studiis conjungerent. Quamvis enim, cùm Parisiis primùm eo munere jungi capi, (cùm in aliis gymnasiis, tum in Rhemensi, S. Barbaræ, Lexoviensi, Marchiano, Navarræo) nondum mihi verum Evangelii lumen illuxisset; sed in profundis superstitionum tenebris demersus jacerem: discipulos tamen meos bona fide semper, non solùm ad humanitatis studia, sed etiam ad cultum divinum adhortabar; si tamen eo nomine appellare licet profanos illos falsæ Ecclesiæ ritui, quos ego penè ab incunabulis hauseram, & Deo acceptos esse mihi persuaferam. Me autem in illo instituto constanter perseverasse, satis idonei sunt testes libelli aliquot à me diversis temporibus editi; in quibus scribendis semper mihi consilium fuit ad utrumque horum simul pueros formare: idem testari possunt & mei discipuli & quorum ingenti numero cùm supersint ad hunc usque diem plerique celeberrimi Viri; unus tamen potissimùm in præsentia mihi occurrit, ex iis quos Parisiis docui, præstantissimus ille vir, Joannes Calvinus, quem honoris causâ nom. no. Ex quo autem misertus Pater clementissimus mentem verâ sui Evangelii cognitione illustravit, multò etiam ardentius id propositum persequutus sum. Quod & Nivernensis Schola, & aliquantò post etiam Burdegalensis (ad quàm, Lutetiâ profugus propter Evangelicæ doctrinæ professionem, me contulerim) per triennium experta est, Sed cùm & plenior Evangelii cognitio deinde accessset & liberior etiam, imò verò prorsus libera, mihi esset ejus professio; tum

# PRÆFATIO.

verò voti mei compos, reddi vehementiori desiderio quam unquam antea concupivi. Atque id testari hæc Schola Genevensis jampridem potuit, in qua, relicta Burdegalensi, docui: potuit & Neocomensis, cujus per annos circiter septem fui Moderator, (de Neocomo autem in Helveticorum finibus sita loquor:) potuit & Lausannensis id testari, ubi Gymnasiarchæ partes annos totos duodecim, magnificentissimorum dominorum Bernarum auspicio, sustinui: potuerunt (inquam) una cum Genevensi hæc quoque scholæ id testari: sed & nunc eadem mihi testis esse potest; cum in eam me secundo Pater ille benignissimus senectutis meæ misertus, (quæ annum octogesimum quintum attigit) tanquam in portum tutissimum, post infinitos labores & multa pericula receperit. Ex quo tempore sæpissimè mecum cogitavi, quid potissimum re inservire illi possem, qui me per totam vitam tanta benignitate prosequutus esset, mihi que tot laboribus & periculis liberasset. Cum autem Robertus Stephanus, amicorum meorum intimus, (quo primùm doctore ad Evangelii cognitionem usus fueram) me, ut aliàs sæpe, ad scribendum aliquid pueris vehementer hortaretur, & adminicula quæcunque necessaria essent, polliceretur, atque adeò jam me benignissimè suis sumptibus aleret; animum ad eam rem appellere cœpi. Sed (prò dolor! Robertus ille meus haud multo post ex hac vita ad Christum, non sine maximo literarum detrimento, commigravit. Neque tamen ego incerto destiti, sed aliquot opuscula scribere sum aggressus, quibus me consulturum puerorum studiis sperabam, si quando mihi manum illis extremum imponere liceret. Verum enimvero, ex quo tempore ad hanc docendi provinciam (Deo ita volente) sum revocatus, sic animum abjeci, ut vix sperare possem aliquid unquam edendi mihi datum iri spatium: propterea quod (ut semper antea feceram) me ad satisfaciendum discipulis ita dederam, ut nò succisivas quidem horas mihi liberæ relinquerem: & quamvis permulti sæpe mecum agerent, adeoque precibus efflagitarent, ut tandem aliquid ad puerorum utilitatem in lucem emitterem; nemo tamen persuadere poterat, ut mihi exirent è manibus, quæ judicio meo nandum satis probarentur. Anno tamen superiore, cum docendi

## PRÆFATIO,

*cendi adjutor ex animi sententia mihi deo Dei obtigisset, venit in mentem chartulas meas, præsertim vetustiores, diligentius excutere; inter quas occurrerunt hæc nostra Colloquia, quæ jam ferè triennium (quasi sopita) in musæolo meo latuerant. Ea igitur, velut è somno excitata, cum in manus sumpsissem, placuit matutinis horis (id est, tempore mihi à docendi provinciâ vacuo) recognoscere, aliquot etiam augere colloquiis, & quantum res ipsa patiebatur, expolire. Peracta recognitione, visum est opusculum communicare cum quibusdam viris doctissimis, qui cum meum in eo consilium probassent, dignumque censuissent quòd pueri cum Grammaticæ rudimentis haberent in manibus, ego, persuasus frequenti eorum hortatione, permisi ut in publicum ederetur. Sunt enim hæc nostra colloquia ejusmodi, quæ (nisi me fallit animus) bonæ indolis pueros magnopere juvare possint ad eas res consequendas, quas ego semper in votis habui, & in quibus ut pueri exercerentur, omni professionis meæ tempore potissimum laboravi: hoc est, (ut supra dixi) ad pietatem & bonos mores cum literarum elegantia coniungendos. Equidem fateor aliis opus esse ad eam rem adjumentis, præterquam his, quæ puerilia sunt colloquia: sed tamen si pueri, diligenti Magistrorum exhortatione assidue incitati, in his, lectitandis sese oblectarint, futurum confido, ut non solum purius & honestius sermones inter se conferre assuescant, sed à pravis etiam colloquiis abstinere, quibus (ut ait Apostolus ex Menandro,) mores boni corrumpuntur. Hic etenim, præter linguæ Latinæ simplicem puritatem, multæ interjectæ sunt modò ad pietatem & Dei timorem admonitiones, modò præcepta salutaria de moribus, passim verò dicamenta sive exempla ad rectè vivendum accommodata: ut interim taceam, quot modis una & eadem opera excitari & acui possit puerorum ingenium, & ad prudentiam, & ad iudicium comparandum; ubi scilicet alter alterum hortatur, admonet, arguit, liberèque reprehendit: porro in his ipsis libellis sic induxi loquentes pueros. ut etiam obiter, & quasi aliud agens, parentes, pedagogos, præceptores quoque minus diligentes, de suo quemque in tractandis puerilibus ingenis, officio complu-*

## PRÆFATIO.

ribus in locis commenefaciam. Sed de Colloquiorum usu  
atque utilitate hactenus. Reliquum est, ut illa pueri, in quo-  
rum usum conscripta sunt, eo quo scripsimus animo comple-  
ctantur & legant; iisque, quamdiu opus erit fruantur. Quod  
si quid fructus ex eorum lectione se percepisse intellexerint,  
ei gratias agant immortales, qui nobis ad ea scribenda &  
animum & facultatem suppeditavit. Interea quoque memi-  
nerint, preces ad ipsum Deum sæpe & ex animâ pro huius  
civitatis amplissimo Senatu & prudentiis Magistratibus  
fundere: sub quorum felici administratione, Deo suâ gra-  
tiâ providente, tranquillam vitam agimus, studiaque nostra  
in ipsius gloriam feliciter presequimur.


DATUM GENEVÆ, VIII.

Idus Februar.

Anno Christianæ Redemptionis  
MDLXIII.

Ætatis autem nostræ  
LXXXV.

MATU-



# MATURINI CORDERII

*Colloquiorum Scholasticorum* libri quatuor, ad pueros in quotidiano tempore paulatim exercendos.

## LIBER I.

### COLLOQ. I.

*Bernardus, Claudius.*

**S**Alve, *Glaudi*. C. Tu quoque salvus sis, *Bernarde*. B. Ludamus paulisper. C. Quid ais, ineptule? Vix scholam ingressus es, & jam de ludo loqueris? B. Nè irascaris, quæso. C. Non irascor. B. Quid ergò sic exclamas? C. Accuso tuam stultitiam. B. Non licet igitur ludere? C. Imò licet; at cum tempus est. B. Vah! tu nimium sapias. C. Utinam tantum scirem satis: sed mitte me, quæso, ut repetam quæ mox reddenda erunt præceptori. B. Æquum dicis: volo ego quoque tecum reperere, si tibi placet. C. Eho! quid hoc est? quid sibi vult ista tam subita mutatio? nonne tu modò loquebaris de lusu? B. Loquebar quidem; sed non seriò. C. Cur simulabas? B. Ut paucis tecum fabularer. C. Quid illud prodest? B. Etiam rogas? nunquam audivisti ex præceptore? C. Nunc mihi non occurrit: quid, inquam, prodest confabulari? B. Ad nos in *Latina* lingua exercendos. C. Profecto rectè putas, & ego te nunc magis amo. B. Habeo tibi gratiam: agè repetamus prælectionem; nam brevi præceptor aderit.



## COLL. 2.

*Stephanus, Præceptor.*

**S**alve, præceptor. P. Salvus sis, mi *Stephane*. Unde venis tam multò mané? S. E cubiculo nostro. P. Quando surrexisti? S. Paulò ante sextam, præceptor. P. Quid ais? S. Sic est, ut dico. P. Tu nimis es magnus; quis ex te fecit? S. Frater meus. P. An precatus es Deum? S. Cum primùm frater me pexuit, precatus sum. P. Quomodo? S. Flexis genibus & conjunctis manibus; dixi precationem Dominicam cum gratiarum actione. P. Quà linguâ? S. Anglicâ. P. O factum bene! quis te misit ad me? S. Nemo. P. Quid ergo? S. Ultro veni. P. Mi animule, quàm pulchrum est sapere! Nonne est jentandi tempus? S. Nondum esurio. P. Quid vis igitur? S. Volo reddere nomina quotidiana, si tibi placet audire me. P. Quidni placeret? tenes igitur memoriâ? S. Teneo, gratias Deo. P. Agé; pronuntia. S. Sed mihi soles præire Anglicè; & ego Latine respondeo. P. Bene mones; penè illud oblitus eram: responde igitur. L. Expecto ut proponas.

P. *The head.* S. Caput. P. *The top of the head.* S. Vertex.

P. *The fore-part.* S. Sinciput.

P. *The hinder-part.* S. Occiput.

P. Nunc responde Anglicè.

P. Caput. S. *The head.*

P. Vertex. *The top of the head.*

P. Sinciput. S. *The fore-part.*

P. Occiput. S. *The hinder-part.*

P. Quid si nunc solus dicas omnia? S. Faciliè dicam.

P. Ego verò te libenter audiam.

S. Caput, *The head.*

Vertex, *The top of the head.*

Sinciput, *The fore-part.*

Occiput, *The hinder-part.*

Nonne bene dixi, præceptor? P. Quàm optimè. S. Laudetur Dominus Deus. P. O pulchrum verbum! Ito nunc petitum ab ancilla jentaculum. S. Malim abs te acci-

accipere, præceptor, si tibi non est molestum. P. O quam te amo de isto verbo ! agè, sequere me : dabo tibi aliquid boni, quia tuum rectè fecisti officium. Quid est hoc ? S. Panis candidus, *White bread*. P. Quid hæc sunt ? S. Ficus aridæ, *Dry figs*. P. Numeræ. S. una, duæ, tres, quatuor, quinque, sex. P. O lepidum capitulum ! Jenta nunc otiose.

## COLL. 3.

A. B.

VIS jentare mecum ? B. Non habeo jentaculum. A. Quid ? non attulisti ? B. Ego domo jentaveram. A. Itâne semper facis ? B. Minimè ; sed quia bene manè surrexeram sic matri placuit me tractare. A. Profit tibi : ego igitur solus jentabo. B. Et interim studebo.

## COLL. 4.

*Magister, Discipulus*

E Sne paratus ad reddendum studii tui rationem ? D. Paratus, ut mihi videor. M. Redde igitur, & esto præsentis animo. D. Hoc matutino tempore primùm pronuntiavimus carmen ex *Catone* : deinde ejus interpretationem *Latine & Anglicè* reddidimus : postremò bini tractavimus singulas partes orationis, cum attributis & significatione. M. Rectène fecisti officium tuum ? D. Puto me satisfacisse præceptoris magna ex parte. M. Videne mentiaris : nam ego illum percontabor. D. Ut voles, præceptor ; nihil hac in re metuo. M. Agè pergamus. Meridie quid habetis reddere ? D. Habemus declinare verbum *Possum*, *Latine & Anglicè*. M. Nihil præterea ? D. Nihil. M. Ego te illud aliàs docui : nonne tenes memoriâ ? D. Non ausim affirmare, donec tentavero. M. Declina in primas personas : cætera tibi erunt facillima. D. *Indicativus* Possum, *I can* ; poteram, *I was able* ; potui, *I have been able* ; potueram, *I had been able* ; poterò, *I shall be able*.

*Imperativus* deest.*Opta-*



*Optativus.* Utinam possim, *God grant I can*; utinam possem, *would to God I could*; utinam potueram, *God grant I have been able*; utinam potuissem, *would to God I had been able*.

*Subjunctivus.* Ut possim, *that I may*; ut possem, *that I might*; quamvis potuerim, *although I have been able*; quamvis potuissem, *although I had been able*; cum potuero, *when I shall be able*. M. Declina totum Infinitivum.

D. Infinitivi modi præsens & præteritum-imperfectum, *Posse, To may or can*; præteritum-perfectum & plusquam-perfectum, *Potuisse, To have or had been able*; Cætera desunt. M. Cur hoc verbum *Possim* caret futuro infinito? cur item participio in *rus*? D. Quia non habet supinum. M. Quid tum? D. Illæ enim voces à supino formari solent. M. Da exemplum in aliquo verbo integro. D. Ut à lupino *Leſſu* fit *Leſſurus*, & à *Leſſurus* fit *Leſſurum* esse. M. Rectè sanè. Sed cur prætermiſiſti participii præsens à verbo *Possim*, cum sit in usu *Potens potentis*? D. Quia (ut sæpe nos docuiſti) *Potens* non est participium, licet à *Possim* veniat. M. Quid e. gò est? D. Nomen adjectivum. M. Probè meministi: utinam sic pergas semper! D. Spero indies meliora per Dei gratiam. M. Ego quoque idem tecum spero. Nunc restat, ut dicas Præteritum cum prole. *Potui, potueram, potuerim, potuero, potuissem, potuisse*. M. Dic terminationes. D. *I, ram, rim, ro, sem, se*. M. Dic significationes. D. *Possim, I am able*; *posse, to be able*. M. Hæc hætenus: ecce! ecce! vocamur ad prandium.

## O L L. 5.

## C. D.

Q Uando vis prandere? D. Ego jam prandi. C. Quotâ horâ? D. Sefquioctavâ. C. Tam manè igitur prandetis? D. Sic ferè solemus in æstate: Vos autem? C. Non prandemus ante sesquidecimam: interdum ab undecima. D. Papæ! cur non citiùs? C. Expectandus est pater, dum

dum è curia redierit. D. Tu igitur non potes adesse aulæ in cantione *Psalmorum*. C. Rarò admodum interdum. D. Quomodo excusaris? C. Exemptus sum illo munere. D. Quis te exemit? C. Didascalus, patris mei monitu. D. Ergò omnes Senatorum filii habent hujusmodi privilegium? C. Habent, modò patres jubeant. D. Nonne mater posset dare tibi prandium ante reditum patris è Senatu? C. Posset quidem, sed pater vult à me expectari. D. Quamobrem? C. Quia sic illi placet. D. Nunc mihi tacendum est: os enim mihi occlusisti. C. Cur tu es tam curiosus percontator? D. Puer sum; & *pueri semper cupiunt aliquod scire novi*. C. Fateor: sed est modus in rebus, ut præceptor nos sæpe docet. D. Ergò discedamus, ut te pransum conferas. C. Ignosce, quæso, si qua in re te offenderim, D. Ego abs te idem peto: ego, inquam, potiùs, qui te offendere potui loquacitate meâ; sed interim nihil mali cogitans.

## COLL. 6.

F. G.

**U**BI hodie cibum cepisti? G. Apud hospitem meum. F. Quânti prandisti? G. Sex quadrantibus. F. Quid coena, quanti constitit? C. Tantidem. Tu verò quanti aleris quotidie? F. Pluris quàm tu. G. Quanti igitur? F. Quatuor assibus.

## COLL. 7.

*Choletus, Colloquens.*

**U**Nde redis? Co. Foris. Ch. Cur prodieras? Co. Ut irem domum. Ch. Quid eó? Co. Petitum libros meos. Ch. Eho! cur non attuleras? Co. Oblitus eram. Ch. Siccine soles jentaculum aut merendam oblivisci? Co. Rarissimè. Ch. Profectò magna fuit negligentia. Co. Imò maxima; sed quid agas? pueri sumus. Ch. Quid si præceptor tuum factum sciret? Co. Fortasse poenas darem. Ch. Ain' tu fortasse? proculdubio vapulares. Non te pudet sine libris in Scholam venire? Co. Non solum

lùm pudet, sed piget etiam ; veruntamen nè me accuses, obsecro. Ch. Nihil minùs cogito ; sed non possum dissimulare, quin ego te reprehendam. Co. Istud (credo equidem) amicè facis : itàque boni consulo. Ch. Id satis est mihi : eamus intro in auditorium. Co. Tempus est : jam decuriones exigunt scripturæ rationem.

## COLL. 8.

*Puer, Pædagogus.*

**P**Ræceptor, licérne pauca ? Pæ. Loquere audacter.

Pu. Ego & condiscipuli mei hoc ferè toto triduo libris affixi sumus, licérne paulisper animum ludo relaxare ?

Pæ. Dic igitur aliquam sententiam.

Pu. *Interpone tuis interdum gaudia curis,*

*Ut possis animo quemvis sufferre laborem.*

Pæ. Dic etiam versus Anglicos, si memoriâ tenes.

Pu. *Mirth with thy labour sometimes pat in ure,*

*That better thou thy labour mayst endure.*

Pæ. Quàm rectè dixisti omnia ! Pu. Est Deo gratia.

Pæ. Addendum posthac erit aliquid. Pu. Quidnam, præceptor ?

Pæ. Qui dedit mihi ingenium & mentem bonam.

Pu. Sed quis me illa docebit verba ? Pæ. Ea scribam tibi in commentariolo tuo, ut ediscas. Sed dic mihi, quæso,

Quis te docuit istam orationem, quam pronunciâsti ?

Pu. *Campanus* heri dederat mihi scriptam, & ego memoriæ mandavi. Pæ. Profectò ego te amo, mi *Daniel*, ob istam diligentiam.

Pu. Ago tibi gratias, præceptor. Permittisne igitur ut ludamus ?

Pæ. Sanè. Abi, renuncia condiscipulis tuis.

Pu. Faciam. Pæ. Quid dices illis ? Pu. Id,

quod me docui, si aliquando. Pæ. Sed volo priùs ex te audire.

Pu. *Gaudete pueri ; en ! affero vobis jucundum nunciam :*

*Ego vobis impetravi ludendi potestatem.* Pæ. Euge

probe meministi. Ito nunc jam.

## COLL. 9.

*Conradus, Daniel.*

**R**Epetamus nomina quotidiana, ut certiùs reddamus ea præceptori. D. Bene mones ; præito mihi, hesterna.

na. Dic Latine, *An eye.* D. *Oculus.*

C. *The right eye.* D. *Oculus dexter.*

C. *The left eye.* D. *Oculus sinister.*

C. *Both the eyes.* D. *Ambo oculi.* C. *Probè tenes.*

D. *Nunc audi an rectè solus dicam.* C. *Agè, audio.*

D. *An eye.* C. *Debes enumerare in digitis, ut docet præceptor.*

D. *Quid prodest istud?* C. *Ad memoriam juvandam.*

D. *Quid hoc sibi vult?* C. *Non audivisti multoties?* D. *Ego sum obliviosus: quid agerem?*

C. *Esto diligentior ad ea retinenda quæ perceperis.*

D. *Quòd me fideliter mones, pergratum facis.*

C. *Agè, ad rem redi.*

D. *An eye, Oculus.* *The right eye, Oculus dexter.*

*The left eye, Oculus sinister.*

*Both the eyes, Ambo oculi.* C. *Quàm rectè omnia dixisti!*

D. *Reperamus etiam hodierna.* C. *Placet: at tu vicissim præito mihi.*

D. *A hand.* C. *Manus.*

D. *The right hand.* C. *Manus dextra.*

D. *The left hand.* C. *Manus sinistra.*

D. *Both the hands.* C. *Ambæ manus.* D. *Restat, ut solus dicas.*

C. *A hand, Manus.*

*The right hand, Manus dextra.*

*The left hand, Manus sinistra.*

*Both the hands, Ambæ manus.* D. *O si tam benè dicere-*

*mus coram præceptore!* C. *Quid obstat?* D. *Quia time-*

*mus.* C. *Et tamen errata nostra satè humaniter corrigit.*

D. *Nescio quid hoc sibi velit: Ego semper sum timidus in*

*principio.* C. *Istud est quodammodo naturale omnibus,*

*ut audivimus ex præceptore.* D. *Nunc repetendum esset*

*Latine & Anglice; sed præceptorem venientem video.*

C. *Ingrediamur.*

COLL. 10.

A. B.

**D**IC Latine, *Let us say our lesson together.* B. Repetamus unâ prælectionem. A. Hæc oratio quot habet partes? B. Tres. A. Discerne singulas nominatim. B. Repetamus est verbum: Una adverbium: Prælectionem, nomen. A. Declara paulò planius. B. Tu igitur præito mihi, ut solet præceptor. A. Repetamus. B. Repeto, repetis, repetere, conjugationis tertiæ, sicut *Lego, legis, legere.* Præteritum, *repetivi*: Supinum, *repetitum*: Participia, *repetens, & repetiturus.* A. Undâ B. Non declinatur, quia est adverbium hoc in loco; Anglicè, *Together.* A. Prælectionem. B. Prælectio, prælectionis, f. g. *The lesson, or lecture.*

COLL. 11.

A. B.

**E**Amus unâ repetitum. B. Quid ego repeterem? Nonne satis est, quod solus repetiverim? A. Si tantum semel aut bis repetieris, id parum est ad ediscendum. B. Imo circiter decies repetivi. A. Id quidem sufficit. B. Quid igitur vis amplius? A. Si vis certissime reddere coram præceptore, opus est cum aliquo repetivisse. B. Istud ego nesciebam: sed tibi libenter assentior. A. Faciamus ergò quod ego te monebam. B. Equidem non recuso: incipe.

COLL. 12.

*Gentilis, Isaacus.*

**T**Enésne memoriâ prælectionem? I. Propemodum. G. Vñne repetamus unâ? I. Maximè velim. G. Incipe igitur. I. Faciam libenter: sed tu attentè audi, ut me corrigas, si quid erravero. G. Agedum. *Fac sumptum prope.* G. Errasti: incipiendum fuit ab hesternâ. I. Bene mones: nunc incipiamus; *Iratus de re incerta contendere noli: Impedit ira.* G. Peccas accentu ira. I. Impedit animum ira nē. G. Distingue post animum. I. Impedit



dit ira animum, nè possit cernere Verum. Fac sumptum prope-  
re, cum res desiderat ipsa : Dandum etenim. G. Iterum pec-  
cas accentu : Repete. I. Dandum enim est aliquid, cum tem-  
pus postulat, aut res. G. Vidēsne te erravisse quater ? I. Vi-  
deo. G. Et observāsti locos ? I. Observavi. C. Sic tibi  
facilius cavebis. I. Me miserum ! putabam me recte te-  
nere. G. Sic mihi quoque solet accidere, quoties memo-  
ria non est bene confirmata I. Felix qui memoriam bo-  
nam habet. G. Magnum Dei beneficium. Sed tempus  
abit ; audi nunc me. I. Audio, pronuntia. G. Iratus de  
re incerta contendere noli. I. Hem ! præceptor adest, tace,  
ut illum salutemus.

## COLL. 13.

*Clemens, Felix.*

**N**ihilne est, quod reddamus hodie præceptorī ? F. Ni-  
hil, nisi de *Grammaticæ rudimentis*. C. Quidnam ?  
F. Inspice librum tuum, invenies notas in quinque lectio-  
nes, quas præceptor nobis præscripsit. C. Quando istud  
fuit ? F. Die *Veneris*, horā quartā. C. At ego tunc non  
interfui. F. Ergo plagas meruisti. C. Siccine iudicas, se-  
vere iudex ? occupatus eram domi, nec abieram injussu  
præceptoris. F. Esto ; sed tamen debuisti postridie quærere  
quid per te actum est. C. Meam culpam confiteor : sed  
cedo librum tuum, quæso, ut videam quid nobis reddend-  
um sit. F. Accipe, & eadem operā signato quæ à præce-  
ptore nobis præscripta sunt. C. Faciam diligenter : neque  
posthac (ut spero) me accusabis negligentiae.

## COLL. 14.

*Comes, Oliverius.*

**Q**uid actum est in auditorio horā tertiā ? O. Tractatae  
sunt orationis partes ex prælectione. C. Nihilne  
amplius ? O. Dixissem, nisi me interpellasses. C. Erravi ;  
perge. O. Postea dictavit præceptor argumentum *An-  
gelicum* hodie vertendum. C. Quando reddendum ? O.  
Gras meridiē, C. Jamne vertisti ? O. Utcunque. C. Dic ta-  
mi hi

mihi, Quæso, vernaculum. G. Accipe, festina; nam habeo aliquid scribere,

COLL. 15.

*Sylvius, Gervasius.*

**Q**uid agis? G. Repeto mecum. S. Quid repetis? G. Præscriptum hodiernum præceptoris. S. Tenésne memoriâ? G. Sic opinor. S. Repetamus unâ: sic uterque nostrum rectius pronuntiabit coram præceptore. G. Tu igitur incipe, qui me provocâsti. S. Agè, attentus esto, nè me sinas aberrare. G. Sum promptior ad audiendum, quàm tu ad pronuntiandum.

COLL. 16.

*Apooratus, Cortinus.*

**V**isne mecum repetere prælectionem? C. Volo. A. Tenésne? C. Non fatès rectè fortasse. A. Age, faciamus periculum. C. Quid igitur expectamus? A. Ubi volès, incipe. C. Atqui tuum est potius incipere. A. Quid itâ? C. Quia me invitâsti. A. Æquum dicis; attende igitur. C. Istic sum.

COLL. 17.

*Grissus, Sandrotus.*

**J**amne tenes quæ reddenda sunt horâ tertiâ? S. Teneo. C. Ego quoque. S. Ergò confabulemur paulisper. C. Sed si intervenerit observator, putabit nos garrire. S. Quid times, ubi nihil timendum est? Si venerit, non deprehendet nos in otio, aut in re mala. Audiat, si velit, nostrum colloquium. C. Optimè loqueris: secedamus aliquò in angulum, nè quis nos impediat.

COLL. 18.

*Trimundus, Messor.*

**N**ON decet hîc oriri, aut garrire; dum præceptor expectatur. M. Quid ais? Non decet? Imò verò non licet, nisi volumus vapulare. T. Tu igitur, audi me, dum prælectionem pronuntio: ego deinde te audiam. M. Age, pronuntia.

COLL.



## COLL. 19.

E. F.

**C**UR non scribis? F. Jam scripsi meam paginam: tu veró? E. Eo scriptum in aëa. F. Quid ita? E. Quia serenum est coelum. F. Festino, tempus abiit: & mox exigetur ratio.

## COLL. 20.

*Titus, Valerius.*

**C**UR non scribis? V. Quia non liber. T. Atqui præceptor iusserat. V. Scio: sed est mihi aliquid legendū prius; præterea nil habeo, quod nunc scribam. T. O si velles mihi scribere! V. Quidnam? T. Habeo describenda dictata præceptoris. V. Quæ dictata? T. In *Ciceronis Epistolas*. V. Libenter describam tibi: sed expecta feriarum diem proximum. T. Expectabo igitur: sed nè fallas, quæso. V. Nec sciens, nec volens fallam.

## COLL. 21.

*Damon, Audax.*

**V**isne mihi describere prælectionem? A. Cur non habes? D. Quia hesterno die fui occupatus. A. Accipe librum meum, & describe. D. Non ignoras me lentius scribere: & tu citius totum descripseris, quam ego quatuor aut quinque versiculos. A. Quære tibi alium scriptorem; nunc ego tibi non possum dare operam. D. Cur non? A. Est mihi aliud negotium, idémque pernecessarium. D. Nolo te urgere, nec possum quidem: sed saltem commoda tuum codicem. A. Accipe; utere ut liber, modò nè abutare. D. Nihil est, quod hâc verearis.

## COLL. 22.

*Augustinus, Observator domesticus.*

**L**icéne ire cubitum, condiscipule? O. Cur ante horam? A. Quia tertiâ est mihi surgendum. O. Quamobrem? A. Scribendi causâ. O. Quid habes scribere? A. Literas ad patrem. O. Cur non petis à præceptore veniam? A. Bene mones, éstne in musæolo? O. Puto esse: vise.

## COLL. 23.

*Pædagogus, Puer.*

**U**Nde venis ? Pu. Venio inferné. P. Quod erat tibi negotium infrá ? Pu. Iveram redditum urinam. P. Sede nunc ad mensam, & mane in cubiculo donec rediero. Pu. Quid agam interea ? P. Edisce prælectionem in diem crastinum ; ut eam mihi reddas ante coenam. Pu. Jam edidici, præceptor. P. Lude igitur. Pu. Sed nullos habeo collutores. Satis multos invenies in hac vicinia, ex tuis etiam condiscipulis. Pu. Nihil id curo nunc : malim (si tibi placet) ediscere de *Catechismo*, in diem *Dominicum*, P. Ut libet. Pu. Si quis te quæret, quid illi dicam ? P. Dic me prodiisse, sed mox reversurum.

## COLL. 24.

*Pædagogus, Abrahamus, Puer.*

**H**Eus ! *Abrahame*. A. Hem ! præceptor. P. Pone libros ; jam satis toto die studuisti : para te, ut eamus ambulatum. A. Nonne à coena præstaret ? P. Salubrior est ante cibum exercitatio corporis. A. Memini ex te audire. P. Narra *Socratis* dictum in eam sententiam. A. *Cum Socrates usque ad vespæram contentius ambularet, interrogatus quare id faceret, respondit, Se, quò melius cœnaret, obsonare famem ambulando.* P. Probe meministi : quis auctor ? A. *Cicero* : sed quò prodibimus, præceptor ? P. Extra urbem. A. Mutabóne calceos ? P. Muta, nè illos novos pulvere conspergas : sume etiam umbellam, nè solis ardor infuscet tibi faciem. A. Jam paratus adsum. P. Nunc sanè prodeamus. A. Vocabóne ex vicinia unum aut alterum comitem ; P. Rectè admones ? sic enim jucundior erit deambulatio : nam per viam sermones inter vos conferetis, & in umbra colluderis alicubi. A. Sic etiam excitabitur tibi appetentia. P. Ego lento gradu præcedam ; ubi nactus eris comites, vos me per *portam Ripariam* sequimini. A. Nos igitur illíc expectabis ? P. Certó. A. Quid si nullos invenero ? P. Nihilominus sequere me : audistíne ? A. Audi-vi præceptor.

## COLL. 25.

*Herfenius, Gimardus.*

**A** Quo emisti istam chartam? G. A *Fatino*. H. Estne bona? G. Melior quàm ista tua, ut opinor. H. Nihil miror. G. Cur istud dicis? H. Quia fortasse carior. G. Nescio. H. Quanti emisti scapum? G. Solido & semisse; tu verò quanti? H. Solido, & pluris. G. Quanti igitur? A. Quinque *quadrantibus*. G. Non male profectò emisti. H. Quineriam mercator dedit mihi auctarium. G. Quod? nam quæso? H. Schedam chartæ bibulæ. G. O me imprudentem, qui oblitus sum petere! H. Ego nè petivi quidem, sed ultrò ille dedit. *Et hoc inquit, addo tibi, ut me revisas.* G. Sic solent emptores allicere. H. Nec mirum: suum quisque commodum quærit. G. Sed quid agimus, hodierni pensi immemores? H. Exiguum est: satis temporis nobis restat.

## COLL. 26.

*Ancellus, Fontanus.*

**M** Eministín' me tibi nuper dedisse chartam mutuò? F. Quidni meminerim! non adeò sum obliviosus. A. Quot erant schedæ? F. Quatuor. A. Cur non reddidisti? F. Expectavi dum haberem codicem. A. Habuistíne tandem? F. Tantù'n hodie. A. Unde nactus es? F. Petivi à præceptore. A. Ubi? F. In bibliotheca ejus. A. Quid ille? dedítne libenter? F. Misit me ad hypodidasalum, qui statim dedit codicem. A. Non antè in suum codicem retulit? F. Nihil dare solet, quin priùs inscribat. A. Audivi ex patre id esse viri prudentis. F. Præsertim, si reddenda est ratio. A. Sed quibus indiciis dare tibi ausus est? F. Ostendi illi manu meâ scriptum in libello meo: sic enim, ut scis, facere solemus. A. Reddes ergò mihi mutuum? F. A prandio statim, nè dubites.

## COLL. 27.

*Francus, Marcus.*

**P**ennæ istæ, quas circumfers, sũntne venales? M. Etiam; si se emptor obtulerit. F. Ostende: vah, quàm sunt

molles ! M. Tales deciderunt ex alis nostrorum anserum : sed tenta diligenter ; sunt aliæ aliis firmiores. F. Satis video quales sint ; quot vis dare pro quadrante ? M. Tantum sex. F. Quid ais ? sex ? mallem emere à mercatoribus, qui *Lutetiâ* & *Lugduno* huc adferunt. M. Quasi nesciam quanti vendantur. Audiui ex fratre, qui dat operam scribæ hujus civitatis, se emisse *Lutetiæ* singulis assibus. F. Aliter *Lutetiæ*, aliter *Genevæ* vivitur : sed non opus est tot verbis, vis dare duodecim ? M. Hui, duodecim ! quasi ego furatus sim ! F. Istud non dico ; sed vide num tibi placeat conditio. M. Vis uno verbo dicam ? F. Dic, quæso, satis jam garrutum est. M. Dabo tibi novem, modo promiscuè de mea manu accipias. F. Nugas agis ; ego sine delectu nollem accipere quindecim. Vale : alibi inveniam satius. M. Per me licet : heus ! heus ! redi. F. Cur me revocas ? M. Accipe si vis, octo ; nec à me plures expecta. F. Cedò totum fasciculū, ut deligam arbitrato meo. M. Tene ; delige ut voles. F. Vide nunc, & si libet, numera. M. Sunt viginti quatuor : constat numerus. Sed miror te nullas accepisse ex ala extrema : sunt enim firmiores. F. Scio ; sed habent caulem breviorē. Accipe pretium. M. Bene vertat Deus utrique nostrū. F. Idem tecum opto, atque precor. Sed quando afferes meliores pennas ? M. Nescio an meliores possim, sed ut spero brevī plures afferam, cum ad vos domum proficiscar. F. Sūntne vobis multi anseres ? M. Triginta & ampliūs. F. Papæ ! quantus grex anserum ! ubi pascuntur ? M. Scies aliās, non licet mihi diutiūs hīc morari. Vale *France*. F. Cura ut valeas, *Marce*.

## COLL. 28.

*Othomanus, Philobertus.*

**V**isne mihi dare unicam pennam ? P. Non sic dantur mihi ! O. Hem ! rem cantillam mihi negas ? quid, si magnum quid rogarem ? P. Fortasse repulsam ferres. O. Credo equidem : agè, non peto dono. saltem commodabis ? P. Non recuso, modò nè abutare. O. Non abutar. P. Cave nè hinc pedem moveas. N. Nusquam moveo.

COLL.

## COLL. 29.

Mercator, *Bertrandus*.

**A** Cuistine pennam meam? B. Jamdudum. M. Quâ formâ scripturæ? B. Mediocri. M. Maluisssem ad minutas literas. B. Debuiſti prædicere. M. Oblitus eram. B. Parùm refert; mucronem facile mutabo: I petiſtum. M. Sed ubi reliquiſti? B. Super mensam hypocausti. M. In qua parte? B. Ubi ſtudere ſoleo.

## COLL. 30.

*Piſlonus, Joſhua.*

**H** Abésne duas aut tres pennas? J. Sunt mihi tantùm duæ. P. Da mihi unam commodatò. J. Non faciam. P. Cur non? J. Nè abutaris. B. Memineris; fortasse aliquando me frustrà rogabis aliquid. J. Atqui jubet *Christus* malum bono compensandum. P. Nondum illud didici. J. Tamen discas oportet, si cupis esse *Christi* discipulus. P. Quid cupio magis? J. Disce igitur magistrum imitari. P. Discam progressu temporis. J. Præstaret nunc incipere, dum per tempus licet. P. Nimis urges: nondum complevi annum octavum, ut ait mater. J. Semper est bene agendi tempus; sed interim nè mihi, quæso, succenseas: jocabar enim ut te ad colloquendum invitarem tantisper, dum sumus otiosi. Ecce tibi penna, eaque non omnino pessima. P. Reddam tibi statim, cùm aliquid descripsero. J. Nolo mihi reddas. P. Quid igitur faciam? J. Quicquid voles: à me enim tibi dono datur. P. Gratiam habeo maximam.

## COLL. 31.

*Henricus, Gualtherius.*

**U** Nde redis tam anhelus? G. A foro. H. Quid illinc affers? G. Scalpellum. H. Quanti emisti? G. Duobus assibus. H. Estne bonum? G. Est à *Germania*, ut dixit mercator: vide notam. H. Ego minimè novi: sed non satis prudenter facis, qui fidas cuilibet mercatori. G. Quid facerem? H. Debuiſti aliquem peritam adhibere, qui tibi



optimum deligeret. G. Hic erravi fateor : sed hoc me  
 consolatur, quod mercator habetur vir bonus, utpote  
 professionis Evangelicæ. H. Quasi nulli sint fallaces ejus-  
 modi. G. Puto esse plurimos. Sed hæc omittamus ; quin  
 potius experiamur ipsum scalpellum. H. Experientia do-  
 cebit nos. G. Accipe & tenta obsecro. Non enim probavi,  
 nisi levissimè, idque inter emendum. H. Papæ ! quis  
 te docuit tam prudenter eligere ? G. Rogas ? non memi-  
 nisti præceptorem nobis dicere tam sæpe, Deum esse so-  
 lum, qui bona doceat ? H. Profectò hic optimè te docuit.  
 G. Ago illi ex animo gratias : & precor, ut me semper do-  
 ceat parere suæ voluntati. H. Ego quoque idem precor ;  
 nec solum nobis, sed etiam piis omnibus. G. Facis ut  
 pius decet puerum. Sed estne tempus, ut conferamus  
 nos in auditorium ? H. Sic est ; Sume libros, & ea-  
 mus una.

## COLL. 32.

*Michael, Renatus.*

**H**Abésne scalpellum ? R. Habeo. M. Oro te, commoda  
 mihi parumper. R. Quando reddes ? M. Cùm pri-  
 mum duas pennas exacuero. R. Accipe ; sed eà lege, ut  
 integrum reddas. M. Eà conditione acceptum intelligo,  
 etiamsi nihil addidisses. R. *Intelligenti* (ut vulgò dicitur)  
*pauca sufficiunt.*

## COLL. 33.

*Sordetes, Manasses.*

**E**Mistine scalpellum, ut nuper volebas ? M. Non emi.  
 S. Quid obstitit ? dixeras enim mihi empturum te ho-  
 die. M. Dixeram quidem ; sed mihi postea in mentem  
 venit, præstare ut expectem mercatum proximè futurum  
 in hac ipsa urbe. S. Quid facies lucri ? M. Et minoris  
 emam, & melioris notæ : nempe ex *Germaniæ* officinis.  
 S. Quis tibi illud consilium dedit ? M. *Hieronymus* noster.  
 S. Bene fecit. Debetis enim amicis bonum consilium  
 semper dare. M. Tantumne igitur amicis ? S. Imò & inimi-  
 cis, fateor : quia sic jubet *Christus* præceptor noster opti-  
 mus.

mus. M. Utinam doctrinam ejus bene infixam memoriae conservemus, eamque perpetuò sequamur ! S. Faxit ille Spiritus bonus, cujus unius instinctu animi nostri ad bene agendum accenduntur. M. Bene precaris.

COLL. 34.

*Campanus, Languinus.*

**H**Abésne multos libros ! L. Non admodum. C. Sed quos habes ? L. *Rudimenta Grammaticæ, Colloquia Scholastica, Terentium, Epistolas Ciceronis* cum Gallica interpretatione, *Catonem, Dictionarium, Testamentum Anglicum, Psalmos cum Catechismo*, præterea librum chartaceum ad scribendum dictata præceptoris. Tu verò quos habes ? C. Omnes habeo quos enumerâsti, præter *Catonem, Terentium, & Ciceronis Epistolas*. Cur enim libros haberem, qui non præleguntur in classe nostra ? L. At ego, dum sumus otiosi, lego interdum illos ; ut semper aliquid addiscam novi, præsertim in lingua *Latina*, & honestis moribus. C. Prudenter facis, mi *Languine*. O me miserum, qui nunquam didici quid sit studiosum esse ! L. Disce igitur. *Præstat enim serò quàm nunquam discere.*

COLL. 35.

*Simeon, Haggæus.*

**C**ommoda mihi *Virgilium* tuum in duos dies, si nullo incommodo tuo id fieri potest. H. Profecto non possum. S. Cur non ? H. Quia *Gerardus*, qui his diebus à me commodatò acceperat, pignori apposuit. S. Ain tu ? pignori ? H. Sic est, ut dico. S. Quanti oppignoravit ? H. Tribus ( ut ait ) assibus. S. O hominem ingratum ! H. Tantumne ingratum ? S. Imò verò & ingratum & malum. Sed nunquid ille rem tuam oppignorare potuit, te inconsulto ? H. Potuit, ut factum vides. S. Non tamen debuit. H. Rem acu tegisti : sed quid facerem ? S. Rogas ? defer eum ad præceptorem. H. Malo istam pati injuriam, quàm committere, ut miser vapulet. S. Bene facis, dummodo tuum reddat. H. Reddet, spero. S. Unde redderet ? Ait se brevi accepturum à patre pecuniam. S. Quid si te fallit ? A. Fieri potest : sed tamen aliquot dies expectabo quid



postea sit futurum; deinde consilium capiam. S. *Consilio re-  
cto nihil est tutius.* H. Meministi probè; sic enim præce-  
ptor distitavit nobis: sed nunquid vis aliud? S. Ut Bene  
tibi sit. H. Et tibi optimè.

## COLL. 36.

*Granatus, Forestus.*

**V**isne mihi commodare tuum *Terentium*? F. Volo  
equidem, modò illum repetas à *Conrado*, cui uten-  
dum dedi. G. Quo signo vis repetam? F. Nempe hoc, quòd  
ejushabeo *Epistolas*. G. Id mihi satè est. F. Sed quando  
reddes? G. Cùm descripsero contextum in tres aut qua-  
tuor prælectiones. F. Matura igitur; ne meo studio in-  
commodes. G. Maturabo. F. Sed heus tu, cave ne macules:  
alioquin ægrè commodabo posthac. G. Nempe indignus  
essem beneficio.

## COLL. 37.

*Augustinus, Rodigus.*

**Q**uìs iste novus liber deauratus, quem tam magni-  
ficè ostentas? R. *Terentius*. A. Ubi impressus? R.  
*Lutetiæ*. A. Quis tibi dedit eum? R. Emi pecunià meà.  
A. Unde nactus eras pecuniam? R. Stulte, istud quæris?  
quasi verò furatus sim? A. Absit à me id cogitare: sed ani-  
mi causà id rogabam. C. Nec ego seriò dictum tuum re-  
prehendi: sed eo more jöcari solemus cum familiaribus.  
A. Nihil jöcari prohibet, modò nè Deus offendatur. Sed  
agè, ad propositum revertamus: de quo emisti *Terentium*  
istum? R. De *Clemente*. A. Illòne bibliopola circumfor-  
aneo? R. Maximè. A. Quanti constitit? R. De *transac-*  
*tibus*. A. Nihilne ampliùs? R. Nihil omninò. A. Profectò  
satè vile pretium. R. Præsertim cùm auratus, adeoque  
elegantè compactus sit. A. Erantne codices alii similes?  
A. Duo vel tres. A. Deduc me quæso ad illum. R. Eamus.

## COLL. 38.

*Edvardus, Bildus.*

**N**onne hic liber est tuus? B. Ostende mihi: agnosco  
meum, ubi invenisti? E. In auditorio nostro. B. A-

go tibi gratias, quòd eum collegeris. E. Atqui nunc notandus esses, si summo jure vellem tecum agere. B. Quid ita? E. Nescis leges nostras Scholasticas? B. *Ipsæ etiam leges cupiunt, ut jure regantur.* E. Quo jure reguntur leges nostræ? B. Æquitate, & præceptoris arbitrio, nempe qui nobis eas privatim condiderit: præterea, non solet tam severus esse in eo, quod vel negligentia vel oblivione peccatum est. E. Sic sæpe expertus sum. Sed quoquo modo peccaveris, dicenda erit causa coram observatore. B. Non timeo causam dicere, ubi nihil est periculi. E. Taceo. B. Sed quæso, quid opus est ut id sciat observator? hic enim Deus nihil offensus est. E. Agè, celabo. B. Bene facies. E. Sed, heus? memento par pari referre, si fortè mihi acciderit aliquod delictum ejusmodi. B. Æquum & bonum dicis: meminero.

## COLL. 39.

*Calliatus, Germanus.*

CUR non reddis mihi librum? G. Expecta in crastinum diem: nondum satis usus sum. C. Libenter expectabo. G. Referam tibi gratiam, Deo volente. C. Pro tantillo beneficio nullam expectabo gratiam. G. Tantum est meum agnoscere.

## COLL. 40.

*Noëus, Capellus.*

VIdistine librum meum? G. Quem librum quæris? N. *Ciceronis Epistolas.* C. Ubi reliqueras? N. Oblitus eram in auditorio. C. Tua fuit negligentia. N. Fa-teor: sed interim indica, si quem scias accepisse. C. Cur non ades præceptorem? solet enim (ut scis) quæ à nobis relicta sunt aut ferre in musæolum, aut alicui dare qui reddat. N. Bene mones. O me obliviosum, cui id in mentem non venit!

## COLL. 41.

*Ezekiel, Beatus.*

VIS à me magnam inire gratiam? B. Nihil libentiùs fecerim, si quidem penes me res ipsa est. Sed quid est in

in quo tibi commodare possim. E. Da mihi mutuò asses decem. B. Non tantum nunc habeo, sed majorem partem. E. Quantum quæso? B. Nescio, nisi crumenam inspexero: ecce tibi octo asses cum semisse. E. Solos septem accipio, non enim te vacuare prorsus volo. B. Parùm refert, totum, si vis, accipe. E. Ago tibi gratias: credo hoc pecuniæ satis fore negotio meo, cum aliquantula, quam ipse habeo. B. Ut libet. E. Amo te de ista tam exprompta benignitate. B. Si quid aliud possim, nè parcas. E. Reddam totum, Deo volente, cum primum pater ad me miserit. B. Nè sis magnopere sollicitus; nondum est opus mihi.

## COLL. 42.

*David, Nicolaus.*

**P**Otēsne mihi mutuò dare aliquantulum pecuniæ? N. Quantum petis? D. Quinque asses, si tibi est commodum. N. Non tot habeo. D. Quot igitur? N. Tantum quatuor. D. Bene sanè. Da mihi istos quatuor. N. Dabo (si vis) dimidium. D. Cur non totum? N. Quia sunt mihi opus duo. D. Da igitur duos quæso. N. Sed tibi non sufficient. D. Petam ab aliquo alio. N. Accipe igitur hos duos: quando reddes? D. Die (ut spero) *Sabbati*, cum pater ad forum venerit. N. Esto igitur memor. D. Nè timeas.

## COLL. 43.

*Pasquetus, Cuius.*

**D**A mihi duos asses mutuò. C. Nunc mihi non est promptum dare. P. Quid obstat? nam scio te his diebus accepisse pecuniam. C. Accepi quidem; sed emendi sunt libri, & alia mihi necessaria. P. Nolo tuum commodum remorari. C. Ubi emero quæ mihi sunt opus, si quid superfit, faciam te libenter participem. P. Interea igitur sperans expectabo: sed quid si nihil tibi superfuerit? C. Statim dicam tibi, nè frustra diutiùs expectes. P. Quando emes ea, quæ decrevisti? C. Cras (ut spero) aut ad summum perendie. P. Bene habet, tempus est brevissimum.

## COLL. 44.

*Morellus, Borussardus.*

**A** Bisne pater tuus? B. Abiit. M. Quotâ horâ? B. Primâ pomeridianâ. M. Quid dixit tibi? B. Multis verbis monuit me, ut diligenter studerem. M. Utinam sic facias! B. Faciam, Deo iuvante. M. Ecquid pecuniæ dedisti tibi? B. Dedit, ut ferè solet. M. Quantum? B. Nihil ad te. M. Fateor: sed tamen quid facies istâ pecuniâ? B. Emam chartam, & alia quæ mihi sunt usui. M. Quid si amiseris? B. Æquo animo ferendum erit. M. Quid si fortè eguero? dabisne mutuó? B. Dabo, & quidem libenter. M. Habeo tibi gratiam.

## COLL. 45.

*Columbanus, Fontanus.*

**S** Atisne usus es scalpello meo? F. Satís. C. Redde igitur. F. Accipe: ago tibi gratias. C. Nihil est quòd agas. F. Sed ignosce, quòd non ultrò & citiùs reddiderim. C. Ea de re nihil sum offensus: non enim debemus offendi, nisi cùm Deum offendi videmus. F. Rectè sentis.

## COLL. 46.

*Bergerius, Nepos.*

**C** Ommoda mihi parumper cultellum tuum. N. Semper aliquid commodatò petis: accipe, quin emeres potiùs. B. Non habeo pecuniam. N. Cur non petis? B. Unde peterem? N. A patre. B. Non est in hac urbe. N. Ubi igitur? B. Peregrè profectus est. N. Quó? B. *Ber-nam*. N. Quo die? B. Nudiustertius. N. Quando est reversus? B. Cras, ut speramus: sic enim dixit proficiscens. N. Bene vertat Deus.

## COLL. 47.

*Columbinius, Simo.*

**R** Estâne tibi multum panis? S. Satís, gratia Deo. C. Visne dare mihi mutuó? S. Libenter. C. Sed fortasse tibi non sufficiet. S. Imò, ut spero. C. Ad quod usque tempus? S. Ad diem *Veneris*. C. Unde habebis postea?

S. Do-

S. Domo. C. Quis afferet? S. Egomet ibo petitum.  
C. Quando? S. Ipso die *Veneris*. C. Da mihi mutuò sescuilibram. S. Quis appendet? C. Uxor præceptoris, aut ancilla. S. Eamus petitum ex arca mea. C. Quin ito solus: ego te in culina expectabo.

COLL. 48.

I. T.

**O**RO te, da mihi ex pane tuo. T. Mihi non habeo nimis; tamen volo tibi impertire: accipe. I. Gratias ago tibi. T. Non est quod agas ob rem tantulam. Sed dic, quæso: cur non attulisti? I. Quia nemo erat domi nostræ qui mihi daret. T. Tu verò cur non accipis? I. Non audeo, nisi det mater. T. Bene facis; sed audi bonum consilium. I. Ausculto, ut audiam: dic quæso. T. Cùm, prandio finito, tollantur mensæ reliquiæ, petito merendam tuam, eamque in peram statim recondito: ita fiet, ut nunquam inanis venias. I. De jentaculo autem quid suades? T. Ut petas in exitu cænæ, & idem facias, quod dixi tibi de merenda. I. Nunquam vidi melius consilium dari. T. Fac igitur ut memineris: cùm voles, utere. I. Egò verò utar, quoties opus erit.

COLL. 49.

A. B.

**D**A mihi frustum panis. B. Non habes? A. Si habere rem, non peterem. B. Cur non attulisti? A. Dicam postea; sed da interim, quæso: nam esurio vehementer. B. Cape. A. Hui tantillum? B. Etiam quæperis? A. Non immerito, das parvè nimis. B. Vide quantum restat? dedi ferè dimidium. A. Ago tibi gratias; dedisti abundè sed jocabar. B. Nunc responde: cur non attulisti panem domo? A. Nemo erat, qui daret. B. Nemo? A. Prorsus nemo. B. Quid mater? A. Aberat domo. B. Quid cæteri? A. Omnes erant occupati. B. Cur tute non accipiebas? A. Nunquam auderem tæte quidpiam. B. Cur non? A. Mater perpetuò verat, nè quid attingam sine permissu ejus. B. Dura mater. A. Tuo quidem iudicio, qui indulgentiorem habes. B. Non dico indulgentem; sed certè liberalem.



lem. A. Quomodo te tractat ? B. Suavissimè, omninoq; ex animi sententia. A. Fortasse in tuam perniciem. B. Avertat Deus Optimus Maximus. A. Non equidem invideo. B. Cur ergò illud dicis ? A. Ut interim te moneam, *Omnes licentiâ deteriores fieri.* B. Bene facis : sed quid censes ? Nonne uti licet parentum bonitate ? A. Certè licet, modò nè abutaris. B. Quomodo abutimur ? A. Rogas ? càm aut patris aut matris indulgentiam in malum vertimus. B. Rectè dicis : sed quoruscumq; id facit ? A. Imò, ferè omnes, nisi qui à Domino Deo prohibentur. B. Quis potest bonus esse, nisi per Dei gratiam ? A. Ergò (ut sæpè monemur à præceptore) precandus est, ut Spiritu suo nos bonos & sanctos efficiat. B. Gaudeo te non attulisse jentaculum. A. Quamobrem ? B. Quia hoc nostro colloquio mihi videor multùm profecisse. A. Ego quoque non parùm. B. Tuâ operâ id factum est. A. Imò beneficio Dei, qui quidem ita voluit. B. Credo equidem. A. Et hîc igitur, & in cæteris agnoscamus bonitatem ejus. B. Valde id æquum est. A. Imò valde necessarium, siquidem volumus ingrati animi crimen effugere. B. O sermonem jucundissimum ! A. Gratias Deo immortales, per Jesum Christum. B. Ita velim.

## COLL. 50.

*Discipulus primus ex victoribus, Præceptor, Nomenclator.*

**P**Ræceptor, visne dare præmiolum ? P. Quamobrem ? D. Victoriæ causâ. P. Ubi sunt compares tui ? D. Ad sunt *Hugo & Audax.* P. Heus, nomenclator, sũntne hî victores hâc hebdomade ? N. Habent notas omnium paucissimas. P. Ergò sunt victores ; quid aliud ex te quæro ? Vos igitur quod præmium petitis ? D. Quod tibi placuerit. P. Quo tandem jure debeo ? D. Ex promisso. P. Æquum dicitis. *Quicquid enim recte promissum est, præstari debet.* D. Sic ex te didicimus. P. Ecce vobis pennæ singulæ ad scribendum ! ac nè putetis vulgares esse ; ex eorum sunt genere, quæ vulgò *Hollandinæ* appellantur. D. Gratias agimus, præceptor. P. Quin potius agite Deo omni

omnium bonorum auctori, qui dat studiis vestris successus prosperos : vos autem in literarum studio pergitte diligenter. D. Dabimus operam, quantum juvabit ille Pater optimus. P. Sine ejus ope vana sunt nostra omnia.

## COLL. 51.

*Observator, Cappareus.*

**U**Nde venis, Capparone? C. Domo. O. Quid affers il-  
linc? C. Merendam. O. Quis tibi promiserat exire?  
C. Præceptor ipse. O. Unde istud probabis? C. Adeamus  
illum ut consulamus. O. At vide quid agas! C. Hac in re  
nihil timeo. O. Adeone securus es? C. Qui verum dicit,  
nihil timere debet. O. Vera quidem ista est sententia, sed  
quotusquisque non mentitur? C. Certus sum me nihil  
mentiri nunc. O. Propemodum persuades mihi. Abi : cre-  
do tibi, quia in mendacio nunquam te deprehendi. C. Est  
Deo gratia : quem precor ut me integrum & purum cus-  
todiat. O. Utinam ex animo omnes precarentur ! recipe  
nunc te, ut edas merendam tuam.

## COLL. 52.

*Giraldus, Eliel.*

**Q**UI sunt victores hâc hebdomade? E. Ubi eras, cum  
rationes redderentur? G. Accersitus à patre fueram :  
sed qui sunt victores? dic sodes. E. Ego & Puteanus.  
G. Jâmne habuistis præmium? E. Habuimus. G. Quod-  
nam? E. Duodenas juglandes. G. Hui ! quale præmium!  
E. Eho, inepte, æstimas ergò præmium ex rei pretio?  
G. Hic nihil aliud video æstimandum. E. Sordidus es,  
qui lucro sic inhias. Non meministi verbum præceptoris?  
G. Quod verbum? E. Non lucri sed honoris causâ datur  
præmium. G. Nunc reminiscor, quasi per nebulam. Post-  
nac ero diligentior. E. Sic tandem sapiēs.

## COLL. 53.

*Galatinus, Burchardus.*

**E**Uge, dimissi sumus ad ludum, audistine? B. Quidmi  
audirem? cum egomet adfuerim. G. Placétne pau-  
lisper



lisper confabulari ? deinde ludemus unâ. B. Mallem ego prius ludere. G. Atqui difficile est ludum abrumpere. B. Planè verum dicis, & ego in me sic experior. G. Quoniam igitur placet tibi mea ratio, da nobis aliquid argumenti ad confabulandum. A. Imò tuum est dare, ut qui me lacesiveris. G. Æquum dicis ; redde nomina *Latine*, quæ tibi *Anglicè* proponam. B. Qua de re propones ? G. De supellectili. B. Tentabo respondere : modò nè plura quam decem proponas. G. Enumerabo in digitis, nè fortè numerum excedam. Audi igitur. B. Istic sum. G. *A cup-board.* B. *Abacus.* G. *A bench.* B. *Sella.* G. *A candlestick.* B. *Candelabrum.* G. *A caldron.* B. *Ahenum.* G. *A pair of bellows.* B. *Follis.* G. *A pillow.* B. *Pulvinar.* G. *A bolster.* B. *Cervical.* G. *Linen cloth.* B. *Linteum.* G. *A pot of earth.* B. *Olla.* G. *A flagon of wine.* B. *Oenophorum.* G. Errâsti semel. B. Ubi ? G. Dixisti *lintheum* pro *lodice.* B. Fateor : debeo tibi semel victoriam. G. Nunc vicissim propone ut redimas, si potes. B. Vis respondere de eduliis ? G. Ut liber. B. *Fresh meat.* G. *Caro recens.* B. *Pork.* G. *Suilla.* B. *Venison.* G. *Ferina.* B. *Venison of a wilde boar.* G. *Aprugna.* B. *Sod milk.* G. *Lac decoctum.* B. *Whey.* G. *Serum vel serum lactis.* B. *New cheese.* G. *Caseus recens.* B. *Pottage.* G. *Jus carniū.* B. *Fish sod.* G. *Piscis elixus.* B. *Pickle.* G. *Condimentum.* B. *Falleris.* G. Quid ergo est ? B. *Iminctus.* G. *Condimentum volo.* B. At ego nolo contendere. G. Quis contendit ? consulamus. B. Quin prius ludamus ; illud fiet posterius. G. Age ; fiet, ne mittamus ludendi occasionem.

## COLL. 54.

Moses, Olevitanus.

I Amdudum tædet me toties repetere lusus Scholasticos. O. Quid facies igitur ? M. Eamus in hortum nostrum. O. Quid agemus ? M. Ambulabimus, colloquemur, Dei beneficia in ejus operibus commemorabimus. O. Nihil sanè jucundius, sed interim petenda est à præceptore venia. M. Jam impetravi mihi, & item uni, quem vellem ducere

ducere. O. Bene res habet; eamus, ducente Deo. M. Precor, ut nos custodiat. O. Ego quoque idem precor tecum.

## COLL. 55.

*Sulpitius, Munchius.*

**I**mpetrâstis ludendi facultatem? M. Impetravimus. S. Ad quod usque tempus? M. Ad cœnam usque. S. Qui dederunt versus? M. Primi & secundi. S. Quid cæteræ classes? M. Primus quisque decurio trium proximarum classium pronuntiavit unam è sacris literis sententiam. S. Nonne precati estis, ut solemus? M. Precati, & quidem præfente ludimagistro: tu verò ubi eras? S. Iveram domum, à matre accersitus. M. Nunc igitur quid agere cogitas? S. Ludere sesquihoram; deinde ad studium me recipere. M. Vin' tu, ut tibi sim collusor? S. Quidni velim? M. Quo lusu nos exercebimus? S. Nullus est mihi jucundior pilâ palmariâ. M. Nec mihi quidem. S. Visamus igitur, an cæteri partes sortiti sint: nam si soli luderemus, minus esset voluptatis. M. Visamus sané.

## COLL. 56.

M. R.

**V**isne ire mecum? R. Quò properas? M. Ad lacum. R. Quid eó? M. Lotum pedes. R. I sané; nunc lotioni mihi opus non est. M. Sed interim parùm fabulabimur. R. Nè fabulari quidem nunc velim. M. Atqui utilis est confabulatio, dumtaxat de honestis rebus. R. At mihi utilior est ad valetudinem exercitatio corporis. M. Quid si mansero tecum? R. Prudenter facies, & nos pilâ palmariâ colludemus. M. Bene vertat Deus: maneo. R. Aliàs lotum unâ tecum ibo: cùm scilicet longius erit temporis spatium. M. Ad ludum igitur nos accingamus. R. Nulla est in me mora,

## COLL. 57.

*Vincentius, Bonus.*

**C**ur hodie non lusisti nobiscum? B. Non erat mihi ludendi spatium. V. Quid habes negotii? B. Non

B. Non absolveram pensum meum. V. Quod pensum?  
 B. Dimidium exemplaris restabat mihi perscribendum.  
 V. Perfecistine? B. Perfeci. V. Laudo tuam diligentiam: ludes aliàs otiosè. B. Cum voluerit Deus. V. Rectè dicis: nam absque voluntate ejus fieri nihil potest.

## COLL. 58.

*Primus puer, Præceptor, Secundus puer,  
 & Tertius.*

S. Alve, præceptor. Præ. Sit vobis salus à Christo. *Pueri.* Amen. P. Jamne repetivistis? Pri. Etiam, præceptor. P. Quis docuit vos? Pri. Subdoctor. P. Quid nunc vultis? Sec. Ut per te liceat nobis parumper ludere. Præ. Non est ludendi tempus. Ter. Non petimus omnibus, sed nobis parvulis tantum. Præ. Atqui pluit, ut videtis. Sec. Ludemus in pergula. P. Quo lusu? Sec. Aciculis, vel juglandibus. P. Quid mihi dabitis? Pri. Dicemus nomina. P. Quot dicetis singuli? Sec. Duo. P. Dicite igitur. Pri. *Paper*, Charta; *Ink*, Attramentum. Dixi. Sec. *A Book*, Liber; *A little Book*, Libellus. Dixi. Ter. *A Cherry*, Cerasum; *Walnuts*, Juglandes. Diximus. P. Quàm bellii estis homunculi? Ludite ad coenam usque. *Pueri.* Gratiàs agimus, præceptor.

## COLL. 59.

A. B.

U. BI nunc est pater tuus? B. Puto eum esse *Lugduni*. A. Quid illic agit? B. Negoriatur. A. Ex quo tempore? B. Ab ipso initio mercatus. A. Valde miror quid audeat illic commorari tot dies cum pestilentia tanta sit per totam urbem. B. Non est a sed mirandum. A. Itane tibi videtur? B. Ità profectò: fuit enim aliàs in majore periculo: sed Dominus Deus semper eum custodivit. A. Credo equidem, & adhuc custodiet. Sed quando est reversurus? B. Nescio; in horas expectamus. A. Reducat illum Deus. B. Ità precor.

G

COLL.

## COLL. 60.

*Elizeus, Delphinus.*

**Q**UA de re sic elatus es lætitiâ ? D. Pater meus modò advenit. E. Quid mea refert ? D. Imò plurimum ; quia nobis impetravit ludendi veniam. E. Ain' tu ? D. Vide pueros jam ludentes in area. E. Ludant sanè alii : ego studere malim quàm ludere. D. Nec minùs ego, sed in tempore : nam ( ut est in proverbio ) *Omnia tempus habent.* Unde & nos rectè monet Cato nosse,

*Interpone tuis interdum gaudia luri ;**Ut possis animo quemvis sufferre laborem.*

E. Vera sunt quæ dicis, fateor : sed interim omitte me, ut seriò studeam. D. Per me studeas licet ; nihil impedio : at ego hâc utar occasione. E. Uttere sanè.

## COLL. 61.

*Nomenclator, Quidam puer ex turba,  
item Alius.*

**H**Eus, pueri, heus, heus, heus ! **Q.** Quid clamitas ? **N.** Desistendum est à lusu. **Q.** Eho inepte, nondum quarta exacta est. **N.** Imò ferè semihora post quartam. **Q.** Cur non dedisti signum ? **N.** Quia tintinnabuli funis fractus est. **A.** Clama iterum ; sed attolle vocem. **N.** Heus, pueri, recipite vos omnes. **A.** Festinate, festinate, inquam ; urget præceptor. **N.** Desine clamare, accurrunt omnes.

## COLL. 62.

*Orontius, Quintus.*

**Q**uid ità lætus es ? **Q.** Quia venit pater. **O.** Ain' tu ? **Q.** Unde venit ? **Q.** *Lutetia.* **O.** Quando advenit ? **Q.** Modò. **O.** Jamne salutasti ? **Q.** Salutavi, cum ex equo descenderet. **O.** Quid ampliùs illi fecisti ? **Q.** Calcaria detraxi & ocreas. **O.** Minor te non mansisse domi propter ejus adventum. **Q.** Nec ille permisisset, nec ego vellem præsertim nunc, cum audienda est prælectio. **O.** Bene tibi consulis, qui temporis rationem habeas. Sed quid pater ? valétne ? **Q.** Rectè, Dei beneficio. **O.** Equidem gaudeo plurimum tuâ & ejus causâ, quòd salvus peregrè redierit.

dierit. Q. Facis ut amicum decet : sed cras pluribus verbis colloquemur. Vide præceptorem, qui jam ingreditur auditorium. O. Eamus auditum prælectionem.

## COLL. 63.

Marcus, Aaron.

**M**iseret me tui. A. Quid ita? M. Quod pennam tuam tam misere abutaris. A. Quomodo abutor? M. Quia pessime tractas eam in acuendo. A. Non est culpa mea, nè quid erres. M. Cujus igitur? A. Scalpelli mei, cujus acies obruta est. M. Scalpellum in culpa non est, sed tu ipse. A. Cur istud dicis? M. Quia debuisti vel scalpellum tuum acuire, vel aliud alicunde rogare commodato, saltem ad præsens negotium. A. Non audeo petere. M. Quid times? A. Nè mihi denegetur. M. Ecce tibi meum. A. Gratias ago. M. Uttere quantum voles, sed recte. A. Sciens non abutar. M. Nec sis posthac tam verecundus in petendo. A. Sic est ingenium meum; soleo libentius dare quam petere. M. Utinam multi essent tui similes. Sed tamen *qui libenter dat beneficium, is petere quoque liberè potest.* Sed ego te nimis detineo; perfice quod coeperas.

## COLL. 64.

A. B.

**C**UR non venit Petrus in scholam? B. Est occupatus. A. In quo negotio? B. In ligno struendo. A. Quis scis? B. Dictum est mihi. A. A quo? B. A patre ejus. A. Ubi eum vidisti? B. Fuit mihi obuius cum venirem. A. Vide nè mentiaris : nam ex illo quæram, si fortè occurrat mihi per vicos. B. Reperies sic ut dico.

## COLL. 65.

Sulpitius, Rogerus.

**C**UR hodie manè abfuisti? R. Occupatus eram. S. In quo negotio? R. In scribendis ad matrem literis. S. Quid opus erat illi scribere? R. Quia ad me scripserat. S. Ergo rescripsisti. R. Propriè loqueris. S. Unde tibi mi-



ferat literas? R. Rure; nempe ex villa nostra. S. Quando rus profecta est? R. Superioribus diebus. S. Quid agit ruri? R. Curat nostra negotia rustica. S. Quid potillimum? R. Præparat ea quæ sunt opus ad proximam vindemiam. S. Prudenter agit. R. Unde istud probares? S. Nam *omnibus in rebus adhibenda est præparatio diligens*. R. Quis te istud docuit? S. Quidam pædagogus dictavit è Cicerone. R. Quâ occasione? Cum admoneret, ut me diligenter pararem ad reddendam hebdomadam postero die. R. Profecto rectè monebat. S. Sed ad propositum revertamur. Non habetis villicum, qui curet ruri negotia vestra? R. Imò & villicum habemus, & famulos, & ancillas. S. Quid opus est illic tuæ matris operâ? R. Quâ melius novit providere rebus omnibus, quàm isti imperiti rusticolæ. S. Nihilne ampliùs? R. Sine me finire propositum. S. Putabam te absolvisse; perge. R. Etiam (ut ex patre audiui) *Præcipua cura domini requiritur in re familiari administranda*. S. Ergò pater tuus nunc potius deberet ad villam esse. R. Non potest. S. Quid prohibet? R. Quia totus est in arte sua occupatus. S. Majorem, ut opinor, ex ea re fructum percipit. R. Quis dubitet? S. Indè igitur fit, ut relinquat uxori omnem curam rei domesticæ. R. Omnino sic est. S. Sed mater quando est reversura? R. Vix ante perfectam vindemiam. S. Quid tu? non ibis vindemiaturum? R. A matre (ut spero) brevè accersar. Sed, quæso te, quid cogitamus? jam omnes in auditorium currunt. S. Bene res habet; curamus & nos, nè postremi simus.

## COLL. 66.

*Riparius, Amadæus.*

A. Udivistine horologium? A. Dudum sonuit. R. Dinumerasti horas? A. Dinumeravi. R. Quora est? A. Fere sesquiprima. R. Instat igitur prælectionis tempus: fac ut paratus sis. A. Ubi merendam peredero, ecce me paratum. R. Cur meridie non adfuiisti nobiscum?

A. Pro-



A. Prodiēram cum bona venia praeceptoris. R. Sed interrim sum tibi impedimento. A. Nihil impedis; nè voluisti quidem perdidisti interpellatione tuā. R. Bene habet; perge, sed matura.

## COLL. 67.

*Ligorius, Sarasinus.*

**F**ecisti ne officium tuum? S. Qua in re? L. In repetenda praedicatione. S. Nihil adhuc repetivi. L. Quid causa fuit. S. Expectabam dum rediret compar meus. L. Quod ille ivit? S. Domum. L. Quid eo? S. Petatum merendam. L. Quid si redibit serius? S. Nescio; fieri potest. L. Vis interea mecum repetere? S. Equidem non recusor. L. Secedamus igitur, ne quis molestus sit nobis. S. Profecto bene mones; nemo studere potest in tanto ambulatōrum strepitu & clamore. L. Aspice illic locum remotissimum, ubi nulli sunt ambulantes. S. Eamus illic.

## COLL. 68.

D. E.

**Q**UO properas? E. Eo coenatum; quid tu? D. Jam coenavi. E. Quotā horā? D. Quintā, ut fere solemus. E. Quid nunc ages? D. Reperam aliquid eorum quae reddere habemus crastino die. E. Ego didici ex pedagogo meo, Non esse tam citò à cibò studendum. D. Istud ego quoque didici; sed volo nunc edificare. E. Quid ergo facies? D. Ego, quasi animi causā, praedicationem particulatim aliquoties legam & perlegam. E. Quid tum? D. Ità paulatim fiet, ut sine cura, sine tædio, sine molestia, bonam partem praedicationis ediscam. E. Ista non satis intelligo, & certè videris mihi supra aetatem sapere. D. Non est res adeò difficilis, quin te docere possem, nisi ad coenam properares. E. De coena in tempore admones; ego igitur ejus causā me domum recipio. Vale. D. Ducat te Deus, & reducat.

PRÆFATIUNCULA, QUÆ  
septem proximis Colloquiis  
præfixa erat.

**N**E pueri nihil agendo discant malè agere, præsertim otioso sermone, pravisque aut ineptis colloquiis sese invicem corrumpentes; omnibus modis incitandi sunt, ut in schola dum præceptoris ingressum expectant, assuescant interea bini ternive id quod ab eo præscriptum fuerit simul repetere. Plurimum proderit hæc illis jucunda exercitatio, eosque interim ab otio, lascivia, multisque aliis rebus malis, quibus offenditur Deus, avertere poterit. Sed quia sine puerili colloquio ejusmodi repetitiones trahiari non solent, pueri autem ipsi, nisi instituti fuerint, nihil aliud quam barbare loquuntur; idcirco, ut Latine inter se loqui paulatim discant hac de re, hic aliquot breves colloquendi formulas proposuimus. Caterum in præceptoris diligentia situm erit, ut hæc ipsa colloquia discipulis aliquoties interpretetur, doceatque quomodo in his, & aliis ejus generis, (quæ tradere ipse poterit) sese & domi & in schola debeant exercere, ad idque illos identidem cohortetur. Ità fiet, progressu temporis, ut promptiores semper & alacriores eos habiturus sit ad ea mature reddenda quæ scripserit: hinc etiam consequetur, ut minore cum labore ac molestia docendum exequatur.

COLL. 69.

A. B.

**V**isne repetamus unâ? B. Quidnam? A. Id quod nobis præscriptum est. B. Equidem volo: sed quo genere repetendi utemur. A. Audiamus nos vicissim. B. Sic præceptor nos monet sæpe. A. Rectè monet; sed malè paremus. B. Uter incipiet? A. Ego, si ità tibi placet. B. Maxime placet; incipe igitur. A. Secundæ declinationis nomina his exemplis Latine declinantur,

Magister, Puer, Dominus, Lanius, Antonius, Regnum.

B. Quæ sunt hodie declinanda? A. Hesternum quidem est Lanius, hodiernum verò Antonius. B. Cur nos id repetimus

I.  
E  
o-  
m  
m  
r-  
i-  
ab  
ur  
us-  
n-  
a,  
li-  
in  
lis  
jus  
ola  
ia  
res  
inc  
adi  
bi  
ere  
Sic  
ale  
er.  
tic-  
em  
re-  
nus

perimus quotidie, quod pridie reddidimus? A. Quia sic præceptor jubet. B. Id satis scio: sed cur jubet? A. Ad confirmandam memoriam. B. Agè, declina *Lanius*.

A. Nom. Sing. *Hic Lanius*. Gen. *hujus lanii*, &c. ad finem usque.

B. Verte *Anglicè*. A. *Lanius, lanii*, g.m. *A Butcher*.

B. Declina *Antonius*.

A. Nom. Sing. *Hic Antonius*. Gen. *hujus Antonii*. Dat. *huic Antonio*, &c. ad finem usque.

B. Verte *Anglicè*. A. *Antonius, Antonii*, g.m. est nomen viri; *It is the proper name of a man*, *Anglicè Antony*. B. Cur dicis nomen viri? tu nondum es vir. A. Fateor; sed sunt alii *Antonii*, qui viri sunt. B. Utinam aliquando vir evadas. A. Evadam, Deo juvante.

B. Attende nunc, ut vicissim audias me. A. Isthic sum, dic audacter.

B. *Secundæ declinationis nomina*. A. Define; præceptor adest. B. Audio tussientem; desinamus, nè putet nos garrere.

## COLL. 70.

## C. D.

**M**OX aderit præceptor: repetamus. D. Quid opus est mihi repetitione? solus repetivi satis: omnia teneo memoriâ. C. Quid tum? *Quanto sæpius repetes, tanto melius tenebis*. D. Bene mones: habeo tibi gratiam.

C. Incipe: tempus abit.

D. *Quartæ declinationis*. C. Erras, *Daniel*: incipiendum est ab exemplo hesterni. D. Erravi, fateor. C. Dic igitur nunc rectè. D. Nom. Sing. *Hoc Sedile*. Gen. *hujus sedilis*, &c. ad finem usque.

*Quartæ declinationis nomina hoc exemplo declinantur,*

Nom. Sing. *Hic Sensus*. Gen. *hujus sensûs*. Dat. *huic sensui*. C. Hactenus; audio præceptorem.

## COLL. 71.

## E. F. G.

**Q**uid agis, *Francisce*? instat præceptoris adventus. F. Scilicet instat: nondum est semihora post secundam.

dam. E. Tamen non debemus interim tempore sic abuti: repetamus. F. Non stabit per me: ego enim sum paratus. E. Incipe igitur. G. Expectate parumper, quæso, ego sum vestræ decuriæ. E. Matura. F. Dicamus suum quisque casum ordine, ut interdum nos docet præceptor. E. Satîs est verborum, attendite. F. Quid aliud agimus?

E. *Tertiæ declinationis nomina his exemplis Latine declinantur*, Pater, Lumen, Rupes, Messis, Pars, Sedes, Vectigal, Laquear.

F. Nom. Sing. *Hæc Rupes*. Gen. *hujus rupis*. Dat. *huic rupi*. E. Acc. *hanc rupem*. G. Voc. *ô rupes*. Abl. *ab hac rupe*.

F. Nom. Pl. *Hæc rupes*. G. Gen. *harum rupum*. E. Errâsti, *Gabriel*, corrige erratum. G. Gen. *harum rupium*. E. Dat. *his rupibus*. Acc. *has rupes*. G. Voc. *ô rupes*. Ablat. *ab his rupibus*.

E. Verte *Anglicè*. G. *Rupes, rupis, g. f. A rock*.

E. Pone in oratione. F. Non est in libro nostro.

E. Sed præceptor docuit. F. Alta rupes, *A high rock*.

F. More patrio dicis, aspera fortiter, *high*. F. *An high rock*.

E. Nom. Sing. *Hæc messis*. G. Gen. *hujus messis*. E. Dat. *huic messi*, &c. usque ad finem hujus nominis; deinde sic pergunt colloqui.

E. Ambo errâstis. F. Erravi, fateor. G. Ego quoque: sed uter erit victus? E. Præceptor judicabit. F. Æquum dicis. E. Vultisne dicamus iterum, ad memoriam confirmandam? F. Quidni? G. Quid si præceptor interveniat? E. Quid tum? laudabit nos ore pleno.

G. Sed mutandus est ordo. E. Non est dubium? incipe, *Francisce*.

F. *Tertiæ Declinationis nomina, &c.*

## COLL. 72.

### H. I.

**V**isne repetere mecum? I. Cur tam citò? H. Nè ob-  
servator nos deprehendat garrientes, aut otiosos.  
I. Agè,

I. Agè, repetamus ; sed uter incipiet ? H. Ego, quia victor sum.

I. Dic igitur.

H. *Prudens*, nomen adjectivum, sic declinatur in genera :

*Hic Prudens*, g. m. *hæc prudens*, gen. f. *hoc prudens*, gen. n.

Idem nomen sic declinatur in casus :

Nom. Sing. *Hic hæc & hoc Prudens*.

I. Gen. *Prudentis*. H. Dat. *Prudenti*.

I. Acc. *Prudentem*, & *prudens*, &c. *ad finem usque*.

## COLL. 73.

L. M.

**C**UR tu es otiosus ? M. Non sum omnino. L. Quid agis igitur ? M. Cogito de lectione reddenda. L. Ego quoque id ago ; repetamus unâ. M. Fiat ; sed quam rationem tenebimus ? L. Age præceptoris partes, ego discipuli. M. Valde placet mihi conditio. L. Sed nè sis mihi austerior. M. Nè timeas, nòsti me satis. L. Novi. M. Declina *Lego* in modo infinito.

L. Infiniti modi tempus præsens & præteritum imperfectum, *Legere* ; præteritum perfectum & plusquam perfectum, *Legisse*. M. *Perge*. L. Sine me paulisper respirare, quæso, præceptor. M. *Agè*, sino ; satisne respirâsti ? L. Satis. M. *Perge* nunc. L. Futurum indefinitum, *Lecturum esse*. Gerundia, *Legendi*, &c. *ad finem usque*.

M. Gaudeo te rectè fecisse officium. L. Ego verò mihi gratulor. Sed est Deo gratia. M. Rectè dicis, utinam ex animo. L. Ex animo certè. M. Bene habet : desinamus : sentio præceptoris adventum. L. Eccum, adest.

## COLL. 74.

N. O. P. Q. R.

**H**Eus, pueri, nos hîc sumus quinque : repetamus hodiernum verbum, ut solemus coram præceptore. O. Nemo (ut opinor) contradicit. P. Quis contradiceret ?

ceret? nostra omnium res agitur. Q. Incipe igitur, Nicolae, qui primus sedes.

N. Operativi & Subjunctivi modi præsens, *Audiam.* O. *Audiat.* P. *Audiat.* Q. *Audiamus.* R. *Audiatis.* N. *Audiant.* O. Præteritum-imperfectum, *Audirem.* P. *Audires.* Q. *Audiret.* R. *Audiremus.* N. *Audiretis.* O. *Audirent.* P. Præteritum-perfectum, *Audiuerim.* Q. *Audiueris.* R. *Audiuerit.* N. *Audiuerimus,* &c. usque ad finem Verbi pergunt ordine.

# COLL. 75.

## S. T. V.

**H**IC dies nobis est feriatus, & jam sat is lusimus. T. Satis, opinor. S. Vultis ergo ut animi gratiâ conferamus de studiis nostris? T. Sanè mihi gratum feceris. V. Mihi verò gratissimum. T. Sed quid tractabimus? S. Tentemus declinare aliquod verbum Latine simul & Anglice. V. Incipe igitur, qui nos provocasti. S. Faciam, quando ita placet vobis. T. Audiamus.

S. Indicativi modi præsens tempus, *Doceo, I teach:* doces, *thou teachest:* docet, *he teacheth.* Pl. *Docemus, we teach:* docetis, *ye teach:* docent, *they teach.*

T. Præteritum-imperfectum, *Docebam, I did teach:* docebas, *thou didst teach:* docebat, *he did teach.*

Pl. *Docebamus, we did teach:* docebatis, *ye did teach:* docebant, *they did teach.*


S. Præteritum-perfectum, *Docui, I have taught:* docuisti, *thou hast taught:* docuit, *he hath taught.*

V. *Docuimus, we have taught:* docuistis, *ye have taught:* docuerant vel docuere, *they have taught.*

S. Aliter Anglice, *I have taught, thou hast taught, he hath taught, we have taught, ye have taught, they have taught.*

T. Præteritum-plusquam-perfectum. S. *Docueram, I had taught:* docueras, *thou hadst taught,* &c. Sic pergunt quatenus placet.





# COLLOQUIORUM SCHOLASTICORUM

## LIBER II.

### COLLOQ. 1.

*Cornelius. Marialis.*

**Q**uid legis? M. Literas. C. A quo? M. A patre. C. Quando accepisti? M. Heri vespere. C. Quis attulit? M. Nescio. C. Nescis? Quis tibi reddidit eas? M. Ancilla quædam à caupone. C. Unde sunt datæ? M. *Lutetiâ*, credo. C. Quo die? M. Nondum licuit inspicere. C. Nempe ego te interpellavi. M. Parùm refert, non adeò sum occupatus. C. Agè, perlege tuam Epistolam, ego interea studebo. M. Ego quoque mox idem faciam.

### COLL. 2.

*Musicus, Heraldus.*

**Q**UO in statu sunt res vestræ *Lugdunenses*? H. Nescio; jampridem nihil audivimus. M. Nihilne scripsit frater tuus? H. Post menses duos nihil literarum misit, quod viderit pater. M. Fortasse ægrotat. H. Minime verò, nam tabellarii sæpe nobis salutem nunciant verbis ejus, M. Libenter audio illum rectè valere: valde enim diligo, quia fuit mihi suavissimus condiscipulus. H. Ille (ut opinor) te vicissim diligit. M. Id verò mihi non est dubium. Sed nos hora vocat; eamus in auditorium. H. Maturemus. Jam recitatur catalogus.

### COLL. 3.

*Observator, Briscuntellus.*

**D**Esinite, ô pueri, garrere, absente magistro,  
Verba quibus summus læditur ille Pater.

*De studiis potiùs tractate & rebus honestis :*

*Discite sermones aptaque verba loqui.*

*Discite & inter vos reddenda revolvere sæpe :*

*Doct̃or enim pueris semper adesse nequit.*

*Discite sectari vestigia certa bonorum :*

*Otia vos fallant blanda, cavete, precor.*

*En, ego præmoneo, vos nè deleſcet abuti*

*Tempore, nè tergum verbera dura premant.*

*Ecce iterum vobis morum prædico magister :*

*Si quis erit caſus, nè mihi det vitio.*

*B. Desine plura loqui, nemo parere recusat :*

*Eſt monitor nobis optimus ille Pater,*

*Illiusque Patris natus, cui nomen Ieſus,*

*Et qui nos renovans Spiritus intus alit.*

*Ob. Quem mihi ſperâſſem tam reſpondere paratum ?*

*Quis puer Angelicos mittit ob ore ſonos ?*

*O quàm te memoriẽ, noſtræ doctiſſimæ classi !*

*Nam tibi divinum carmen ab ore fluit.*

*Non ſum tam felix, ut fundam ex tempore verſus :*

*Sed modò quæ dixi præmeditatus eram.*

*B. Si meditatus eras, quæ nunc tam fundis aperte*

*Caſtaliõs latices ? qui furor iſte novus ?*

*Ob. Nam tua me tantis moverunt carmina flammis,*

*Ut mihi nunc videar poſſe movere feras.*

*B. Sed cur immeritum tantis me laudibus effcis ?*

*Eſt tribuenda uni gloria ſumma Deo.*

*Atque utinam eloquium nobis ſpatiũque daretur,*

*Et noſtra in laudes ſolvèret ora juas.*

*Sed quia tempus adeſt ut voce & mente precemur,*

*Iaque jubet doct̃or, deſino plura loqui.*

#### COLL. 4.

*Obſervator, Puer.*

**Q**uid agis ? P. Scribo. O. Quid ſcribis ? P. Sententias.

O. Quas ? P. Ex novo Teſtamento. O. Bene facis : unde

haviſti ? P. Hypodidaſcalus dictavit nobis. O. Quan-

do ? P. Heri. O. Quotà horà ? P. Meridie. O. Ubi ? P. In

area

area. O. Qui aderant? P. Omnes domestici, præter primos & secundos. O. Ubi erant illi? P. In aula communi. O. Quid agebant? P. Disputabant. O. Vale, & perge scribere.

## COLL. 5.

*Observator, Pueri garrientes.*

**Q**uid vos hîc agitis, pueri? Mihi videmini garrirè, & nugas agere. *Quidam puer.* Longè falleris: nam repetimus unâ. Ob. Qua de re? P. De *verbis anomalis*, id quod reddendum est horâ terciâ. Ob. Bene facitis. P. Vis audire nostrum colloquium? Ob. Imò pergite; majus opus moveo; volo tendere laqueos Picis & Graculis. P. In area multos ad solem invenies. Ob. *Retibus est illic præda parata meis.*

## COLL. 6.

*Observator, Pueri garrientes.*

**A**t at! ecce nunc capti estis: non fatemini? *Quidam puer.* Certè fatemur ingenuè: sed non dicebamus, mala verba. Quæso te, mi *Nicolae*, nè velis notare nos. Ob. Quid garriebatis? audiui nescio quid de jentaculo. P. Illud est; loquebamur de jentaculo maturino, quia famulus non dederat nobis in tempore. Ob. Puto id fuisse; nec certè est valde magnum malum, nisi quòd sunt otiosa verba. P. Sed *Latine* loquebamur. Ob. Audiui; sed non erat fabulandi locus. Nam (ut scis) hoc pusillum temporis à merenda debet vobis esse valde pretiosum, cum sit dicatum studio; scilicet ut se diligenter quisque præparet ad reddenda magistris ea quæ præscripserint: nonne verum dico? P. Certè verum dicis; debuissimus legere simul de *Testamento* quæ mox oportebit reddere: sed ignosce, precor, suavissime *Nicolae*: posthac erimus prudentiores, & officium nostrum diligenter faciemus. Ob. Si sic feceritis, Præceptor vos amabit, tanquam cinata sua intestina. Nonne videtis quemadmodum diligit bonos pueros & studiosos? nec amat solum, sed etiam laudat & præmiolis afficit. P. Ita sci-

scimus, & quotidie experimur. O. Ergò mementote, & promissa facite. P. Tacebis igitur hanc culpam? O. Tacebo; sed eâ lege, ut caveatis recidere. P. Cavebimus, *Christo favente.*

## COLL. 7.

*Nomenclator, Puer.*

**U**BI est frater tuus? P. Modò ivit domum. N. Quid eò? P. Petium nobis opsonium. N. Quid nunc opus est opsonio? P. In merendam. N. Annon habetis in arca vestra? P. Non. N. Quid ità non? P. Quia mater non solet nobis dare opsonium, nisi in præsens tempus. N. Nempe quia novit vos esse gulosos. P. Quomodo gulosi sumus? N. Quia fortasse uno convictu devoratis quod in tres datum fuerat. P. Tace. N. Ego dicam præceptori, fratrem tuum nihil aliud quàm discurrere. P. Atqui prodiere non solet, nisi cum bona venia præceptoris. N. Atqui præceptorem fallit. P. Quomodo fallit eum? N. Non enim mens est præceptoris, ut ter quotidie prodeat. P. Sine illum venire, videbis quid tibi respondeat. N. Imò videat quid præceptori respondeat.

## COLL. 8.

*Pastor, Languinus.*

**F**RATER tuus venítne *Lugduno*? L. Jam venit herì ante meridiem. P. Nihilne literarum tibi attulit? L. Nihil. P. Quid igitur nunciavit? L. Prospera omnia. P. De patre quid narrat potissimum? L. Ait illum, Dei beneficio, jam planè febris carere, & paulatim convalescere. P. Gaudio sanè; Desúmque precor, ut pristinam valetudinem brevi recuperet: sed cur ille (ut solet) nihil ad te scripsit? L. Negat frater eum potuisse scribere. P. Quamobrem? L. Quia nondum satis erat confirmatus. P. Nihil mirum, cum tamdiu tam graviter ægrotaverit: sed ille nihil ad te misit? L. Imò pecuniam. P. Euge; nullus est jucundior nuncius. L. Ità ajunt. P. Tu verò sic respondes, quasi fabulam audias. L. Quin pejús audio. P. Quidnam?

L. Me-

L. Merum mendacium. P. Egone mentitus sum? L. Non dico te esse mentitum: sed falsum dixisti. P. Ego quid dicas non intelligo. L. Dabo operam ut intelligas. P. Obsecro te. L. Si nullus est jucundior nuntius, quam de alata nobis pecunia, quid ergo est Evangelium Christi? quis est jucundior nuntius quam gratia Dei, quam Christus attulit nobis per Evangelium? P. Fateor nihil esse jucundius Evangelio, his duntaxat qui credunt ei, & ex animo amplectuntur. L. Equidem sic intelligo. P. At ego loquebar de humanis & terrenis rebus, tu verò ad cœlum statim ascendisti. L. Ità solent boni concionatores. P. Non putabam te esse Theologum maturum. L. Nihil dixi nisi quod est tritum & in medio positum. P. Utinam illud adeò vulgare & protritum foret, ut omnes in Christum crederent. L. Nunquam credent omnes. P. Quid prohibet? L. Quia multi sunt vocati, pauci verò electi, sicut Christus ipse testatur. P. Sed nè te diutius teneam, potesne facere ut fratrem tuum paucis conveniam? L. Vix possum. P. Quid ità? L. Nam habet à patre nostro mandata plurima, in quibus curandis totus est occupatus. P. Nonne coenabit domi apud vos? L. Coenabit, opinor. P. Ibo igitur sub horam coenæ. L. Veni, precor, & eadem operam nobiscum coenabis. P. Non recuso. L. Interim vale; sed fac memineris adesse temporis. P. Quotà horà? L. Ante sextam. P. Hora est mihi commodissima.

## COLL. 9.

*Vignolus, Angelinus.*

Rogo te, *Angeline*, compinge mihi hanc chartam. A. Quid me rogas? Non est ars mea. V. Et tamen sæpe compingis aliis. A. Quot habes schedas? V. Octo: sed jam sunt complicatæ, tantum restat insuere membranæ. A. Quid dabis, si tibi compegero? V. Nihil habeo quod possum dare: nam pecunia nulla mihi est. A. Ergo quære tibi alium opificem; non enim gratis faciam. V. Mi *Angeline*, tu es tam bonus, denegabis mihi rem tantillam? A. Scin' tu quid habet proverbium? V. Quod proverbium



bium dicis. A. *Manus manum fricat.* V. Quid hoc sibi vult? A. Da aliquid, si velis accipere. V. Si quid haberem, certè libenter darem. A. Cedò merendam tuam. V. Merendam? ah me miserum! quid ederem? Matrem dare pileum, si auderem. A. Merenda tua parva res est. V. Sed vehementer esurio. A. Quid causæ est? V. Quia nihil prandi, nisi frustum panis & tres aut quatuor juglandes. A. Eho, quid causæ fuit? V. Quia mater domi aberat. A. Quis ergò tibi dedit merendam? V. Ipsa. A. Atqui dicebas eam abfuisse. V. Verum est; aberat enim tempore prandii, nec rediit, nisi paulò ante merendam. A. Nihilne edisti domi, antequam in ludum venires? V. Nihil. A. Cur non? V. Quia timebam non adesse in tempore. A. Tintinnabuli tonitus te satis admonere debet. V. Sed rarò audimus à nostris ædibus. A. Quid ita? V. Quia longè nimis ab hac schola distant. A. Suntne vera ista omnia quæ mihi narras? V. Vera profectò, *Angeline.* A. Agè, da mihi tuam chartam; ego tibi compingam elegantem libellum: tu interim ede merendam tuam. V. Ego petam à matre sextantem, quem dabo tibi. A. Cave petas, nihil volo: quin potiùs darem tibi, si egeres. V. Ago tibi gratias. A. Nonne putabas me seriò petere abs te merendam? V. Profectò sic putabam. A. Atqui dicebam joco. V. Quamobrem? A. Ut paulisper audirem te *Latine* fabulari. Nam quòd bene discas gaudeo. Quanti emisti chartam hanc? V. Dedi pro codice assen cum semisse. A. Non emisti malè, bona est, sed non rectè complicasti. Habes membranam? V. Ecce tibi. A. Bene res habet; ego citiùs confecero, quàm tu merendam perederis. V. Habebo tibi maximam gratiam, mi *Angeline.* A. Honestè loqueris: sed memento, fili, ut semper vivas in timore Dei, diligenter obedias matri, sis frequens in schola, diligens in studio, nè verferis cum pravis ac dissolutis; denique, quibus poteris benefacito, quo modo vides me fecisse tibi: intellextin? V. Optimè. A. Fac igitur ut sæpe recorderis. V. Faciam, Deo volente. A. Ede nunc otiosè.



## COLL. IO.

*Divinus, Albus.*

**Q**uid tibi dedit mater in merendam ? A. Vide. D. Caro est ; sed quænam ? A. Bubula. D. Utrùm recens, an falsa ? A. Est bubula salita. D. Utrùm pinguis, an macra ? A. Eho inepte, non vides macram esse ? D. Annon malles esse vitulinā, aut vervecinam ? A. Utraq; bona est : sed in omni genere sapit mihi hoedina, præsertim assā. D. Hem ! delicatule, jāmne palatum tam doctum habes ? A. Dico ut sentio : nec enim est mentiendum. D. Absint à nobis mendacia ; sumus enim filii Dei, & Christi fratres, qui est ipsa Veritas, ut ipse de se loquens testatur. A. Sed ad rem. Suillā quoq; vescor libenter, modico sale aspersā, & bene coctā. D. O mirificam Dei gratiam, qui dat nobis tot opsoniorum genera, & tam bona ! A. Quot putas esse hac in urbe pauperes, qui solo pane hordeaceo victitant, neque tamen ad saturitatem ? D. Non dubito multos esse, tantā præsertim annonæ caritate. A. Itaque nos in tanta bonarum rerum copia, quantas Deo gratias agere debemus, quas laudes illi dicere ? D. Ejus igitur beneficia magnifice ubique prædicemus : atque interim precemur, ut pauperum suorum misereatur inopiæ. A. Utinam ipse corda nostra suo Spiritu ad eam rem penitus afficiat ? D. Itā precor.

## COLL. II.

*Erasmus, Bessonius.*

**Q**uid rides ! B. Nescio, E. Nescis ? magnum signum stultitiæ. B. Me igitur stultū vocas ? E. Minimè verò ; sed dico tibi argumentum esse stultitiæ, cum quis ridet & ridendi causam nescit. B. Quid est stultitia ? E. Si diligenter evolvas Catonem tuum, istud quod quæris invenies. B. Nunc non habeo meum Catonem, & volo aliam rem agere. E. Quod habes negotiū ? B. Habeo ediscere aliquid de rudimentis. E. Interim quæris fabulari, ineptule ? B. Dic mihi (quæso) de stultitia in Catone. E. *Stultitiam simulare loco, prudentia summa est.* Annon hæc didicisti ? B. Imò ; sed non recordabar. E. Cum domi eris,

inspice librum tuum. B. O quantas gratias ago tibi ! Ego proponam alicui istam quæstionem, qui non potuerit mihi respondere, & sic erit victus. E. Tace, puer, tace & stude, nè vapules. B. Non multum curo : ego ferè teneo prælectionem. E. Nisi taceas, dicam observatori, qui te statim notabit. B. Mane, mane : nihil dicam ampliùs. E. Sed memento id quod dixi tibi. B. Quid est ? E. Nè rideas unquam sine causa. B. Sed ridere non est malum. E. Non dico istud. B. Quid igitur ? E. Stultum est sine causa ridere. B. Nunc intelligo. E. Recordare sæpe.

## COLL. 12.

*Gleophilus, Melchisedec.*

**E**Cquid habes novi ? M. Accepi literas à patre, qui *Lugduni* habitat. C. Quando accepisti ? M. Heri sub noctem. C. Quis attulit ? M. Piscarius. C. Quidnam intellexisti ex istis literis ? M. Omnia bene illuc habere, quod ad Evangelium pertinet. C. Verane prædicas ? M. Expecta, literas ipsas ostendam tibi à prandio. C. Est profectò, quòd nostris fratribus gratulemur. M. Scilicet, quòdq; Deo nostro gratias maximas agamus. C. Id quidem præstare debemus omni tempore ; sed nunc maximè, cum audimus ea, quæ ad gloriam ejus præcipuè pertinent. M. Utinam hoc semper habeamus in memoria ! C. Communicabis igitur mecum tuas literas ? M. Ut promisi. C. Ergò post prandium. M. Etiam dubitas ? C. Interea vale. M. Vale, & salve, *Gleophile,*

## COLL. 13.

*Israel, Matthæus.*

**E**Stne domi frater tuus ? M. Cur istud rogas ? I. Pater meus volebat eum convenire. M. Non est in hac urbe. I. Ubi igitur ? M. Peregrè profectus est. I. Quando ? M. Nudius tertius. I. Quonam ivit ? M. *Lutetiam*. I. Quà iter facturus est ? M. *Lugduno*. I. Utrum pedes an eques ivit ? M. Ivit in equo. I. Quando est rediturus ? M. Nescio. I. Sed quem terminum constituit illi pater ? M. Jussit ut hîc adesset ad viceßimum hujus mensis diem. I. Ducat illum Deus, ac reducat. M. Ità precor.

## COLL. 14.

*Dæus, Ballinus.*

**Q**uando profecturus es domum? B. Cras Deo juvante. D. Quis iussit? B. Pater. D. Quando autem iussit? B. Ad me scripsit superiore hebdomade. D. Quo die literas accepisti? B. Die *Veneris*. D. Quid continebant præterea literæ? B. Omnes rectè valere, proximis diebus initiū fore vindemiæ. D. O fortunatum, qui vindemiatum properas! B. Vis dicam patri meo, ut te accersat? D. Quam gratum mihi faceres! sed vereor ut nolit. B. Imò gaudebit, cum propter nostram conjunctionem, tum verò quia & *Latine* colloquendo nos exercebimus, & de studio unà interdum conferemus. D. Oh, gaudio totus exilio! Amabo te, id cura, mi animule. B. Senties: interim Deum precemur, ut dicta & consilia nostra vertat in gloriam sui nominis. D. Bene mones, & certè ità expedit facere.

## COLL. 15.

*Aurelius, Lambertus.*

**S**iste parumper gradum *Lamberte*; quò properas? L. Retà domum. A. Quid eò? L. Mater me vult paucis convenire. A. Nescis quamobrem? L. Nescio, nisi fortè ut vestimenta hybernâ mihi facienda curet. A. Istud est verisimile; jam enim instat hyems. L. Jam visa sunt gelicidia, & glacies etiam alicubi. A. His diebus vidi in foro montanos quosdam, qui dicebant magnam vim nivium decidisse superiore hebdomade, cum hîc interea lentas pluvias tantum videremus. L. Ego quoque id ipsum audivi domi nostræ ex rusticis, qui triticum nobis advexerant. Sed cogor abrumpere sermonem, nè mihi irascatur mater. A. Sed heus tu, mi *Lamberte*, adfer mihi domo aliquot uvas: nam amplissima fuit vobis vindemia. L. Adferam (ut spero) utrique nostrum assatim, nisi siquid fortè mater irata est mihi. A. Istud avertat Deus.

## COLL. 16.

*Pelignus, Bartholomæus.*

**Q**uoniam is tam celeriter? B. Ad consorem. P. Ego quoq; unà tecū. B. Rogasti veniam? P. Non rogavi,  
D 2 sed

sed tantisper expecta me, dum eo rogatum. B. Festina igitur. P. Mox rediero. Redii : eamus nunc jam. B. Quo vultu te præceptor excepit ? P. Hilari sanè. B. Eodem tunc quoque exceperat. B. Non solet irasci nobis, nisi illum adeamus intempestivè. P. Quotusquisque id non aggrè fert ? P. Etiam nos, qui pueri sumus, sæpius irascimur condiscipulis, cum studia nostra quantulacunque sunt, interpellant : sed jam desinamus ; optimè tontorem ante officinam video. B. Euge, nulli sunt igitur expectantes : ità fiet, ut minùs diu moremur.

## COLL. 17.

A. B.

**Q**uò nunc solus abis ? B. Semper à versibus aliquid auspicias. A. Facile est carmen incipere, deducere non item. Sed dic, quò nunc is ? B. Rectà in portum. A. Quid in portu habes negotii ? B. Viso ecquid alimenti mihi advectum sit. A. Vis me tibi comitem ? B. Imò etiam ducem, si tibi ità videtur. A. Nunquam dux esse didici, sed sæpe egi comitem. B. Nihil ad rem pertinet pluribus verbis hìc fabulari ; eamus unà. A. Eamus sanè : confabulante licebit ampliùs ambulando in ripa ~~hìc~~, si navis nondum appulsa sit. B. Quid si jam appulsa ? A. Tamen deambulare satis diu poterimus, dum exonerabitur.

## COLL. 18.

*Nomenclator, Puer.*

**U**BI est Petrus ? P. Ivit foràs. N. Quò ? P. Abiit nus. N. Quicum ? P. Cum patre. N. Quis venerat accersicum ? P. Patris famulus. N. Quando est in urbem rediturus ? P. Hinc (ut dixit) ad octavum diem. N. A quo petivit abeundi veniam ? P. Ab hypodidascales. N. Cur non potiùs à ludimagistro ? P. Ad negotia prodierat. N. Sat habeo.

## COLL. 19.

*Richardus, Niger.*

**Q**uò ascendis ? N. In cubiculum nostrum. R. Quid eò ? N. Petitù thecam scriptoriam. R. Adfer mihi cingulum.

lum eâdem operâ. N. Ubi est? R. Super arcam meam.  
N. Adferam: sed tu me hâc expecta. R. Nusquam moveo.

## COLL. 20.

*Leninus, Gerardus.*

**H**Eus! *Gerarde.* G. Quid vis? L. Accerseris. G. Quis me vocat? L. Frater tuus. G. Ubi est? L. Præ foribus te expectat. G. Certò scis esse fratrem meum? L. Quidni sciam? vidi illum, & sum alloquutus. G. Viso sane quid sit.

## COLL. 21.

*Putaneus, Vilastus.*

**N**Efcis vetitum esse, nè submissè loquamur inter nos? V. Quidni scirem, cùm præceptor tam sæpe nobis inculcet ejus rei causas? P. Cur igitur modò faciebas contrâ? V. Quia *Isaias* ita me cœperat alloqui. P. Quid tum? debuisti illum admonere, non imitari. V. Debui; sed tunc mihi non venit in mentem. P. Sed interim notandus es. V. Minimè verò: nisi vis esse ipso præceptore severior. P. Dic mihi causam. V. Quia præceptor vetat quempiam notari, qui sponte delictum agnoverit: modò nè tale sit factum, quod verbo Dei interdictum sit. P. Nonne à Deo præceptum est, ut parentibus obediamus? V. Illud est quintum decalogi præceptum. P. Atqui (ut habemus in Catechismo) præceptum illud patet latius; Nam parentum nomine præceptores complectitur, & magistratus, & denique omnes, quibus Deus ipse nos subjecit. V. Non equidem nego vera esse quæ narras: sed malo præceptorem consulere, quàm tecum disputare; alioquin in majus malum me induceres, quod est contentionis vitium, multò magis à præceptore vetitum. P. Æquum dicis: memineris igitur præceptorem admonere, cùm rationes à nobis exiget. V. Nè putes me obliturum, præsertim cùm res mea agatur.

## COLL. 22.

*Rossetus, Ferrerius.*

**U**Nde venis? F. E foro. R. Quid illic audisti novi? F. Nihil. R. Nihilne? F. Prorsus. R. Mirum est te nihil



audisse de bello, aut de cæteris rebus *Anglicis*. F. De iis quæ nihil ad me pertinent, non soleo percontari. R. Eſto, ſed tamen aliquid vel in tranſitu audiri ſolet. F. Nè mentiar, intellexi non nihil in tranſitu. R. Narra, quæſo. F. Nunc non eſt narrandi ſpatium. R. Cur non? F. Eſt mihi aliò properandum. R. Quonam? F. Nihil ad te. R. Quando igitur reviſes nos, ut ex te iſtud audiamus? F. A prandio, ſi licebit per otium. R. Amabo te, ſac liceat. F. Dabo operam: ſed me detines diutiùs. Vale.

## COLL. 23.

A. B.

**U**Nde venis? B. A foro. A. Quis te illuc miſerat? B. Mater. A. Quid egisti in foro? B. Emi pyra. A. Neſcis nobis veritum eſſe emere fructus aliquos? B. Quis iſtud ignorat? nam dictum eſt palàm in aula. A. Quis igitur auſus eſt emere pyra? B. Mater dederat mihi ſextantem, ut mihi emerem in merendam. Quid mali feci, ſi parvi matri?

## COLL. 24.

*Franciscus, Dionysius.*

**U**BI fuiſti his diebus? D. Rure. F. Quo in loco? D. In villa noſtra. F. Quid verò illic? D. Miniſtrabam patri. F. Quid verò ille? D. Paſtinabat vites noſtras. F. Quando illinc rediſti? D. Heri tantùm. F. Quid pateri? D. Unà mecum reverſus eſt. F. Bene factum: ſed quo nunc iſ? D. Rectà domum. F. Sed quando repetes ludum literarium? D. Cras, juvante Deo, aut ſummùm perendie. F. Ergò interim vale. D. Et tu vale, mi *Franciſce*.

## COLL. 25.

*Fontetius, Curtetus.*

**Q**uando rediturus eſt *Blafius*? C. Non certò ſcio: fortasſe die craſtino: ſed cur iſtud rogas? F. Qui ſecum abſtulit catalogum, & præceptor iralcetur, ſi nemo ſit, qui recitet. C. Relinque mihi iſtam curam: habet catalogi exemplum. F. Recitabis igitur? C. Recitabo. F. Bene facies, & noſter *Blafius* referet gratiam, ſiqua offeret occaſio.

## COLL. 26.

Gabinus, Furnarius.

**Q**uod est tibi domiciliū? F. Paterna domus. G. Unde nunc venis? F. Domo. G. Ubi prandisti? F. Domi. G. Ubi coenabis? F. Domi vestræ, ut spero. G. Qui scis? F. Pater ipse tuus hodie me invitavit. G. Ubi illum vidisti? F. Domi *Varronis*. G. Quod illic erat tibi negotium? F. Pater me miserat nunciatum aliquid. G. Scire etiam velim ubi sis cubiturus. F. Domi fratris. G. Quid habes negotii cum fratre tuo? F. Dixit sorori nostræ, te velle convenire me otiosē. G. In qua domo habitat? F. In quadam conductitia. G. Eho, nullāne habet propriam domum? F. Habet quidem, sed eam locat quibusquam inquilinis. G. Locat igitur domū propriam, & conducit alienam? F. Scilicet, ut ex me audis. G. Quanti locat? F. Octodecim aureis *Italicis*, quos nunc *Pistoletos* vocant. G. Cur illam non potiùs habitat? F. Quia sua non est in loco satīs commodo, sive (ut ita loquar) mercatorio. G. Sed illam alienam quanti conducit? F. Longè pluris. G. Quanti igitur? F. Quinque & viginti. G. Cara est habitatio. F. Carissima; sed quid agat? loci commoditas id facit. G. Age (ut aliquando tandem finiamus) dic precor, scisne ubi cras futurus sis? F. Domum revertar, ut inde in scholam me conferam, siquidem permiserit Dominus. G. Cur addis *Si Dominus permiserit*? F. Quia, nisi permissu Dei, ne domo quidē exire possumus. G. Istud audiui sæpe ex præceptore. F. Cur ergo rogabas? G. Quia nunquam nimis dicitur quod benè dictum fuerit, præsertim ubi de rebus divinis agitur. F. Istud quoq; ex præceptore didicimus. G. Verum, sed utile est talia sæpe repetere ad memoriam exercendam. F. Vide quò nos sentim adduxerit tua prima interrogatio. G. Tantum volebam paucis verbis tecum jocari. F. Age, quoniam nunc satis animum exercuimus, non vis etiam corpus exercere valetudinis causā? G. Quidni velim? F. Eamus igitur lusum pilæ palmariæ: nam eo lusu scio te delectari. G. Delector sanè, sed nunc pilam non habeo. F. Ecce tibi: tequere me. G. Ego te sequor libens, tu me bene ducito.

## COLL. 27.

*Creditor, Debitor.*

**Q**uoad patris reditū expectas? D. Hinc ad diem octavum. C. Quī scis diem? D. Ipse pater ad me scripsit. C. Adventus ejus (ut spero) te ditabit. D. *Græso* ditior ero, si bene nummatus venerit. C. Tunc mihi mutuum reddes? D. non est quòd dubites, quin, si tibi opus erit amplius, non modò reddam mutuum, sed etiam referam gratiam. C. Quomodo? D. Pecuniam mutuam vicissim dabo. C. Nihil opus erit, spero. D. At nescis quid possit accidere. C. Tempus est brevissimum. D. Non eò dico quòd tibi vellem ominari malum. C. Quicquid ominentur homines, Deus clavum tenet. D. Sed quid cessamus recipere nos in auditorium? C. Opportunè admones.

## COLL. 28.

*Picus, Micuardus.*

**Q**uando rediisti domo? M. Tantùm redeo. P. Ubi est frater tuus? M. Mansit domi. P. Cur mansit? M. Ut pranderet cum patre. P. Tu verò, cur etiam non mansisti? M. Jam pranderam cum patre. P. Quis vobis ministrabat? M. Ancilla. P. Quid mater? ubi erat? M. Etiam domi sed occupata. P. Qua in re? M. In recipiendo tritico, quod nobis advectum fuerat. P. Quando redibis domum? M. Cum accersar à patre. P. Quo die istud erit? M. Fortasse hinc ad quatuor dies. P. Cur vos tam sæpe commeat? M. Sic volunt parentes. P. Quid agitis domi? M. Quod jubemur à parentibus. P. Sed interim perit vobis studiorum tempus. M. Non omnino perit. P. Quid igitur? M. Quoties pater non est necessariò occupatus, omnibus horis exercet nos, manè, ante & post prandium; ante coenam, à coena satis diu, postremò etiam antequam cubitum eamus. P. Quibus rebus vos exercet? M. Exigit à nobis ea potissimum, quæ totà hebdomade in scholâ didicimus; themata nostra inspicit, ac de iis nos interrogat; sæpe dat nobis aliquid modò Latinè, modò Anglicè describendum; interdum etiam nobis proponit brevem sententiam vernaculo sermone, quam Latinè vertimus; interdum contrà jubet

jubet aliquid Latinum Anglice reddere; postremò, ante cibum & post, semper ex Bibliis Anglicis aliquid legimus, idque totà paterne familià. P. Nihilne de Catechismo interrogat? M. Id facit omni die Dominico, nisi forte domo absit. P. Mira narras, si modò vera. M. Imò sunt longè plura quam tibi narravi: sum enim oblitus morum civilitatem, de qua etiam admonere nos solet in mensa. P. Cur pater vester tantum sumit laborem in vobis docendis? M. Ut sic intelligat num in schola operam ludamus, & tempore abutamur. P. Mira hominis diligentia, atq; adeò prudentia! O quàm devincti estis Patri coelesti, qui talem patrem in terra dedit vobis! M. Faxit ille, ut hoc & cætera ejus beneficia nunquam obliviscamur. P. Bonum & pium est istud optatum; cura, ut habeas non modò in ore, sed in animo etiam magis. M. Quòd meram fideliter mones habeo tibi gratiam. P. Bene monendi officium debemus omnibus, sed maximè fratribus. M. Fratribusne igitur solis? P. Eos potissimum fratres hinc dico, qui ex fide in Christum nobis conjuncti sunt. M. Rectè judicas: sed viso num frater domo tandem reverterit; nam ad cessandum promptus est plus satis.

## COLL. 29.

*Myconius, Petellus.*

**S**erione scribis, an tu ineptis? P. Equidem scribo seriò; cur enim tempore abuterer? Tu verò cur istud rogas? M. Quia vidi aliquando cùm bene scriberes. P. Scribo interdum melius. M. Quis sit igitur, ut nunc tam scribas malè? P. Desunt mihi bene scribendi adjumenta. M. Quæ tandem? P. Bona charta, bonum atramentum, bona penna. Nam hæc mea charta (ut vides) miserè perfluit, atramentum est aquosum & subalbidum, penna mollis & malè parata. M. Cur ista omnia maturè non providisti? P. Pecunia mihi deerat & nunc etiam deest. M. Incidisti in illud vulgare proverbium. *Cui deest pecunia, haec desunt omnia.* P. Sic agitur mecum. M. Sed quando te speras accepturum? P. In mercatu proximo pater ad me missurus est, aut ipsemet venturus. M. Ego te interea

juvare volo. P. Siquidem id potes, magno beneficio me affeceris, M. Accipe hos sex asses mutuò ad chartam & cætera comparanda. P. Quàm verè dictum est illud, *Amicus certus in re incerta cernitur* ! sed quid te impellit ut mihi ultrò tam benignè facias ? M. Charitas illa Dei, quæ (ut Paulus ait) affusa est in cordibus nostris. P. Mira est vis divini Spiritûs, qui ejus auctor est charitatis. Sed mihi interim cogitandum, quomodo tibi referam gratiam. M. Parva res est ; omitte istam cogitationem, nè te impediat quò minus in utramvis aurem dormias : tantum redde mutuum, quum tibi commodum fuerit. P. Reddam (ut spero) propediem. M. Eamus ad precationem, nè notemur. P. Adde unum, si placet. M. Quid est ? P. Nè hodie incoenati mittamur cubitum. M. Ha, ha, he !

## COLL. 30.

*Velusatus, Stephanus.*

Q Uotâ horâ surrexisti hodie ? S. Paulò ante quintam. V. Quis te expergefecit ? S. Nemo. V. An cæteri jam surrexerunt ? S. Nondum. V. Non ivisti illos excitatû ? S. Non ivi. V. Quamobrem ? S. Nescio, nisi quia non putabam illud ad me pertinere. V. An non te illi excitant interdum ? S. Imò sæpissimè. V. Debuiisti igitur similiter facere. S. Debui fateor. V. Memento igitur ut posthac facias. S. Meminero, Deo juvante. V. Sed tu quid fecisti ex quo surrexisti è lecto ? S. Primùm, flexis genibus precatus sum Patrem cælestem in Nomine Filii ejus, Domini nostri *Jesu Christi*. V. Factum bene : quid postea ? S. Deinde ornavi me, & curavi corpus mediocriter, ut *Christianum* decet : postremò ad quotidiana studia me retuli. V. Si perges sic facere, nè dubites quin Deus tua juvet studia. S. Adhuc me sæpè juvit, quæ est ejus benignitas ; nec me (ut spero) derelinquet. V. Rectè loqueris ; nec ille spem tuam frustrabit. S. Anno superiore didici in *Catone* : *Spem retine ; spes una hominem nec morte relinquit*. V. Quòd retinueris, bene fecisti ; est enim egregia sententia, & homine *Christiano* digna. S. Atqui autor ejus libri non fuit *Christianus*. V. Non fuit, certa res est.

S. Unde



s. Unde igitur sumpsit tot pulchras sententias ? V. Maxime ex Philosophis *Ethnicis*. Nam & ipsi (divino Spiritu illuminati) plurima dixerunt, quæ sunt verbo Dei consentanea : quod tu quoque videre aliquando poteris, si literarum studium prosequere. S. Ego prosequar (ut spero) dummodo ipse Deus dat patri meo vitam longiorem. V. Precare diligenter & ex animo ut illud contingat. S. Quotidie id precor sæpe. V. Det tibi Dominus Deus in omni opere bono perseverantiam. S. Quod mihi optas. idem tibi precor ; & gratias ago, quod me tam fraternè monueris.

## COLL. 31.

*Dominicus, Burrasius.*

Ubi sunt juglandes tuæ ? B. De quibus loqueris juglandibus ? D. Quas hodie ex præmio accepisti. B. Ubi sint rogas ! quasi verò tibi servare debuerim. D. Non sic intelligo : sed quæro quid feceris. B. Edi in merendam. D. Edisti miser ? cur potius non servabas ad ludendum ? B. Edere malui, quàm perdere. D. Non poteras perdere nisi duodecim. B. Fateor. D. Quòd si fors tulisset, potuisses ducentas aut fortasse plures lucrificare. B. *Dubius* est (ut vulgò dicitur) *ludi eventus*. D. Quid tum ? ubiq; parati esse debemus in utramque partem, & boni consulere quicquid nobis evenerit. B. Istud ego scio, sed non ium admodum ludendi peritus in eo genere. D. Abi, nunquam rem facies. B. Nemo rem facit, nisi Deo volente, nec ego ditari ex ludo velim. D. Ergò (ut video) quærendus est mihi collusor alius. B. Nihil sanè impedio. Sed mane parumper. D. Quid vis ? B. Quid tu vocas fortem, de qua hic mihi mentionem fecisti ? D. Ipsam fortunam. B. Quid autem est fortuna ? D. Stultorum opinio. B. De fortuna quid opinantur stulti ? D. Nunc mihi non vacat de hoc tibi respondere : sed vide annotationem præceptoris in *Catonem*. B. In quem locum ? D. In illum versiculum, *Indulsi fortuna valis, ut ledere possit*. B. Ut video, non ignoras quid sit fortuna. D. Satè scio fortunam nihil esse. B. Cur ergò dixisti, Quòd si fors tulisset ? D. Ex-

cidit

cidit mihi sic loqui, Ethnicorum more. Nam eorum libri ( ut sæpe docet præceptor ) pleni sunt ejusmodi impiâ doctrinâ. B. Nihil mirum, nempe illi veram Dei cognitionem non habuerunt. D. Sed audi, mi *Barrasi*, si vis amplius disputare, quare tibi alios disputatores, nam mihi nunc seriò ludendum est : volo tamen priùs te vicissim admonere. B. O quàm gratum mihi feceris ! D. Nonne tu dixisti hæc verba, *dubius est ludi eventus* ? B. Fateor me dixisse, sed præmunivi. D. Quomodo istud intelligis ? B. Addidi enim hæc tria verba. *ut vulgo dicitur*. D. O astutam vel peculam ! Os occlusisti mihi. Sed hæc inter nos sine odio aut malevolentia dicta sint. B. Novit Deus utriusque animum. D. Est enim solus cordium scrutator. Sed quid tu, vis hâc solus otio torpescere ? Cogito quo lusu me exerceam. D. Quasi vero sic diutiùs cogitandum. Agè, sequere me, dabo tibi mutuò juglandes. B. Amicè nunc loqueris : sed quando reddam ? D. Ad calendas Græcas, si non potes citius. B. O festivum caput ! eamus.

## COLL. 32.

## H. J.

**J. Acobe.** J. Quid vis ? H. Repetamus unâ prælectionem. J. Non est mihi otium. H. Quid habes negotii ? J. Volo scribere. H. Quid scribere paras ? J. Dictata præceptoris. H. Cur heri non scripsisti ? J. Quo tempore scripsissem ? H. Cùm luderetur. J. At ego volebam amittere ludendi occasionem. H. Ah ! piger, nihil aliud quàm lusiones meditaris ? Nonne diebus Mercurii & Sabbati ternæ sunt horæ liberæ ? J. Liberæ quidem sunt, sed ad lulum destinatæ, deputatæ, attributæ, assignatæ. H. Imò partim lusibus aut alicui honestæ remissioni, partim studio literario sunt dicatæ. J. Fateor duntaxat, iis, qui volunt immori studiis. H. Non poteras heri sesquihoram detrudere ludi tuo, aut saltem horam unicam ? J. Tu stude quantum velis : ego verò ludam quamdiu licebit. H. Per me quidem licebit : sed interim parum promovebis in literis.

teris. J. Nonne præceptorî satisfacio ? H. Uticunque. J. Cui igitur studiose, vis esse præceptore ipso severior ? Omittite tandem, age tuum negotium, ego meum. H. Age, age, ut libet.

## COLL. 33.

*Rafus, Castrensis.*

**Q**uando reperes ludum literarium ? C. Nescio. R. Cur de hac re patrem non admones ? C. Quid putas me curare ? R. Parùm admodum, ut credo. C. Profectò verum dicis. R. Satis est signi te non amare literas. C. Scio legere, scribere, Latine loqui, saltem mediocriter : quid opus est mihi tam ? scientiâ ? Ego plura scio quàm tres sacerdotes Papistici. R. O miserum adolescentem ! ficcine rem contemnis inæstimabilem ? C. Quid tu sic exclamas ? Unde tibi videor miser ? R. Amice, nullâ tibi à me orta est injuria. Quod enim tibi dixi, non est convitium ; nè tu in malam partem accipias : sed misereor tui, quia id contemnis, quod felicitatem parit. C. Lucrum, divitiæ, & voluptas felicitatem pariunt. R. Imò ista multis fuerunt exitio ; tamen si divitiæ sunt donum Dei ; nec nocent, nisi iis qui abutuntur : verùm enim verò nulla est homini pretiosior possessio quàm virtus, & rerum honestarum cognitio. C. Vis igitur concionari, ut video. R. Utinam divinas conciones audivisses diligenter ! C. Hem ! obrundis me ; nunquid vis ? R. Ut bonam mentem det tibi Deus. C. Eà fortasse tibi magis est opus, quàm mihi. Vale.

## COLL. 34.

A. B.

**M**iror ego quid tibi velis ; tu ferè semper es otiosus, aut garris, aut inepris. B. Quid vis faciam ? A. Ut studeas diligenter. B. Cur me istud mones ? A. Pro meo in te amore, tuâq; utilitate. B. Frustrâ mones. A. Quid itâ ? B. Quia non est mihi animus in literis. A. Quid ergò velles ? B. Discere aliquâ artem aptam ingenio meo. A. Jamne cogitâsti quænam ars tibi placeat potissimùm ? B. Jampridem. A. Cur ergo patrem non admones ? B. Nunquam ausus sum. A. Cur non ? B. Vercor ut mihi irascatur.

A. Rega

A. Roga præceptorem; ut illi dicat. B. Imò te oro, Dic tu ipse præceptori meis verbis: nam verecundia me impedit. Facièsne quod rogo? A. Faciam certè, idque liberrimè. Valde enim tædet me videre te adeò remissum, B. O quam mihi gratum feceris! A. Sed præceptor te appellabit. B. Quid tum? Oblata occasio me audacem reddet ad mentem meam liberè aperiendam. A. Rectè iudicas. B. Tū igitur fac promissi memineris: deinde nuntia mihi quid ille responderit. A. Alioquin essem nunnius inutilis.

## COLL. 35.

*Michael, Frisius.*

S. Alve, *Frisi*. F. Tu quoq; salvus sis, *Michael*. Quotidiana hora? M. Mox audies sonum semihoræ post quintidiana. F. Bene habet, maturè satis aderimus. M. Gaudeo me tibi occurrisse, ut euntes *Latine* tantisper colloquamur. F. Ea sanè est utilis & jucunda exercitatio. M. Quoties incido in aliquem ex istis dissolutis nebulonibus, mallem rhedarium offendisse. Non enim per eos mihi licet aliquid in via meditari, adeo mihi sunt eorum mores otiosi. F. Nihil mirum. Nám ferè sunt ejusmodi, ut néque loqui velint quidpiam boni neque audire sustineant. M. Quid cum illis agas, quibus nihil est curæ, nisi ut suas libidines expleant! F. Nihil aliud crepant, nisi suas cupedias, & meras computationes in secretis cauponulis. M. Etiam nos irident plenis buccis, quòd *Latine* per vicos loquamur. Illud verò est omnium pessimum, quòd nusquam se patiuntur admoneri. F. Quia scilicet (ut ait Propheta) *Non est timor Dei ante oculos eorum*. M. Si quid occeperis amicè cōmonere, statim audies, Tace concionator, obtundis me. Quòd si dixeris, Deferam te ad præceptorem aut observatorem: Oh, egò te curo? inquirunt: tu non auderes. Nam si me acculares, non feres impunè. F. Imò verò te continuo verberabunt, si locus erit semotus ab arbitris. M. Profectò, cum quidam eorum me nuper offendisset in quodam recessu, iniegit mihi in utramque malam duos ingentes colaphos, & aufugit conti-

continuó. F. Quid tu, quæso interea? M. Quid illud quæris? tam illud subitum fit, ut vix hominem aspicere potuerim. F. Sed quâ tam citò & sensim ad scholam pervenimus? N. Sic ferè confabulantibus usu venire solet. F. Agè, ingrediamur sine murmure & strepitu, nè studentes offendamus.

## COLL. 36.

*Probus, Amiculus.*

Unde adfers istam tuniculam? A. A domo. H. Quid vis facere? A. Volo induere. P. Nunc non est nautandus tempus. A. Quando igitur? P. Cras manè, quum surges à lecto. A. Benè mones, expectabo.

## COLL. 37.

*Antonius, Daniel.*

Euge, audi vi sororem tuam nupsisse. D. Verum audivisti. A. Quis est maritus ejus? D. Quidam civis *Londinensis*, honestis parentibus progenitus. A. Estne dives? D. Sic habetur, sed tamen pater meus hæc longè pluris facit: primùm, quod ille sit benè moratus adolescens: deinde, quod non solum doctissimus, sed etiam bonarum literarum amantissimus; deniq; quod verus Dei cultor, & *Christiane* religionis summus observator. A. Mihi narras egregios adolescentis titulos. O felicem sororem tuam, quæ Dei beneficio talem virum nacta est! D. Felicem sanè non abs re dixeris, siquidem bonum illud perpetuò sic agnoscat, ut semper meminerit ex Dei bonitate profectum esse, ob idq; immortales agat eidem gratias. A. Credo id facturam. D. Ità spero quidem: sic enim à parentibus semper instituta est in doctrina *Christiana*. Sed me jam aliò revocant domestica negotia. Ergo vale, mi *Antoni*. A. Tu quoque bene valè, suavissime *Daniel*. D. Nunquid vis. A. Ut verbis meis dicas salutem plurimam tuis omnibus, præcipuè patri matrique, & ipsi novæ nuptæ; meque illi gratulari faustum illud conjugium. D. Ego verò id faciam, & quidem libentissimè.

COLL.



## COLL. 38.

*Henricus, Gerardus.*

**H**odie te non vidi in concione, quid id sibi vult? G. Quid sibi velit nescio, ego tamen interfui. H. Narra mihi quæ mandasti memoriæ. G. Non est tuum à me rationem exigere. H. Ego quidem non exigo, verum id rogo, ut memoriæ causâ conferamus unâ. G. Malim nunc solus recordari. Audies me (si voles) cùm præceptor ante prandium nos interrogabit. H. Quid mali esset, si nunc inter nos eâ de re conferemus! G. Nihil mali esset, fateor; sed nunc mihi non libet. H. Tua igitur te libido regit. G. Omitte me; cur molestus es? H. Omitte nunc; sed audi unum verbum, Non decet puerum esse morosum. G. Nec puerum decet esse tam molestum.

## COLL. 39.

*Rublius, Lepusculus.*

**Q**uid fecisti de regula mea? L. Relinqui in pergula superiore. R. Cur eam reliquisti? L. Oblitus sum. R. Non rectè factum; sed tu sic ferè soles, si quid tibi fuerit commodatum. L. Piget me negligentia meâ. R. Non satis est dolere, nisi mores mutare velis. L. Deum precabor, ut mihi mutare velit. R. Si sapias; alioquin nemo tibi posthac commodare volet. L. Habeo gratiam, quod me tam amicè monueris. R. I nunc petitum meam regulam; est enim eâ mihi opus ad ducendas in charta lineas. L. Nunc eo. R. Refer ad me in cubiculum. L. Mox habebis.

## COLL. 40.

*Emericus, Baldus.*

**C**UR solus rides? B. Quid tuâ? E. Quia fortasse rides me. B. Unde tibi orta est ista suspicio? E. Quia malus es. B. Omnes quidem mali sumus; at ego te pejor non sum. Nemo igitur ridet, nisi aliquem irrideat? E. Non sic intelligo; sed qui solus ridet (sæpe audiui) aut stultus est, aut aliquid mali cogitat. B. Ista sententia cujus sit nescio; sed cuiuscunque sit, non est perpetuò vera, tamen admo-

admonitionem tuam in bonam partem accipio, tēque moneo vicissim, ut caveas suspiciosus esse: *Nam timidus & suspectus aptissima mors est*, ut est in morali nostro carmine. E. Memini: boni tamen consulo admonitionem tuam.

## COLL. 41.

*Nathaniel, Mercurius.*

**U**nde venis? M. Domo. N. Quid igitur domi vestrae? M. Nihil tuā refert. N. Fateor; sed familiares sic rogare ferè solemus perinde quasi rogemus, *Ut valeatis? Quomodo se vestrae res habent?* M. De re aliena nimium percontari non decet. N. Taceo: sed videris mihi pro ætate nimis sapere. M. Nihil meum dico; id audiui sæpe. N. Ego quoque non semel audiui. M. Cur ergo non uteris? N. Quia non semper in mentem venit. M. Imò quia tu es percontator; quæ res non sine causa datur vitio. N. Habes gratiam, quòd me adeò amicè moneas; posthac, adjuvante Deo, cavebo ineptus esse. M. Ità paulatim sapiēs.

## COLL. 42.

*Humbertus, Plautinus.*

**H**eus tu, præceptor adest. P. Quid tum? H. Respice ad illum. P. Quamobrem? H. Ut ei caput aperias; & venientem salutes. P. Ità decet facere; sed aliud cogitabam. H. Tace.

## COLL. 43.

*Portanus, Marcus.*

**U**nde redis? M. Foris. P. Cur exieras? M. Redditū urīnam. P. Qualis est cæli facies? M. Nebulosa. P. An regelat? M. Sic resolvitur gelu, ut nives omnino liquefiant. P. Etiamne pluit? M. Sensi aliquid supernè distillare. P. Fortasse in transitu, è stillicidio testī. M. Imò è nubibus, scio; quòd si non credis, vide tu ipse. P. Quasi ego tibi non credam in re tantilla. E. Cur igitur dubitare videbaris? P. Ut pluribus verbis tecum fabularer. M. Quorsum id pertinet? P. Ad *Latinum* sermonem exercendum. M. Sed interim sæpè otiosa verba dicimus, à quibus omni-

no abstinendum *Christus præcepit*. P. Totâ erras viâ in præcepti intellectu. M. Cur istud dicis? P. Quia *Non est otiosus sermo, qui ad aliquam institutionem refertur, præsertim ubi agitur de bonis & honestis, qualia sunt Dei opera in rebus naturalibus*. M. Videris mihi rectè sentire; proinde facilè tibi assentior. P. Sed hæc hæcenus; instat nobis aliud negotium. M. Agè, desinamus.

## COLL. 44.

*Trolleanus, Bolanus.*

S. Cín' tu quota sit hora? B. Non certum scio: sed video *S* instare coenæ tempus. T. Me miserum! oblitus sum adire matrem, quæ jussérat. B. Curre, curre; opportunè venies, ut coenes domi. T. Rectè mones, eo rogatum veniam. B. Eccum hypodidasalum. T. Optimè adest.

## COLL. 45.

*Rolandus, Languinus.*

Q. Uid ais de scalpello, quod emeram tibi nudius tertius? éstne satis bonum? L. Imò verò est optimum? sed (me miserum) parùm abfuit quin perdideram. R. Eho, quid ais? quomodo id accidit? L. Cum redirem foris, exciderat mihi in vico. S. Unde exciderat? L. E thecâ meâ, quam imprudenter apertam reliqueram. R. Quomodo recuperâsti? L. Affixeram statim chartulam valvis januæ: post prandium quidam puer sextæ classis mihi attulit. R. Utinam, omnes tam fideles essent, qui res amissas reperiunt! L. Profectò pauci sunt, qui restituent; si modò sit res alicujus pretii. R. Et tamen id verbo Dei nominatim præcipitur. L. Quidni? Est enim furti species, si quis rem alienam inventam retineat, modò sciat cui reddenda sit. R. At plerique putant se jure possidere quicquid amissum invenerint. L. Errant illi quidem gravissimè. R. Verùm (ut redeamus ad inceptum sermonem) quid dedisti puero, qui scalpellum tuum invenerat? L. Dedi sextantem, & nuces aliquot juglandes: laudavi præterea, & paucis admonui idem semper esse facien-

faciendum. R. Rectè fecisti, sic enim libentiùs reddet aliàs si quid repererit. Sed quid si perdidisses? L. Æquo animo tulissem, & mihi emissem aliud. R. Itàne æquo tulisses animo? L. Certè non sine aliqua molestia. R. Non igitur æquo animo; sed nolo te arctius urgere. L. Non sumus Theologi. R. Quid ergò? L. Grammaticuli. R. Et quidem imperiti. L. Tantò diligentius Deum precari debemus, ut per *Evangelium* suum nos liberet ab ignorantia tenebris; in quibus versati sumus & adhuc versamur. R. Id verò faciemus, si sanctis admonitionibus pareamus, quas audimus quotidie à præceptore, & sæpe à concionatoribus, divini verbi administris. L. Vide quantum profuerit nobis scapelli mei amissio. R. Ob eam rem tibi dupliciter gratulor: primùm quòd tibi rectè emerim, deinde quòd amissum recuperaveris. L. Habeo tibi gratiam, mi *Rolande*. R. Quin Patri nostro cœlesti sit laus, & gratiarum actio. L. *Amen*.

## C O L. 46.

*Mercarius, Calvinus.*

**M**ihi non videris nimis occupatus. C. Mediocriter. M. Quid si mihi exacuas duas aut tres pennas? C. Satis sit tibi, si unam acuero in præsentia. Sùntne novæ? M. Novæ quidem; sed para te usque dum acuantur: Jam enim lævigavi, caudam rescidi, detraxi plumulas. C. Ostendè: profectò sunt optimæ, & ad scribendum aptissimæ. M. Unde istud nosti? G. Quia sunt caule amplo, firmo, & nitido: nam molles, & quæ caulem breviorē habent, parum sunt ad scribendi utum habiles. M. Gaudeo me utiliter emissee. C. Non abs re; sed quanti? M. Pro his tribus dedi quadrantes duos. C. Singulas igitur binis emisisti denariolis. M. Res apparet. C. Est vile pretium, pro rei bonitate; de quo emisisti? M. De quodam circumforaneo. C. Apud hujus oppidi mercatores singulæ, & quidem minùs bonæ, venduntur sextantibus. M. Et tamen audent interdum dicere, pluris sibi constare *Londini*. C. Ea serè est mercatorum consuetudo; Nihil enim proficiunt, nisi

*admodum mentiantur*; ut ait *Cicero*. M. Sed agè, nè te diutiùs remorer, agamus quod instat. C. Citò expediero; aspice me diligenter, ut discas aliquando. M. Aspicio intentis oculis; sed mihi opus esset spatio paulò longiore. C. Illud ergò fiet in cubiculo, si quando me velis invisere. M. Quo tempore? C. Post scholæ missionem, hoc est, horâ nonâ matutinâ, vel quartâ pomeridianâ. Nunc habes pennas duas, rectè (ni fallor) in usum tuum accommodatas. Hanc tertiam in aliud tempus tibi integram servabis. M. Accipe tibi, si placet. C. Quin tibi serva? domo adferuntur mihi satis multæ. M. Agò tibi quantas possum gratias, vale. C. Incolumem te conserveat Deus. Sed heus, nè parcas unquam labori meo. M. Tu quoque & me & rebus meis vicissim utere, si quid opus fuerit. Iterum vale.

## COLL. 47.

*Puteanus, Buerla.*

**U**nde veniebas modò? B. E. culina. P. Quid illuc iveras? B. Ut me calefacerem. P. Tu, credo, libentiùs es in culina, quàm in schola, nonne? B. Nihil mirum; in schola non est ignis, sicut in culina. P. Abi, sapias. B. Utinam tam saperem in divinis rebus quàm in cura corporis! P. Fac sapias. B. Quomodo? P. Studio, curâ, labore, & diligentia. B. Non parco labori. P. Rectè facis: sed est tempus expectandum cujus progressu fiunt omnia: interea precandus est Deus assiduè. B. Bene mones; utinam ille studia nostra promoveat in gloriam sui nominis! P. Id faciet, si pergamus eum colere diligenter.

## COLL. 48.

*Puteanus, Capusius.*

**Q**uid tecum cogitas, *Capusi*? C. Libenter irem domù. P. Quid eò? C. Ut me his diebus parumper recrearem cum matre. P. Quid obstat, quò minùs eas? C. Praceptor non vult permittere. P. Meliùs tibi consulit quàm ipse putas. C. Quomodo? P. Nam interea perderes multum temporis, & cum rediisses, tibi doleret. Nonne verum dico? C. Profectò sic est. P. Mane igitur, si sapias. C. Parebo



rebo tuo consilio, quia mihi rectum videtur. P. Nollem sciens malum tibi consilium dare. Atque utinam quod suadeo succedat tibi prosperè! C. Spero ità fore, Deo volente.

COLL. 49.

*Martialis, Blancus.*

Quantum habes pecuniæ? B. Assen cum semisse: tu verò? M. Non tantum. B. Quantum igitur. M. Unicum assen. B. Vis mihi dare mutuò? M. Est mihi opus. B. In quem usum? M. Ad emendam chartam. B. Hodie reddam tibi. M. Addendum fuit, Deo juvante. B. Sic docet præceptor ex verbo Dei, sed non possum assuescere. M. Fac assuescas. B. Quomodo id fiet? M. Si sæpe cogires nos à Deo sic pendere, ut nihil possimus sine ejus auxilio. B. Bonum mihi das consilium. M. Quale mihi dari velim. B. Sed (ut ad propositum redeamus) dabis mutuò istum assen? M. Miror te mutuò petere, qui plus habeas quàm ego. B. Est quidam Scholasticus hæc transiens, qui librum venalem ostentat. M. Quid tum? B. Cupiebam emere, quia vilius indicat quàm noster bibliopola. M. Accipe; sed, quæso, unde tam citò reddes? B. A coena ibo domum, ut à matre petam. M. Quid si dare nolit? B. Nihil succedabitur, cum librum ostendero.

COLL. 50.

*Montanus, Eusebius.*

Quot annos habes? E. Tredecim, ut à matre accepi: tu verò? M. Equidem non tot habeo. E. Quot igitur? M. Deest unus. E. Sunt ergò duodecim. M. In promptu est ratio. E. Sed frater tuus quotū agit annum? M. Quintum. E. Quid vis? jam *Latine* loquitur. M. Quid miraris? semper habemus domi pædagogum & doctum & diligentem: is semper nos *Latine* loqui docet: nihil *Anglicum* effert, nisi aliquid declarandi causâ, quin etiam patrem non audemus nisi *Latine* alloqui. E. Nunquam igitur *Anglice* loquimini? M. Solùm cum matre, idque certâ quadam horâ, cum illa nos ad se vocari jubet. E. Quid agitis cum familia? M. Cum familia rarus est nobis sermo, & quidem tantùm in transitu, & tamen famuli ipsi nos *La-*

tinē alloquuntur. E. Quid ancillæ? M. Si quando usus postulat ut eas alloquamur, utimur sermone vernaculo. ut solemus cum ipsa matre. E. O vos felices, qui tam diligenter docemini! M. Est Deo gratia, cujus dono patrem habemus, qui curet nos tam accurate erudiendos. E. Certē ejus rei laus & honor unico cælesti Patri debetur. M. Sed quid agimus? jam audio recitari catalogos. E. Ergo festinamus.

## COLL. 51.

*Sylvius, Ludovicus.*

**Q**uid tristis es, *Ludovice*? L. Ægroto. S. Quid morbi est? L. Nescio. S. Sed ramen estne gravis morbus? L. Non a modum, gratia Deo. S. Quidnam tibi dolet? L. Caput. S. Quid? totūne caput? L. Non certē. S. Quid ergo? utrum sinciput, an occiput? L. Hæc pars anterior. S. Est ergo sinciput. L. Quid igitur faciam? S. Quiesce; bene mox sanus eris. Sic enim a matre accēpi, Nullum esse præsentius remedium capitis doloribus, quàm quietem. L. Atqui sunt varii morbi capitis. S. Et varia fortasse remedia: sed quid est facilius quàm id tentare quod dixi tibi? L. Experiri quidem nihil (ut spero) nocebit: sed ubi quiescam? S. Domi vestræ, in lecto. L. Mater non finet. S. Imò, si dixeris te ægrotare. L. Atqui me putabit simulare. S. Fieri potest: sed quid dubitas periculum facere? L. Bonum consilium. S. Utere, si vis. L. Faciam profectò. S. Enimverò, si sapias. L. Sed unum restat. S. Quid est? L. Impetranda à præceptore venia. S. Adi, & pete. L. Quid si nolit dare? S. Imò facillimè. L. Qui scis istud? S. Quia satis est credulus nobis nisi qui aliquoties illum fefellerunt. L. Nunquàm sciens illum fefelli. S. Ito igitur fidenter. L. Nunc eo. S. Sed heus, prius meditare quid sis dicturus, nè fortè loquendo hæreas. L. Bene mones; non accedam imparatus.

## COLL. 52.

*Paulus, Timotheus, Solomon iudex.*

**O** Prætor mihi ades, *Timothee*; quærebam, qui mecum certare vellet; sed omnes ad lusum cærramen currunt:

II.  
sus  
lo.  
ili-  
em  
er-  
M.  
rgò  
  
rbi  
us ?  
et ?  
uid  
or.  
e ;  
ffe  
m.  
re-  
ixi  
u-  
et.  
u-  
e ?  
ò.  
t ?  
id  
ia  
e-  
n-  
li-  
on  
  
m  
-  
:

runt: tu verò quid ais? T. Quid ego malim, quàm tecum de nostris studiis pacificè contendere? P. Sed quod petis certandi argumentum? An de repetendis *Ciceronis Epistolis*? T. Malo de *Catone*. P. Quamobrem. T. Quia restant mihi ediscendæ aliquot prælectiones de *Cicerone*. Scis enim me agrotasse fere duas hebdomadas. P. Memini. Vis igitur dicamus secundum librum *Moralium Distichorum*? M. Est longus nimis in hanc horam. P. Quid ita? T. Quia nobis aliquandiu ludendum est, ut corpus exerceamus ad valerudinem conservandam. P. Dicamus ergò librum tertium, qui est brevissimus. T. Sed judicem volo. P. Præstò est *Solomon*, qui me ob eam rem sequitur. T. Vis igitur, *Solomon*, audire nos? S. Quid dicturi estis? P. Tertium librum *Distichorum Moralium*. S. Nonne alterni dicetis? T. Scilicet suum uterque *Disticum*. S. At pueri (nè erretis) nolo vos audire tanquam iudex. P. Cur non? S. Nè forè meâ sententiâ alteruter amicorum offendatur. T. In quo igitur nobis eris adjutor? S. Notabo in chartula diligenter utriusque lapsus; deinde referetis ad præceptorem. T. Quid tum fiet? S. Ille, utri videbitur, & victoriam & præmium adjudicabit. P. Eris igitur nobis tantùm testis? S. Sic intelligo. T. Optima sanè videtur mihi ratio. P. Mihi quoque valde probatur. S. Sed unum testat. T. Quid est? S. Vultisne præter lapsus manifestos hæitationes etiam notari? T. Sic volunt præceptoris leges super hac re. S. Date mihi librum in manum, ut certiùs observare possim. P. Tene meum. T. Incipiâne? P. Æquum est, quia tu à me provocatus es. T. Audi (quæso) *Solomon*, sed diligenter. S. Tu verò cave dicas negligenter.

- T. Hoc quicumque cupis carmen cognoscere, Lector,  
Hæc præcepta feres, quæ sunt gratissima vitæ.  
P. Instrue præceptis animum, nec discere cesses:  
Nam sine doctrina vita est quasi mortis imago.  
T. Commoda multa feres: sin autem spreveris illud,  
Non me scriptorem, sed te neglexeris ipse.

P. *Cum rectè vivas, nè cures verba malorum :  
Arbitrii nostri, &c.*

Sic pergunt ad finem usque libri tertii.

COLL. 53.

*Dionysius, Gulielmus.*

**G** Ratulor tibi reditum, *Gulielme* : quando rediisti rure ?  
**G.** Heri post meridiem. **D.** Quid mater ? **G.** Quem-  
 admodum illa me secum duxerat, ita reduxit. **D.** Nonne  
 venit in equo ? **G.** Et quidem tolutario. **D.** Tu verò ?  
**G.** Quid rogas ? eram illi à pedibus. **D.** Non tibi fuit mo-  
 lestus labor itineris ? **G.** Nulla mihi fuit via difficilis, adeò  
 erat jucunda in urbem reditio. Quid quæris ? noluissem  
 eques venire. **D.** Quantum distat hinc villa vestra ? **G.**  
 Quatuor milliaribus, iisq; non admodum longis. **D.** Sed jam  
 satis de reditu : nunc aliud agamus. Fuiſtine memor pro-  
 missi tui ? num rediisti vacuus ? **G.** Atuli uvarum quan-  
 tum potui. **D.** Quantum igitur ? **G.** Quasillum. **D.** Huius  
 quasillum ? tibi igitur uni. **G.** Imò nobis duobus. **D.** Quid  
 duobus tantillum ? **G.** Non poteram ferre amplius pro  
 viribus corpusculi mei. Quòd si robustus essem, asini onus  
 asportassem ; mater enim facile permittebat. **D.** Quàm  
 vellem adfuisse ? **G.** Ego & mater te plurimum deside-  
 ravimus. Sed esto animo bono, ea reliquit famulum  
 ruri, qui amplissimam corbe onustus veniet : tum illa  
 tibi dabit affatim. **D.** Aha, nunc optata loqueris, mi  
*Gulielme*. **G.** Eamus domum ad nos, videbis quasillum  
 nostrum adhuc (ut spero) integrum, **D.** O lepidum ca-  
 put ! nam & cupiebam ire salutatum matrem tuam mihi  
 charissimam. **G.** Profectò illi gratissimum feceris. **D.** Ea-  
 mus igitur.

COLL. 54.

*Anthoniw, Bernardus.*

**Q**uid hic solus cogitas ? **B.** Meam deploro miseriam.  
**A.** Quænam te afficit miseria ? **B.** Heu me miserum !  
 ecce mutavimus classem, nec est mihi pecunia unde li-  
 bros emam. **A.** An non tibi dat pater ? **P.** Dat quidem  
 inter-

interdum, sed parcè nimis. A. Est igitur avarus. B. Non sequitur. A. Quid igitur impedit quò minùs tibi pecuniam suppeditet? B. Paupertas; præterea, cum peto, miratur tot nobis opus esse libris. A. Nihil mirum, præsertim cum sit pauper: sed interim illo animo bono, nec te afflictes, quæso. Dabo operam, ut te juvet pater meus: libenter enim largitur pauperibus, præsertim iis quos novit bonarum literarum studiosos esse. B. O me felicem, si tuâ operâ me Deus adjuverit! A. Juvabit, spero: sed tu interim precare illum diligenter, ut mei patris, animum erga te affectum reddat. B. Bene niones; nam (ut sæpe audivi è sacris concionibus) *Solus est Deus qui hominum corda gubernat ac dirigit.* A. Ità res habet. B. Vale mi Antoni qui mihi animum reddidisti. A. Tu quoque, *valde*, Vale: sed dic mihi, quæso, quantum nunt morari tibi opus est? B. Si duos haberem decusses, abunde mihi esset in præsentia. A. Tace; cras (ut spero) divinum auxilium senties.

## COLL. 55.

*Philippus, Vultherius.*

Quò nunc is? V. In hypocaustum. P. Quid eò? V. Hoccine rogandum est? non frigus sentis? P. Quotusquisque nunc non sentiat, cum sit adeò acerbum? Sed ego malim me in culina calefacere. V. Atqui præceptor vetuit. P. Non ignoro: sed rogabo veniam. V. Cur non vis in hypocausto calefieri. V. Vapores clibani tentant mihi caput, quod alioquin infirmum latens habeo; unde fit ut facîle ex capite laborem. N. Ego quoque sic aliquando fui; sed paulatim assuefeci me ad ferenda hypocausti incommoda. P. Et ego (ut spero) me assuefaciam: verum præstat id fieri horis pomeridianis, ubi tantus æstus defuerit. V. Sed nunc tempus non est hîc philosophandi diutiùs: jam mihi dentes frigore crepitant.

## COLL. 56.

*Stratanus, Theobaldus.*

Quæ sunt arbores in horto vestro? T. Hortum habemus suburbanum, in quo sunt olera quibus vescimur



mur quotidie ; præterea sunt in fundo nostro bini horti variis arboribus confiti. S. In horto quæ sunt olera ? T. De hoc mater melius respondere posset. Nam illic sæpe versatur aut ferendi causa, aut sarriendi aut aliquid colligendi. S. Sed tamen dic mihi aliquot olerum nomina. T. Parùm prodesset nomina tibi recensere, nisi res ipsas videres: quin eamus in rem præsentem. S. Potes ire quando libet ? T. Possim quidem, matre permittente. S. Fac amabo permittat, sed eâ lege ut me tibi comitem assumas. T. Id facillimè fiet ; tantùm hîc me expectes : mox rediero. S. Quid si ea domi non est ? T. Tamen hoc tibi renuntiabo. S. Bene vertat Deus.

## COLL. 57.

*Præpositus, Caulonius.*

**H**odie pecuniam à patre accepi, si tibi fortè est opus. C. Nihil nunc opus est mihi, sed tamen gratiam habeo maximam, quòd pro tua liberalitate ultro mihi offers beneficium. Quotus enim quisque id faciat ? P. Credo esse paucissimos : tu me tamen non semel beneficiis provocasti. C. Adèò parva illa fuerunt, ut non sint commemoratione digna. P. Non est parvum beneficium, quod ab optima voluntate profectum est. C. Utinam Dei erga nos beneficia tam expenderemus, quàm solemus hominum ! P. Faxit ille ut in ea cogitatione nos exerceamus & sapiùs & diligentius. C. Illud profectò necesse est, si volumus ejus benignitatem sapiùs experiri.

## COLL. 58.

*Fatonus, Barbarius.*

**Q**uid agis ? B. Scribo. F. Quid scribis ? B. Describo dictata præceptoris. F. Quænam ? B. Hæsterna. F. Quid ? non aderas ? C. Imò aderam : sed non poteram magistru dictantem assequi. F. Quæ res impediebat ? B. Quòd satis commodè non sederem. F. Veneras ergò serius ? B. Illud est. F. Cede commentarium tuum ; egomet tibi scribam. B. Quid faciam lucri ? F. Ego citius quàm tu descripsero ; post ludemus unà, ut concessit præceptor. Da (inquam) libellum tuum. B. Libenter id quidem facerem ;

rem ; sed non audeo. F. Quid times ? B. Edictum præceptoris. F. Quod mihi edictum narras ? B. Nescis eum venisse, nè quis sine permissu ejus alteri scribat ? F. Id Ego probè memini : sed unde hoc sciret ? B. Rogas ? cum emendandi causâ scripturæ rationem exiger : tum captus ero : novit enim manum meam. Præterea, neque fallendum est, neque mentiendum. F. Verbo Dei utrumque veramur. B. Quid ergo responderem præceptoris, cum ille negaret me ista scripsisse ? F. Non eo res evadet, spero. B. Nolo tua spe tantum subire periculum. F. Vah, nimium timidus es, nunquam rem facies. B. At tu forsitan audacior. E. Tu igitur scribe quantum voles ; ego ad ludendum me confero. B. Abi, quæso ; jam unam paginam descripsissem, nisi me interpellasses. F. At interim aliquid proficimus, dum *Latine* fabulamur.

## COLL. 59.

*Quirinus, Romulus.*

Venitne pater ad mercatum hodiernum ? R. Hodie manè convenit me, cum adhuc è lecto surgerem. Q. Nihil ab eo petisti ? R. Imò pecuniam. Q. Et numeravit ? R. In præsentia. Q. Quantum, obsecro ? R. Viginti asses. Q. Papæ ! asses viginti ? quid sit, ut audeat tibi tantum pecuniæ committere ! R. Quia novit me dispensatorem frugis. Siquidem semper illi reddo rationem usque ad teruncium. Q. Sed ægrè fortasse impetrasti. R. Inò facilimè, atque adeò cum gratiâ. Q. O mitem parentem ! R. Certe mitissimum. Q. Sed (ut ad rem) quid facies ista pecuniâ ? R. Emam libros, & alia mihi necessaria. Q. Potèstne mihi aliquid muruo dare ! R. Possum, si modo eges. Q. Nisi egerem, non peterem. R. Quantum vis à me accipere ? Q. Quinque asses. R. Accipe. Q. O ve ! è amicum animum ! R. Amicus verus non est, nisi qui amicum juvat in tempore, si tamen habet unde juvet. Q. *Amicus certus* (ut est in Proverbio) *in re incerta cernitur.* R. Quando reddes mutuum ? Q. Ubi primùm pater in hanc urbem venerit. R. Quando venturum speras ? Q. In mercatu proximo, nempe ad octavum diem *Octobris*.

COLL.

## COLL. 60.

*Pedagogus; Puer.*

**H**odie manè quotâ horâ expergefactus es? Pu. Ante lucem; quotâ horâ nescio. Pæ. Quis te expergefecit? Pu. Venit excitator hebdomadarius cum laterna sua, pulsavit alacriter ostium cubiculi; quidam aperuit; excitator accendit nostram lucernam; clarâ voce inclamavit. Experrecti sunt omnes. Pæ. Narra mihi ordine quid egeris ex illo tempore usque ad finitum jentaculum. Vos pueri, auribus atque animis diligenter attendite, ut discatis hunc vestrum condiscipulum imitari. P. Experrectus sum, surrexi è lecto, indui tunicam cum thorace, sedi in scabello, recepi femoralia & tibialia, utraque indui, calceos calceavi, femoralia ligulis attrinxi thoraci, tibialia periscelide ligavi super crura, cingulo me præcinxi, caput diligenter pexui, aptavi capiti pileolum, togam indui; deinde egressus cubiculo descendi infra, urinam in area reddidi ad parietem, accepi aquam frigidam è situla, manus & faciem lavi, os & dentes collui, deterfi mantili manus & faciem. Interea signum ad precationem datur minore tintinnabulo: in aulam privatam convenitur, precamur unâ, accipimus ordine jentaculum à famulo culinario, jentamus in triclinio sedentes quieti, sine murmure & strepitu; quos audiivi ineptè garrientes, aut verba loquentes otiosa, aut etiam lascivientes vidi, amice admonui: qui non paruerunt admonitioni, detuli ad observatorem, ut eos notaret, Pæ. Nemône vobis præerat dum jentaretis? Pu. Imò hypodidasclus. Pæ. Quid agebat interea? Pu. Ille per mediam aulam ambulabat tenens librum in manibus, & identidem monens observatorem, ut notaret ineptè garrientes. Pæ. Nullûmne igitur verbum tunc liceat emittere? Pu. Imò licet; verûm si demum notari solent, qui diu & multis verbis ineptè & sine ullo fructu confabulantur. Ceterum licet omnibus jucundos inter se tractare sermones de bonis & honestis rebus, dum tamen id modestè fiat, citra clamorem & contentionem. Pæ. Hactenus satisfacisti mihi; cætera narrabis à prandio

dio, nisi aliquod negotium intervenerit. Eamus nunc in aulam ad prandium, nè magistro in mora simus. Pu. Audivi modò signum dari. Pz. Opportunè datum.

## COLL. 61.

*Magister, Discipulus.*

**U**BI finivisti narrationem ante prandium? D. Cùm vellem finem imponere de jentaculo, tu me interpellasti, præceptor. M. Perge igitur narrare ordine reliqua. D. Dum jentandi finem facimus, datur publicum signum posterius; sumit quisque libros; imus in aulam communem; recitantur de more catalogi singularum classium; qui adsunt, ad nomen respondent; ego quoque respondeo; absentes notantur in catalogis ab ipsis nomenclatoribus. Finita catalogorum recitatione, ludimagister pulpitem ascendit, ut precetur; jubet nos attentos esse, tumque publicè precatur; ubi precatus est, Recipite, inquit, vos in suum quisque auditorium. Conveniunt omnes, ego item venio cum meis condiscipulis; sedeo in loco meo: præceptor ingreditur; inquit de absentibus; deinde sedet in cathedra sua, & jubet pronuntiare auctoris scriptum. Pronuntiavimus terni clarâ voce, ut solemus quotidie. Tum jubet ut reddamus interpretationem: aliquot ex rudioribus legunt singuli: nos alii reddimus terni, idque memoriter, præter eum qui verba ipsa auctoris præcit nobis ordine. Tandem præceptor exigit *Anglicam* verborum significationem: doctiores, quibus nominatim id præcepit, respondent: ego quoque jussus ab eo, respondeo; laudat illos qui bene responderint, de quorum numero ego (quod sine jactantia dictum sit) unus eram. Postea jubet singulas orationis partes ordine tractari ad rationem Grammaticam. Postremò palam præscribit, quid sit à prandio reddendum: auditâ horâ octavâ, precationem imperat; quâ finitâ, monet ut officium sedulò faciamus: tandem nos missos facit. Eo spectante, eximus ordine & sine strepitu, lætique discedimus. Satisne tibi feci, præceptor? M. Imò cumulatissimè. D. Placétne tibi

tibi ut sub cœnæ tempus idem faciam de reliquis hujus diei actionibus? M. Nihil opus erit. Nam de iis quæ boris pomeridianis aguntur, alius te audivi satis. D. Numquid vis præterea? M. Eitne tempus eundi in aulam communem ad *Psalmorum* cantionem? D. Tempus est, M. Ito igitur.

## COLL. 62.

*Pædagogus, Puer.*

**A** Des, *Carole*? Pu. Adlum, præceptor. Pæ. Quid agunt duo condiscipuli tui? Pu. Adhuc docentur a subdoctore. Pæ. Tu verò janne pronuntiasti contextum prælectionis in crastinum mane? Pu. Pronuntiavi. Pæ. Satisne rectè? Pu. Satis gratia Deo. Quis te audivit? Pu. Ludimagister. Pæ. Bene habet; sed est, quod monere te velim. Pu. Eho istud audire percupio. Pæ. Sæpenumero cogitandum tibi est, quantum debeas bonorum omnium largitori Deo, qui & ingenium & memoriam tam felicem tibi dederit. Pu. Quid illi non debemus, qui mihi dedit omnia? Pæ. Dic aliquot ejus beneficia præcipua, quemadmodum docui te aliquando. Pu. Dedit mihi celestis ille pater corpus, animam, vitam, mentem bonam, parentes bonos, locupletes, nobiles, bene erga me affectos; & qui non modò suppeditant mihi copiosè omnia ad hanc vitam necessaria, sed etiam (quod est longè maximum) me bonis literis, bonisque moribus tam diligenter instituendum curant, ut nihil sit præterea requirendum. Pæ. Verè omnia ista dixisti, sed unum prætermisisti, quod est singulare Dei beneficium. Scin' tu quid sit? Pu. Sine me paulisper cogitare. Pæ. Otiosè cogita. Pu. Nunc ego reminiscor; sed pro magnitudine rei, nescio quibus verbis id possum exprimere. P. Dic tamen, quo poteris modo. Pu. Cogito etiam atq; etiam. Pæ. Dic tandem. Pu. Innumerabilia sunt Dei optimi maximi erga me beneficia, in corpore, in animo, in externis rebus; sed nullum majus nec dici nec cogitari potest, quàm quòd Filium suum unicum gratis mihi dederit, qui me miserrimum peccatorem & sub *Sananæ* tyrannide captivum, ac morti æter-



ne destinatum redemit, idque morte suâ, omnium crudelissimâ & maximè ignominiosâ. Pæ. Satis aptè dixisti, & totidem ferè verbis quot aliàs te docueram. Sed nunquid Deus tibi uni hoc tantum beneficium præstitit? Pu. Minimè verò. Pæ. Quibus præterea? Pu. Omnibus, quot Evangelio fideliter ac verè credide. int. Pæ. Agè, profer locum ex *Johannis* Evangelio, in eam sententiam. Pu. Sic Deus dilexit mundum, ut filium suum unigenitum daret, ut omnis qui credit in eum non pereat, sed habeat vitam æternam. Non enim misit Deus Filium suum in mundum, ut condemnet mundum, sed ut servetur mundus per eum. Qui credit in eum, non condemnatur; qui verò non credit, jam condemnatus est, quia non credidit in nomen unigeniti Filii Dei. Hæc est autem. Pæ. Hæcenus satis; sed cujus sunt verba ista? Pu. Ipsius *Christi* de seipso loquentis. Pæ. Quem alloquitur? Pu. *Nicodemum*, qui ad eum nocte venerat. Pæ. Faxit ipse *Christus*, unicus Servator noster, ut magis ac magis in ipsius cognitione proficias. Pu. Faciet, spero. Pæ. Perge igitur, ut coepisti, alacriter, quod bene vertat Deus in gloriam sui nominis. Pu. Ità precor. Pæ. Eamus cœnatum.

## COLL. 63.

*Observator, Puer.*

**T**U nunquam rudes; quando eris doctus? P. Id fiet progressu temporis, Deo juvante. O. Rectè dicis; sed interim laborandum tibi est. P. Atqui ego non sum arator. O. Etiâ rides? Quasi *laborare* idem sit quod *arare*. P. Scio non idem esse. O. Cur ergò sic respondisti? nonne istud ridere est? P. Et ridere non est malum, càm sit naturale omnibus hominibus. O. Pergit' tu nugas dicere? P. Quod dixi verum est. & verum dicere non est nugari. Cur me immeritò reprehendis? O. Jure te arguo. P. Quo jure? O. Quia non ignoras *ridere* pro *irridere* usitatum esse; & tamen sic accepisti quasi de risu sum loquutus. P. Si defendo causam meam, quid mali facio? O. Pergis igitur esse pertinax? Profectò seriò notaberis. P. Nè quæso, mihi irascaris, mi *Martine*. O. Non irasco; sed officium meum

meum facio. P. Sed audi, quæso. O. Quid audiam? tuas nugas? P. Audi, inquam, nihil mentiar. O. Dic breviter: est mihi alibi negotium. P. Imprimis, cum tu me monuisti, non eram otiosus. O. Quid ergo? si nihil faciebas, nonne otiosus eras? P. Non eram; pace tuâ dixerim. O. Qui potest illud fieri? P. Dicam tibi, etsi tute melius hoc intelligis quam ego. Nihil faciebam, ut apparebat: sed tamen cogitabam aliquid boni. O. Declara istud mihi. P. Cum tu facis versus, sæpe meditaris diu, quasi sis otiosus, quamvis nunquam sis minus otiosus. O. Pro ista ætate nimis acutus es. Etiam si tibi (ut ais) otiosus non eras, tamen qui te viderint, possent aliter judicare. P. At solus eram. O. Verum: sed poterant aliqui intervenire. Denique non fateris culpam. P. Siqua fuit culpa, in eo fuit, quod primo aspectu videbar tibi esse in orio, cum revera non essem. O. In eo nihil requiro: sed de irrisione quid respondes? P. Certè nihil dixi irridendi animo. O. Quid igitur? P. Jocabar, crede mihi. O. Quorsum? P. Ut paucis verbis fabulando, aliquid ex te addiscerem. O. Non is sum, à quo multa doceri queas. P. Imò tecum multum boni sæpe didici. O. Quid tandem vis concludere? P. Ut mihi ignoscas; quando, ut vides, malo animo nihil peccavi, quod equidem sciam. O. Agè, ignosco, quia videris mihi candidus & apertus, neque adhuc vidi te mendacem esse. P. Ago tibi gratias, *Martine* suavissime.

COLL. 64.

N. O.

**E**rgone abis in patriam? O. Cogor abire, nempe accersitus à patre. N. Nunquàmne es reversurus? O. Non, spero. N. Quando profecturus es? O. Crastino die, ut opinor. N. Siccine igitur me relinquis? O. Ità necesse est. N. O me miserum! ubi & quando amicum talem reperiam? talem studiorum meorum socium? O. Nè doleas, esto animo bono; meliorem tibi dabit Deus. N. Ille quidem potest, scio; at ego vix sperare possum. O. Noli, obsecro, te affligere tantopere; nec enim hac separatione  
corpo-

corporum interitura est amicitia nostra, quin potius accrescet magis; & absentes corpore, præsentes animis erimus. Quid? Epistolæ, quas ultrò citròque dabimus. quantam vim speras habituras esse? Quid? quòd mutuo illo desiderio amor ipse noster fiet jucundior? N. Verisimilia sunt quæ dicis omnia; sed interim non lenitur dolor meus. O. Ah! reprime lachrymas. N. Non queo præ dolore. O. Siccine agis? an putas me minore dolore tangi? Sed quid agas? divinæ voluntati parendum est. Nunc ipse te collige, obsecro; ac potius ad hilariter cœnandum te para. Pluribus à cœna colloquemur. N. O quàm triste divortium!

COLL. 65.

*Messor, Valensis.*

**N**ON meministi præceptorem, tam sæpe monere nos de fugiendis pravis sodalibus? V. Ego verò probè memini. M. Tamen alicubi satàs negligenter uteris ejus monitis. V. In quo videor tibi ea negligere? M. Dicam tibi modò attentè audias. V. Dic, obsecro; audiam attentissimè. M. Nunquam vis cavere ab illo impostore? V. Cur caveam? M. Nè illius contagione depraveris; nòsti enim esse pessimum. V. Atqui non sponte sequor; ad me accurrit undique. M. Nimirum quia novit te habere quod des, & dare libentè ac sæpe. V. Quid igitur mihi faciendum suades? M. Dic semel & seriò, & quasi animo irato, Quid vis, amice? cur me ubique sequeris? omnes clamitant te esse pessimum, adeò sodales tui esse nolunt. Proinde omite me posthac, quæso, nè tuâ causâ virgis palàm cædar. V. Quid si veller aliquid contrà respondere? M. Abrumpe illi sermonem, téque recipe celeriter. V. Ago tibi gratias, quòd me tam fideliter monueris.

COLL. 66.

G. H.

**V**isne permanere in ista ignorantia? H. Avertat Deus! G. Quid igitur facies? H. Da mihi super hac re consilium, quæso. G. Imprimis Deum sapissime & ex ani-

mo peccare ; deinde semper attentus esto : hoc est, diligenter audito quicquid docetur, sive præceptor loquatur, sive aliquid reddant condiscipuli tui ; postremò, charitatem diligenter cole. H. Quibus modis ? G. Neminem neque lædito, neque offendo ; nemini invideto ; neminem odio habeto ; sed contrà, omnes dilige tanquam fratres ; ac bene omnibus, quoad poteris, facito. H. Quid illa mihi conferent ad studiorum profectum ? G. Plurimùm. H. Quomodo ? G. Sic enim Deus tibi illuminabit ingenium, memoriam, ac cæteras animi dotes augebit ; denique studia tua ità promovebit, ut majores in ea re progressus indiès facias. H. Consilium mihi sanè das optimum ; utinam in Dei ipsius gloriam uti perpetuò valeam, tibi que aliquando referre gratiam ! G. Non opto, ut mihi aliud gratiæ eo more referas, nisi ut Deum sæpenumero laudes, studiâque honesta semper prosequaris, atque ità ad divinarum literarum cognitionem tandem pervenias.

## COLL. 67.

*Castellanus, Messardus.*

**Q**uid egisti per hos quindecim dies ? M. Ministravi matri, quæ graviter ægorabat. C. Ain' tu ? M. Sic est profectò. C. Quo laborabat morbo ? M. Febre tertianâ. C. An convaluit ? M. Paulatim convalescit : grati Deo. C. Quis eam sanavit ? M. Medicorû summus. C. Quis ille ? M. Ipse Deus. C. De hoc nihil dubito ; sed cujus operâ ? M. Domini Sarasini. C. Is habetur maximi nominis in medicinæ professione. M. Id quotidie probant egregiæ curationes ejus. C. Quibus remediis utebatur in curanda matre tua ? M. Medicamentis. C. Satîs istud intelligo, etiam te tacente. Sed dic planè, quæ fuerunt ista medicamenta ? M. Sine me aliquantisper recordari. C. Sino ; dic tandem quæ reminisceris. B. Duo tantùm nomina mihi occurrunt, clysteres & potiones. C. Quid ista conferunt ? M. Etenim inepte, ità rogas, quasi ego medicinæ operam dederim. Itaque si cupis ampliùs scire, quære tute ipse ab iis potioribus qui ista profitentur, hoc est, à medicis & pharmacopoliis.

C. N.

C. Nè mihi succenseas, oro. M. Cur tu es adeò curiosus?  
 C. Ut ediscam semper aliquid. M. At vide interim nè vo-  
 ceris percontator. C. Audi tamen item pauca. M. Loquere.  
 C. Quamdiu ægrotavit mater? M. Ferè duas hebdomadas.  
 C. Interea ubi erat pater? M. Profectus erat *Londinum*  
 ad mercatum. C. Sed tu, quâ horâ rediisti in Gymnasium?  
 M. Hodie mané. C. Dedisti ne excusationem præceptoris?  
 M. Dedi. C. Quid tibi respondit? M. Factum bene inquit,  
 Tu verò ubi eras? C. Hesterno die rus iveram cum pa-  
 truo. M. Agè, videamus quid simus reddituri horâ secun-  
 dâ: nam ego quodammodo nunc novus sum discipulus.

## COLL. 68.

*Grangerius, Torquetus.*

VIsne ire mictum? T. Sat is otiosè minxi. G. Eamus  
 unâ, quælo, ut parùm fabulemur. T. Tace, inepte, nisi  
 vis accusari. Non est fabulandi tempus; nonne debuisti  
 meire, cùm jentaretur? G. Debui, sed oblitus sum. T. Ito  
 igitur solus, cum bona venia præceptoris: nè sis posthac  
 tam obliviosus. G. Parebo tibi, & meminero.

## COLL. 69.

*Malognodus, Gassinus.*

Quid cogitas *Gassine*? cave tibi obsecro. G. Quid mi-  
 hi cavebo? M. Nè in morbum incidas. G. Quæ ex  
 causa? N. Ex nimia lusûs intemperantia. G. Unde appa-  
 ret periculum? M. Quia totus æstuas, totus sudore mades.  
 G. Rectè & in tempore admones Profectè non sentiebam.  
 M. Desiste, si me audis. G. Audio verò libenter, ac tibi mo-  
 rem gero. Quis enim respuat tam fidele consilium? M. De-  
 terge faciem iudariolo, & indue te celeriter, nè subitum  
 frigus contrahas. G. Habeo tibi gratiam: nam ferè morbis  
 sum obnoxius. N. Quid est causa? G. Infirmitas mea vale-  
 tudinis. Vides enim quàm imbecillo sim corpore. M. Tan-  
 to magis debes tibi cavere. G. Istud probè novi, & parena-  
 uterq; me monet sapissimè. Sed quid agas? naturâ proni-  
 sumus in nostram perniciem. M. O mi *Gassine*, non est volu-  
 ptati serviendum, sed temperantiâ valetudini consulendum.



est. G. Est in promptu carmen *Catonis* in eam sententiam. M. Teneo ; sed de his aliàs. Jam satis indutus es. Non est quòd hìc morèrè diutiùs. G. Vale, *Malognode*, monitor amicissime. M. Vín' tu, ut domum te deducam ? G. Nihil opus est deductione. Ego bellè me habeo, Dei beneficio. M. Mi *Gassine*, curà ut valeas.

COLL. 70.

*Robinerianus, Bobussardus.*

**V**alde miror cur hodie manè non adfueris. R. Quid miraris tantopere ? nihil hìc est novi ; multi ab sunt quotidie, imò ferè horis singulis. R. Atqui victoria tibi erat in manibus. B. Quid ego curo ? Ejusmodi victoria (ut bene dicebat quidam) nihil aliud est quam brevis gloria. R. Sed interim modesti adolescentes hinc ad studia magis incenduntur ; nec tamen inani glorià tumescunt, sed ad honorem Dei referunt quicquid inde laudis accesserit. B. Illud cerè rarò contingit : plures enim sunt, qui victoriis abutantur ad privatam gloriam, quam qui Divini honoris rationem habeant. R. Verisimile dicis. B. Imò verissimum. R. Sed velim mihi dicas, cur absueris. B. Scripsi ad patrem literas. R. Cujus nomine ? B. Matris. R. Dictavitne tibi ipsa ? B. Quid scripisssem, nisi dictasset ? R. Quid continebant literæ ? B. Longum esset tibi narrare. R. Saltem dic earum argumentum. B. Varum, erat & multiplex ; & quid tuà, quæso, scire refert ? R. Nihil. B. Cur ergò tam avide quæris ? R. Animi causà, ut ferè curiosi sumus novi aliquid audiendi. B. Nihil aliud quam garris ; omitte me. R. Ausculta paucis. B. Agè, ausculto ; loquere quid velis. R. Scire cupio ubi sit pater tuus. B. Quasi verò nescias. R. Unde scirem ? B. Cùm tibi sit notissimus, & cùm simus vicini, non putassem te ignorare. R. Dic tandem, quæso. B. Est *Londini*. R. Quando est profectus ? B. Abhinc dies quatuor. R. Quid illic agit ? B. Negotiatur. R. Quando rediturus est ? B. Finito mercatu. R. Ad quod tempus finietur ? B. Roga mercatores ; non est meum curare talia. R. Quid igitur curas ? B. Ut Deum timeam, parentibus obediam, bonas artes cum pietate discam.

discam. R. Næ tu magnificè loqueris ; sed dic mihi seriò ,  
 potèſne res tantas efficere ? B. Egòne iſtud mihi aſſumo ?  
 Quin potius fateor, nè incipere quidem penès me eſſe.  
 R. Quid ergò de te fiet ? B. Deus ipſe ſpiritu ſuo in me  
 operabitur. R. Optimè ſentis : nihil ex te præterea re-  
 quirebam. B. Eſt Deo gratia, cui acceptum reſero quic-  
 quid ineſt in me boni. R. Illud rectà, & laudo equidem ;  
 ne tibi videar nihil aliud quàm garrire. B. Cùm illud  
 dicerem, jocabar ſané. R. Ego ſic accepi ? ſed tu (ut cœ-  
 piſti) perge diſcere, & ſapere. B. Qui mihi dedit fidem,  
 idem (ut ſpero) perfeverantiam dabit. R. Bene ſperas, &  
 ego idem ſpero tecum : itaque pergamus vivere inter  
 nos conjunctiſſimè, ut adhuc fecimus. B. Per me quidem  
 non ſtabit, niſi ope Divinà prorsus ero deſtitutus. R. A-  
 vertat ipſe Deus ! ſed audin' tu horologium ? B. Ut in ipſo  
 tempore ſermonem finiſſimus !

*Duo quæ ſequebantur colloquia de conſilio auſtoris  
 ſunt translata ad finem hujus ſecundi libri.*

## COLL. 71.

*Ruffetus, Monachus.*

U Nde venis ? M. Foris. R. Quid prodieras ? M. Ut e-  
 merem chartam. R. Emiſtine ? M. Emi. R. Quantum  
 emiſti ? M. Scapum. R. Quanti ? M. Quinq; quadrantiſibus.  
 B. Cujus formæ ? M. Minoris. R. Oſtende. M. Vide num  
 bona ſit. R. Bona eſt proſectò ; in quem uſum emiſti ?  
 M. Inepre quæris. Quis eſt chartarum uſus niſi ad ſcriben-  
 dum ? R. Imò alius. M. Quis cedò ? R. Ad merces invol-  
 vendas. M. Intelligebam de charta ſcholæſtica, non de  
 emporetica ; non enim ſum mercator. R. Utimur etiam  
 chartà ad ſiccandum recentem ſcripturam. M. Satiſ ſcio :  
 ſed charta illa eſt bibula. R. Et tamen charta eſt. M. Eſto.  
 R. Eſt ergò multiplex chartæ uſus etiam in ſchola. M. Co-  
 gor fateri. R. Etiam dicam tibi alium uſum, & quidem in  
 ſchola frequentiſſimum. M. Quem ? R. Non auſim dicere  
 ſine præfatione honoris. M. Quid opus eſt inter nos ho-  
 norem præfari ? non enim verba ſœtent. R. Dicam igi-  
 tur quando ità vis. M. Dic liberè. R. Ad tergendas nates

in latrina. M. Illuc non referuntur chartæ puræ, sed jam scriptæ, exque inutiles. R. Quid tum? chartæ sunt tamen. M. At ego de charta pura & nova loquebar. R. Sed interim victus es. M. Sit ita sanè, non me pœnitet disputatiunculæ hujus nostræ. Sed jam à lusu disceditur. M. Et nos ergo loco cedamus.

## COLL. 72.

*Hugo; Brasius.*

**H**ABESNE bonum atramentum? B. Cur istud rogas? H. Ut mihi des aliquantulum. B. Eho, non habes? H. Imò; sed eo non possum scribere. B. Quid obstat? H. Quia nimis spissum est. B. Nescis diluere? H. Non est mihi aqua. B. Dilue vino. H. Multo nimius. B. Quid si aceto dilueres? H. Indè charta perfluere. B. Quis scis? H. Audivi è quodam magistro, qui me docebat scribere. B. Ego verò aliud audivi magis mirum. H. Narra mihi, sodes. B. Quid mihi dabis? H. Bonam aciculam. B. Audi igitur quod ego didici ex quodam pædagogo meo. Atramentum, quod acero liquefactum est, ægrè eluitur. H. Fieri potest; sed interim da mihi parùm in usum præsentem. B. Tene atramentarium tuum bene apertum, ego infundam tibi. H. Ecce! infunde. Vah! quàm liquidum est. B. Fortasse quia non est gummi satis. H. Sed quam decolor! B. Utere si vis, quale quale est; non enim habeo melius. H. Quid igitur faciam? B. Hem! inepte, non potes pennâ tuâ bene miscere? H. Miscui satis; quid possem præterea? B. Infunde rursus in cornu meum. H. Admove proprius; éstne satis? B. Comprime pennâ linteo- lum. H. Ità compressi ut ferè sit aridum; quid erit tandem? B. Atramentum bonum, aut certè mediocre. H. Bonum est mediocritatis regula, ut ex præceptore didicimus. Sed nunquid ex duabus malis rebus confici potest aliquid boni? B. Ubi miscuero, & tibi rursus infudero, videbis experimentum. A. Ardeo istud videndi desiderio. B. Porrige nunc atramentum tuum. H. Ecce! infunde. Ohe, jam satis est; quæ isthæc est profusio! Ph. Mihi dedisti quàm tibi retinueris. B. Commisce iterum etiam

II.  
jam  
ta-  
Sed  
uta-  
. Et  
  
gas ?  
des ?  
lat ?  
on est  
id si  
scis ?  
bere,  
nihi,  
Au-  
ro. A-  
nitur.  
præ-  
n, ego  
idum  
m de-  
nabeo  
poter  
offen  
dmo-  
inteo-  
it tan-  
J. Bon-  
cimur  
st al-  
ro, vi-  
derio  
infun-  
! Pla-  
terum  
etiam

etiam atque etiam. H. Nunquam posset coquus sua jura  
& condimenta melius confundere. B. Jam tandem facito  
periculum. H. Dic mihi aliquam sententiam, ut interim di-  
scam aliquid. B. *Experientia* (ut vulgò dicitur) *est rerum*  
*Magistra*. Habes. H. Dictò citius. B. Videlicet jampridem  
tenebas. H. Quis illud ignoraret, quod est adeò vulgare ?  
B. Nunc videamus. H. Res apparebit melius ubi scriptu-  
ra bene desiccata fuerit. B. Quid vis expectare ? Jam sicca-  
ta est plus satùs. H. Oh, vide quàm nigra sit. B. Dixine  
verè ? H. Aliquando periculum feceras scilicet. B. Con-  
stabit igitur experientiam esse rerum magistram. H. Quin-  
etiam hinc experimur ex rerum commixtione bonum fieri  
temperamentum. B. Jam incipis altiùs philosophare ; itaq;  
discedo. H. O longum sermonem de nihilo ! B. Nihil me  
pœnitet ; alioquin inertio otio torpuissemus.

COLLOQUIORUM  
SCHOLASTICORUM  
LIBER III.

Cui sunt magistri colloquia cum discipulis.

Admonitio.

*Hæc pueris ita legenda erunt, ut ex duobus legentibus,  
unus discipulum, alter præceptorem agat.*

COLLOQ. I.

*Unus ex Discipulis, Præceptor.*

Salve, præceptor. P. Salve per *Jesum Christum*. An  
surrexerunt omnes ? D. Omnes præter parvulos.  
P. Nunquis ægrotat ? D. Nemo, gratia Deo. P. Quid a-  
gitur ? D. Alii se induunt, alii jam student graviter. P. Ad-  
estne vobis hypodidascalus ? D. Jamdudum. P. Itē igitur  
precatum, vosque diligenter commodate Domino

Deo per *Jesum Christum*, deprecatores nostrum; deinde pergite in studiis vestris, usque ad horam jentaculi. D. Ità solemus præceptor. P. Credo equidem; sed quia ferè somnulosi estis ac negligentes, idcirco ego vos admoneo sæpius. D. Gratiam habemus, præceptor humanissime. Nunquid vis præterea? P. Dic famulo, ut togam adferat.

## COLL. 2.

*Iudimagister, Discipulus.*

**A**dfuisti-ne hodie concioni sacrae? D. Adfui. L. Qui sunt testes? D. Multi ex condiscipulis, qui me viderunt, testari possunt. L. Sed producendi erunt aliquot. D. Producam cum jubebis. L. Quis habuit concionem? D. Dom. N. L. Quotâ horâ incepit? D. Septima. L. Unde sumpsit thema; D. Ex Epistola *Pauli ad Romanos*. L. Quotâ capite? D. Octavo. L. Adhuc bene respondisti: nunc videamus quid sequatur. Ecquid memoriæ mandasti? D. Nihil quod referre possum. L. Nihilne? cogita paulisper, & vide nè turberis; quin esto animo bono. D. Certè præceptor, nihil possum reminisci. L. Nè verbum quidem; D. Nihil prorsus. L. Hem, verbero! Quid igitur profecisti? D. Nescio, nisi quòd fortasse interim à malis abstinui. L. Illud quidem est aliquid, si modò fieri potuit, ut malo omnino abstinueris. D. Abstinui quoad potui. L. Fac ità esse; non tamen satisfacisti Deo, cum scriptum est, *Declina à malo, & fac bonum*. Sed dic mihi; quæso, quâ gratiâ illuc iveras potissimùm. D. Ut aliquid addiscerem. L. Cur id non fecisti? D. Non potui. L. Non potuisti nebulo! imò noluisti, aut certè non curasti. D. Cogor fateri. L. Quæ res te cogit? D. Conscientia mea, quæ me accusat apud Deum. L. Rectè dicis; utinam ex animo! D. Ecquidem ex animo dico. L. Ità fieri potest; sed agè, quid fuit causæ, quamobrem nihil memoriæ mandaveris? L. Negligentia mea: non enim diligenter audiebam. D. Quid igitur faciebas? D. Identidem dormiebam. L. Ità soles; sed quid agebas reliquo tempore? D. Cogitabam mille ineptias, ut solent pueri. L. An



tu adeò puer es, ut non debeas attentus esse ad verbum Dei audiendum? D. Si attentus essem, possem aliquid proficere. L. Quid igitur meruisti? D. Verbera. L. Meruisti profectò, idq; largissimè. D. Ingenuè confiteor. L. Verbo tenus, opinor. D. Imò certè ex animo. L. Fortasse, sed interim para te ad plagas accipiendas. D. Ah Magister, ignosce obsecro. Peccavi fateor, sed nulla ex malitia. L. Atqui tam supina ista negligentia proximè ad malitiam accedit. D. Non equidem inficior; sed tuam imploro clementiam per *Jesum Christum*. L. Quid igitur facies, si tibi ignovero? D. Faciam officium meum posthac, ut spero. L. Addendum erat, Deo juvante; sed id parùm curas. D. Imò magister, adjuvante Deo, præstabo posthac officium. L. Agè, condono culpam tuis lachrymis; tibi que eà lege agnosco, ut promissi memineris. D. Gratias ago, magister humanissime. L. Eris apud me in maxima gratia, si promissa servaveris. D. Faxit Deus optimus maximus ut possim. L. Faxit precor.

## COLL. 3.

*Nathaniel famulus, Magister.*

**M**agister, nemo est qui doceat in sexta classe. M. Quid hoc rei est? ubi est magister *Philippus*? N. Morbo detinetur in lecto. M. Quà scis? N. Nuntiavit quidam ex discipulis ejus domesticis. M. Dic hypodidascalo meo. N. Non est in musæolo suo. M. Quà scis? N. Nam ego ter aut quater pulsavi ostium. M. Dic primæ classis doctori, ut mittat è suis aliquem. N. Quid si nollet mittere? M. Abi, inepte; an putas eum esse tam imprudentem ut recuset? Abi, propera.

## COLL. 4.

*Antonius, Magister, Discipuli.*

**M**agister. M. Hem! quid est? A. Sunt quidam, qui te conventum volunt. M. Ubi sunt? A. Te expectant in vico. M. Nunc adibo. A. Atqui urgent. M. Præcurre tu, atque eos intromitte in aream; ego te sequar: vos interim expectate cum silentio. Mox ego adero, ut vos ad coenam dimittam. D. O quam bonum verbum!

## COLL.

## COLL. 5.

*Canellus, Præceptor.*

**P**Ræceptor, quid reddemus cras manè? P. Hodie manè palam dixi ante è schola missionem. C. At ego non aderam, præceptor. P. Roga condiscipulos. Nam si velent singuli me interrogare de rebus à me palam dictis, quæso, quando finis esset? Itaque fac sis posthac prudentior. C. Curabo pro viribus. P. Sed tu ubi eras? C. Prodi-eram. P. Quid prodieras? C. Ut curarem negotium aliquod, de quo pater ad me scripserat. P. A quo petivisti veniam? C. Ab hypodidascales. P. Cur non à me potiùs? C. Quia eras occupatus. P. Quid agebam? C. Alloquebaris in area quosdam viros honoratos, qui te conventum venerant. P. Abi, nunc recorder.

## COLL. 6.

*Præceptor, Famulus, Observatores.*

**H**Eus! Martine. F. Hem! præstò sum, here. P. Accerse mihi huc quinque publicos observatores quos hesterno die in hunc mensem elegi: nostin? F. Optimè, nam egomet aderam. P. Sunt (opinor) in suo quisq; auditorio: festina. F. Quamprimum rediero. O. Adsumus omnes præceptor. Quid tibi placet imperare? P. Satè erat jubere; nec enim sum imperator nec magistratus. Ego vos huc accertendos jussi, ut vos officii vestri commonefacere. Vos igitur attentis auribus atque animis audite. Non ignoratis quanto cum timore Domini hesterno die palam in aula nostra communi vos elegerim, auspicati sumus à sacris precibus, secuta est admonitio nostra atq; exhortatio ad omnem cætum scolasticum de timore Domini deque moribus, qui deceant studiosos in schola quotidie versantes; deinde, non sine optimorum adolescentium testimonio vos elegi quinque, quos ad hoc munus idoneos existimavi: postremò, ventum est ad secundam cum gratiarum actione precationem. Nè igitur putetis ludum fuisse aut jocum actionem illam, in qua nomen Domini tam studiosè fuerit invocatum. Ac licèt apud imperitos aut arrogantes hoc munus & vile & abjectum

vide-

videatur, vos tamen credite cū honorificum tum sanctum esse vestrum illud ministerium. Quod si aliter existimabitis, fieri non potest, ut munere vestro rectē fungamini. Itaque ego vos hortor, quantum possum, & per Jesum Christum obtestor, ut cū Dei timore atque reverentia diligentiam præstetis in iis omnibus, quæ intelligetis ad officium vestrum pertinere. A vobis igitur absit omnis favor, odium, gratia studium vindicandi, & similia quæ transverlos agunt homines, & sincerum corrumpunt iudicium. Nè timeatis improborum minas quibus illi animos adolescentium ab officio solent abstertere. Quam enim habent in vos potestatem? potius eum timeate, qui vester est Dominus, qui vitæ ac necis potestatem habet. Illius (inquam) tanti Principis timor vobis ob oculos semper observetur: incurretis (scio) in aliquot improborum ac dissolutorum odium; sed pluris sit vobis unius Patris vestri cælestis amor & charitas, quam omnes omnium hominum inimicitia. Estote semper memores verbi illius, quo Servator noster & summus præceptor suos discipulos ad constantiam hortabatur: *Si vos* (inquit) *Oditi mundus, scitote quod me prius odio habuerit.* Vos igitur propter ipsum Christum, omnes flocci facite nebulonum minas, offensiones, inimicitias; dummodo gloriæ Dei possitis inservire fideliter. Hæc sunt, de quibus nunc pro temporis brevitate vos admonendos esse existimavi, præter illa, quæ vos in aula hesterni die audivistis. *Primus Ob.* Maximas tibi gratias agimus, præceptor humanissime, & Christum precamur, ut sua dona tibi semper adaugeat. A te verò vehementer petimus, ut (si tibi molestum non est) præscriptam des nobis hortationem tuam. quò illam inter nos quandoque relegentes memoriæ tenaciùs infigamus. P. Id ego faciam primo quoque tempore, quandoquidem rem sanè honestissimam postulatis. *Primus Ob.* Optamus etiam à te (si placet) commentariolum scriptum habere de præcipuis officii nostri capitibus, ut simus certiores quid potissimum sit nobis hac in re observandum. P. In ipso tempore de hoc admones,

& sic ego jampridem in animo habebam, sed me quotidie aliud ex alio impedivit. Dabo igitur ejusmodi commentariolum, quod videlicet contineat quicquid ad observatorum publicorum officia pertinebit; id autem describeris ex ipso archetypo meo, quod ideo servare volo, ut cæteris quoque tradere possim futuris observatoribus. Nunc redite in suum quisque auditorium. *Ob. Rectà imus, præceptor.*

## COLL. 7.

*Clericus, Magister.*

**L** Icétne, magister, ut ego & patruelis eamus domum? **M.** Quid eo? **C.** Ad nuptias consobrinæ. **M.** Quando est nuptura? **C.** Crastino die. **M.** Cur tam citò vultis ire? **C.** Ut mutemus vestimenta. **M.** Per me licet eatis; hâc tamen lege, ut cras huc redeatis cubitum. **C.** Quid si volet patruus ut expectemus repotia? **M.** Non detinebit vos, satis scio, dummodo dicatis ei quâ lege dimiserim. **C.** Verum fatebimur. **M.** Abite, & ab omni cavere intemperantia; facitèque ut *Luceat lux vestra coram hominibus, ut glorificetur vester ille celestis Pater.* **C.** Ità quidem speramus fore, ipso nos omnibus adjuvante.

## COLL. 8.

*Laurentius, Magister.*

**L** Icétne exire, magister? **M.** Quæ tibi est exeundi causa? **L.** Ut quæram in foro aliquem ex nostratibus. **M.** Quid istud opus est? **L.** Mandare illi volo, ut meos admoneat de pane mihi aut adferendo, aut mittendo. **M.** *Ubi panis deficit, omnia sunt illuc venalia.* **L.** Istud vulgatum est apud nos proverbium. **M.** Imò ubique pervulgatum, adeò panis mortalium vitæ est necessarius. Sed ad rem: tu nunc prodire vis? **L.** Si tibi placet, magister; mei negotii occasionem amittam. **M.** Abi, & festina ante prandium redire. **L.** Dabo equidem operam.

## COLL. 9.

*Beatas, Præceptor.*

**L** Icétne mihi exire unâ cum fratre? **P.** Quid causæ est? **B.** Ut mater emat nobis calceos; deinde ut conforem

forem adeamus. P. Quid eó? B. Refectum capillos. P. Quid nunc opus est? B. Ut cras (si Dominus permiserit) invitamus patrum. P. Ite, & maturè redite ad studium. Sed, heus pueri! adferte mihi à matre testimonium in crastinum diem, aut testem adducite. B. Deo juvante, id curabo diligenter. Nunquid aliud vis, præceptor? P. Ut meis verbis matrem officiosè saluteris.

## COLL. 10.

*Albertus, Præceptor.*

PRÆceptor, licétne nobis ire ad tonsorem? P. Quid eó? A. Ut capillum tondeamus. P. Libenter quotidie exiretis sexies; quin expectate in crastinum diem, ut eatis unà cum cæteris. A. Atqui propter forum turba erit in constrictina. P. Quid tum? satis habebitis otii ad expectandum. Recipite vos ad studium. A. Ut libet, præceptor.

## COLL. 11.

*Bargius, Præceptor.*

PRÆceptor, accersor à Patre. P. Ubi is est? B. In diversorio. P. Quando venit? B. Advenit modò. P. Quis tibi tam citò nuntiavit? B. Misit ad me famulum. P. Ubi est? B. Præforibus me expectat. P. Cur illum non intromisisti? B. Noluic intrare. P. Quid ità? B. Quia (ut ait) festinatione urgetur. P. Voca illum, ut paucis conveniam; deinde abi: sed cura ut quamprimùm huc adsis. B. Eo vocatù.

## COLL. 12.

*Ludimagister, Rusticus.*

UBI est *Mortinus*? R. Ivit ad forum. L. Quid eó? R. Emptum, ut dixit, cingulū. L. Injussu meo exire non debuit; sed hoc nihil ad te. Quis dabit vobis merendam? R. Dixit se horà secundà revertiurū, ut det nobis. L. Quid si fallat? R. Id non est moris ejus. L. Nisi ad horam adfuerit, admone uxorem de vestra merenda: habet enim clavem alteram cellæ penuariæ.

## COLL. 13.

*Præceptor, Scarronus.*

DEmiror unde nunc venias. S. Domo redeo, præceptor. P. Cur iveras domum? S. Peritum merendam. P. Quam-



P. Quamobrem non attuleras? S. Mater erat occupata.  
 P. Quid tum? debuisti exire injussu meo? S. Non debui, fateor. P. Quid igitur meruisti? S. Plagas accipere; sed ignosce mihi, quæso, præceptor. P. Cur non petivisti eundi potestatem? S. Quia non audebam te interpellare.  
 P. Quid agebam? S. Tenebas libellum quendam, & legebas aliquid. P. Fieri potest; sed vos tamen sæpe me interpellatis ob rem leviolem: nunc igitur para te ad vâpulandum. S. Parce mihi, obsecro, præceptor. P. Sine ut prius cogitem aliquantisper. Agè, parco, tum quia ingenue confiteris, tum quod satis studiosus mihi videris. S. Gratias ago maximas, præceptor humanissime.

## COLL. 14.

*Gulielmus, Ludimagister.*

P. Præceptor, non restat mihi charta ad scribendum; visne dare codicem? L. Quem in usum? G. Partim ad colloquia, partim ad exemplaria. L. Retulisti in codicem tuum? G. Retuli. L. Ostende. G. Ecce tibi, præceptor. L. Quid istud? retulisti octodecim: vis ergo de majore? G. Si tibi placet. L. Pete à famulo; ac, nè dubitet, ostende illi tuum codicem, ut idem in suum referat. G. Audio. L. Audi item: cave abutaris chartâ, nè tibi pater graviter succenseat. G. Faxit Deus, ut bene utar.

## COLL. 15.

*Grivetus, Ludimagister.*

P. Præceptor, licetne prodire? L. Quamobrem? G. Ut etiam cultellos mensarios. L. Ubi sunt, quos habebas? G. Reliqui domi. L. Quid ita? G. Quia jam obtusi erant & inutiles. L. Habetne pecuniam ad emendos alios? G. Mater dedit mihi. L. Quis erit adjutor ad emendum? G. Gerardus. L. Ite sanè, & cavete nè vobis imponatur. G. Cavebimus, Deo juvante. L. Omnes quidem juvat, sed eos potissimum, qui ad ejus honorem omnia referunt.

## COLL. 16.

*Vernetus, Ludimagister, Spatula.*

P. Præceptor, licetne pauca? L. Loquere. V. Nos duo proponebamus, si tibi ita videretur, ire, dum cæteri ludunt,

ludunt, foràs ambulatorum. L. Quò vultis exire? V. In proxima suburbana. L. Quid autem ageris ambulantes? S. Traſtabimus colloquium aliquod. D. Sed de bonis & honeſtis rebus. S. Hæc temporis ſerenitas & tam pulchra terræ facies præbebunt nobis honeſtum aliquod argumentum. D. Nunquam deest Dei laudanda materia, duntaxat veriſejus cultoribus. V. Nunquam profeſſo; ſed ut ad propositum revertamur, permittis nobis præceptor extra urbem prodire? D. Niſi mihi perſpecta eſſet veltta perpetua fidelitas, & verus amor literarum, nunquam permetterem; præſertim cum pravi adoleſcentes me ſæpe in hoc genere ſeſſellerint. Vos igitur prodite, & maturi ad cænam revertimini.

## COLL. 17.

*Iſaiæ, Ludimagiſter.*

**P**æceptor, licetne prodire? L. Quò prodire cupis? I. Ad ſartorem. L. Quid eò? I. Petitum femoralia. L. Jàmne facta ſunt? I. Sunt, opinor. L. Rectè *opinor* dicis, quia res incerta eſt. I. Atqui promiſerat mihi in hunc diem. L. Quid ſi fallat? I. Nihil mirum fuerit. L. Nunc quoque verè loquutus es: nam rarò ad promiſſum tempus fidem præſtant artiſices. I. Viſo tamen, præceptor, ſi mihi permittis. L. Nihil impedio. I. Nunquid vis præceptor? L. Imò, ut properes, nè deſis prælectioni. I. Bene mones, abeo.

## COLL. 18.

*Caius, Præceptor.*

**L**icetne prodire? P. Quò? C. Domū. P. Hem tam ſæpe ire domū? C. Mater juſſerat, ut ego & frater ſe adiremus hodie. P. Cujus rei gratiâ? C. Ut ancilla veſtimenta nobis excuteret. P. Quid illud! Sūntne vobis pediculi? C. Et multi quidem. P. Cur uxorem meam non admonuiſtis? C. Non auſi ſumus. P. Quafi verò illa ſit uſque adeò difficilis. Ancillam habet eâ potiſſimum gratiâ, ut veſtram omnium curret munditiem: nec vos ignoratis illud; ſed gaudetis matris inviſendæ occasionem vobis dari.

Vos

Vos igitur manete; cras ego curabo, ut vobis excutiantur vestes. C. Sed mater nos objurgabit. P. Egomet eam placabo; quiescite.

## COLL. 19.

*Tornator, Ludimagister, Discipuli.*

**P**raeceptor, licetne cras ire domum? L. Quid eo? T. Peritum panem. L. Non tibi Restat? T. Restat quidem, sed parum admodum. L. Quid frater? estne tecum iturus? T. Jussit pater. L. Quando convenisti illum? T. Die *Jovis*, cum venisset in hanc urbem. D. Ubi illum vidisti? T. Apud forum. L. Non mentiris? T. Non mentior. L. Unde probabis? T. Sunt ex discipulis, qui aderant. L. Qui tandem? T. Adsunt: *Elaſius* & *Audax*. L. Estne verum, pueri? D. Omnino verum. L. Quis scitis? D. Vidimus ejus patrem, audivimus ipsa verba. L. Si ita est, permitto ut eas domum cum fratre. T. Vale praceptor. L. Vos servet Dominus Deus. T. Idem tibi precamur ex animo. L. Sed heus! quando huc aderitis? T. *Crastino* die, *vesperi*, Deo juvante. L. Cura, ut promissi memineris. T. Curabo. L. Scilicet, ut soles. T. Imò melius, spero. Nunquid vis? L. Ut verbis meis salutem dicas parentibus. T. Faciam libenter; iterum vale praceptor. L. Vos quoque valete, & lento gradu ambulate, propter aestum solis. T. Ita facere solemus.

## COLL. 20.

*Magister, Villarianus.*

**Q**uid sibi vult, quod abfueris hanc tota hebdomada? V. Oportuit me manere domi. M. Quamobrem? V. Ut matri adessem, quae aegrotabat. M. Quod illi officium praestabas? V. Saepius ei legebam. M. Quid legebas? V. Aliquid ex sacris literis. M. Sanctum istud & laudabile ministerium. Utinam sic omnes studerent verbo Dei! Sed quid? nihil agebas praeterea? V. Quoties opus erat, illi ministrabam cum ancilla. M. Haecine vera sunt omnino! V. Habeo testimonium. M. Profer illud. V. Ecce! M. Quis scripsit? V. Famulus noster, matris nomine. M. Agnosco ejus manum, quia saepe ab illo mihi attulisti. V. Licetne igitur

cur redire in sedem meam? M. Quidni liceat, cum mihi  
satisfeceris? V. Gratias ago, præceptor.

## COLL. 21.

*Lætus, Hypodidascalus.*

Præceptor, licetne mihi prodire? H. Quæ tibi est pro-  
deundi causa? L. Est mihi eundum ad forum. H. Quid  
eo? L. Ut emam corium. H. In quem usum? L. Ad cal-  
ceorum soleas. H. Quis te adjuvabit in emptione? L. Qui-  
dam oppidanus, cui hoc mandavit pater meus. H. Debue-  
ras adire me cum cæteris, qui ad forum prodierunt. L. Oc-  
cupatus eram. H. Quæ in re? L. In scribendis ad patrem  
litteris. H. Quando eas dabis? L. Hodie, si quem in foro  
nostratium offendero. H. Abi; & memineris ad horam  
solitam adesse. L. Meminero.

## COLL. 22.

*Arator, Ludimagister.*

Præceptor, tuo permissu horâ primâ prodieram; nunc  
redeo. L. Curasti negotium tuum? A. Curavi, gratia  
Deo. L. Factum bene. Quota est hora? A. Instat secun-  
da. L. Voca mihi famulum; deinde ito ad merendam cum  
cæteris.

## COLL. 23.

*Eusebius, Præceptor.*

Præceptor, visne mihi mutuò dare aliquantulum pecu-  
niæ? P. Quid opus est tibi pecuniâ? E. Ut *Sylvio*  
satisfaciam. P. Quantum debes illi? E. Assen cum se-  
mis. P. Quo nomine? E. Quia scripsit mihi aliquot col-  
loquia. P. Ostende. E. Vide, si placet. P. Adi hypodi-  
dasculum, dic ut det quantum petis. E. Gratias ago,  
præceptor. P. Non est quod agas; sed refer in codicem  
tuum. E. Quin jam retuli. P. Factum bene; ostende ipsi  
hypodidascalo.

## COLL. 24.

*Blasius, Ludimagister.*

Præceptor, licetne mihi, præceptor, adire tutorem? L. Quæ te  
causa movet? B. Jusserat ille, ut se hodie convenirem,  
si liceret per otium. L. Quando jusserat? B. Nudiustertius.

L. Ubi illum vidisti? B. In area, quæ est è regione templi.  
 L. At Vide ne mentiaris. B. A me absit mendacium. Si vis  
 dabo testes ex condiscipulis, qui mecum aderant. L. Qui  
 sunt illi? B. *Daniel & Corderius*: vísne ut eos accersam?  
 L. Mane, ego illos conveniam. Sed dic quid eget tutor  
 operâ tuâ? B. Ad aliquid scribendum. L. Quâ igitur  
 horâ vis illum adire? B. Nunc, si tibi placet. L. Quando  
 huc redibis? B. Cùm primùm me dimiserit. L. Nunc abi,  
 atq; illi ex me dic salutem plurimam. B. Faciam libenter.

COLL. 25.

*Scriba, Magister.*

**P**ræceptor, pater te invitat ad prandium, si tibi placet.  
 M. Estne solus? S. Solus (opinor) præter domesticos.  
 M. Excusa me illi, jam enim aliunde invitatus eram.  
 Age tamen illi meis verbis gratias. S. Nunquid vis aliud?  
 M. Nihil. nisi ut maturè ad scholam redeas. S. Maturè,  
 juvante Deo.

COLL. 26.

*Gaspar, Ludimagister.*

**L**icétne prodire, præceptor? L. Quó? G. Primùm ad  
 sartorem, deinde ad tonsorem. L. Cur ad sartorem?  
 G. Ut curem tibialia reficienda. L. Sûntne lacerata? G. A  
 deò lacerata; ut vix induere possim. L. Cur ad tonsorem?  
 G. Ut illi ostendam ulcus, quod mihi his diebus subortum  
 est in femore. L. Detege, ut videam. G. Vide, quando itâ  
 placet. L. Est furunculus. G. Itâ conjiciebam. L. Cùm  
 aperueris tonsoni, roga illum ut emplastrum ulceri aptum  
 adhibeat. G. Faciam quod suades. L. Sed nunquis est, qui  
 tecum prodire velit? G. Imo *Johannes Fluvianus*. L. Quod  
 habet negotium? G. Tonsorem quoque vult adire. L. Itē  
 igitur unâ & redite similiter. G. Nunquid vis præterea?  
 L. Ut maturetis reditum, nè merendâ vestrâ mulctemini.

COLL. 27.

*Franciscus, Ludimagister.*

**P**ræceptor, licétne nobis prodire? L. Est isne multi, qui  
 prodire vultis? F. Ferme omnes. L. Quid hoc sibi  
 vult? F. Est hodie mercatus; indè fit, ut ferè sibi quisq;  
 velit



velit aliquid emere. L. Nunc ego sum occupatior, quàm ut singulorum prodeundi causam possim cognoscere; adite igitur subdoctorem, qui cognoscat; & si vacat, vos deducat ipse. F. Gratias agimus, præceptor humanissime.

COLL. 28.

*Magister, Theophilus.*

**H**odie igitur *Petrum* convenisti? T. Hodie. M. Ubi? T. In templo. M. Quotâ horâ? T. Octavâ matutinâ. M. Nunquid rogâsti quando sit rediturus scholam? T. Rogavi. M. Quid ille? T. *Nescio*, inquit. M. Debuiisti illum ad reditum exhortari. T. Id ego feci & multis quidem verbis. M. Bene fecisti: sed quid ille respondit? T. Se adhuc à patre detineri ad fructus colligendos. M. Quid si ad ipsum patrem scribas de statu nostro scholastico? fortasse enim movebitur, ut filium citius remittat. T. Si tibi itâ videretur faciam, idque diligenter. M. Fac igitur primo quoque tempore; sed audi, scribe plenissimè, deinde literas tuas mihi ostende priusquam des perferendas. T. Sedulo faciam, præceptor.

COLL. 29.

*Ferrarius, Magister.*

**P**ræceptor, licétne mihi exire? M. Quò tibi eundum est? F. Ad tonsorem. M. Non est tibi aliud negotium? F. A tonsore, ire emptum ligulas; illinc me ad sutorem conferre. M. Cur ad sutorem? F. Ut uni ex calceis meis annectat corrigiam. M. Ita omnia quando confeceris? F. Intra horæ spatium, ut spero. M. Erunt multi fortasse in constrictina expectantes. F. Fieri potest; sed si videro diutius mihi morandum illíc esse, expectabo in diem *Sabbati*. M. Estne alius, qui prodire velit? F. *Pontanus* ait se venie chartam emere. M. Scisne illi opus esse? F. Scio. M. Ite igitur unâ? curate diligenter suum uterq; negotium; nè sitis cessatores. F. Deo juvante, cavebimus.

COLL. 30.

*Carbonarius, Præceptor.*

**L**icétne exire? P. Quò? C. Ad sartorem. P. Quid eo? C. Ut mihi tunicam faciendam metiatur. P. Quæ tibi

est materia? C. Nigri panis. P. Ubi est? C. In arca mea. P. Sartor autem quis tibi est? C. Petrus Sylvius. P. Estne peritus artifex? C. Sic audiui; & est notus patri meo, qui iussit, ut illum adirem. P. Ubi habitat? C. In vico Xenodochii. P. Non nimis longè est; cave discurras. C. Cavebo. P. Facile à me veniam impetrant, qui nunquam fallunt. C. Avertat Deus ut unquam fallam.

## COLL. 31.

Luterinus, Præceptor.

**P**RÆCEPTOR, licetne pauca? P. Loquere quid velis. L. Cùm interdum dicis alicui nostrum, *ubi est follis?* vel *Cedò follem*; non apparet utrum *follis* sit masculini, an foeminini generis. P. Non apparet, fateor; quid tum? L. Unda igitur scire possumus? P. Cur me de hoc nunquam rogasti? L. Tam multa tam sæpe interrogamus, ut vereamur nè tibi molesti simus. P. Quasi verò istud unquam præ me feram; contrà, eò magis amo vos, quo me rogatis sæpius. Quid enim magis cupio, quam ut aliquando vos videam & optimos & doctissimos? L. Habemus gratiam maximam, præceptor humanissime. P. Eam gratiam ego & vos Deo nostro debemus, qui solus suâ bonitate utrisque bonam dedit voluntatem. L. Faxit ille ut hoc beneficio rectè semper utamur in ipsius gloriam. Sed dic, quæso, cujus generis est *follis*? P. Masculini. L. At ego potiùs foeminini dixissem. P. Quamobrem? L. Quia tale est *pellis*, quod est in *Rudimentis* pro exemplo positum. P. Non abs re id conjiciebas. Nam *is* finita, quale est *pellis*, magna ex parte foeminini sunt. L. Non igitur omnia? P. Vix ulla est tam generalis regula, quæ exceptione careat. *Follis* igitur sub exceptione cadit, quia masculinum est. Sic aliquot alia; ut *ignis*, *piscis*, *axis*, &c. L. Sed unde illa dignoscam? P. Facile cognoscas, cùm perveneris ad *Grammaticæ* regulas. Sed interim Latine loquentes attentè observa, tèque ad eorum imitationem diligenter accommoda. L. Ad istud longum est, præceptor. P. Non sunt nisi longo tempore præclara ædificia. L. Expe-

L. Experientia nos istud docet. At pater meus vellet me annuo spatio doctum videre. P. Ego verò istud unius diei spatio videre vellem. Sed quid agas? omnibus in rebus expectandum tempus est. Pater tuus, quia non didicit literas, nescit quid doctrina valeat, neque quantis laboribus illa comparetur. L. Verum dicis; sed quid illi respondere possum, cum apud me conqueritur de temporis longi spatio in discendis literis? P. Docebo te inter coenandum, nunc ito lulum cum cæteris, ut me in musæum recipiam. L. Ignosce mihi, quæso, præceptor, quod te interpellaverim. P. Nihil me interpellasti, non enim occupatus eram. Præterea. si te audire mihi molestum fuisset, nonne poteram te in aliud tempus rejicere? L. Tuo jure id poteras. P. Abi igitur.

COLL. 32.

*Castronovanus, Præceptor.*

SALVUS sis, præceptor. P. Auspicatò advenis: quid nuntias? C. Orat te pater meus, ut animi causâ eamus unâ in hortos suos suburbanos. P. Ad eam rem nos invitat serenitas, & nunc sumus feriati. Sed quid illic aspectu jucundum videbimus? C. Varias & pulchras arbores cum suis fructibus, item herbarum & florum miram varietatem. P. Nihil est illis rebus hoc tempore jucundius. C. Ea est Dei erga nos beneficentia. P. Quem quidem assiduus laudibus prosequi debemus. C. Sed vereor nè patri in mora simus. P. Tantisper expecta dum togam muto, ut sim ad ambulandum expeditior. Jam paratus sum; nunc eamus. Sed estne domi pater? C. Præ foribus nos expectat. P. Bene res habet, vide ut eum decenter salutes. C. De hoc, te docente, sæpe admoniti fuimus.

COLL. 33.

*David, Ludimagister.*

PATER meus tibi salutem plurimam dicit. L. Ain tu? quando rure rediit? D. Heri tantum. L. Ut valet? D. Optimè. L. Mater verò ubi est? D. Adhuc est in Gallia. L. Ubi in Gallia? D. Aureliæ. L. De illa quid auditis? D. Esse bonâ valetudine præditam, Dei beneficio. L. Do-

minus Deus conservet eam. D. Ità precor. L. Dic vicissim patri salutem plurimam verbis meis. D. Faciam sedulò.

## COLL. 34.

*Bacchodus, Ludimagister.*

**P**ræceptor, licetne pauca? L. Dic liberè. B. Cur non dicimus *hic arbor*, sicut *hic labor*? Item cur genitivum *arboris* non proferimus penultimâ longâ, ut ferè in cæteris nominibus terminationis ejusdem? L. Quia loquendi usus aliter probavit. Nec enim ubique locum habet analogia: sed, ubi ea deficit, sequendus est eorum usus, qui rectè & purè loquuti sunt. Nam ipsa *Latinitas* usu & autoritate magis quàm ratione constat. B. Da igitur auctoritatem de nomine *arbor*. L. *Arboris exes & truncus*, apud *Virgilium*. Nonne hîc manifestè vides & genus & accentum? B. Video, præceptor. Sed sùntne alia eodem accentu? L. Imprimis *Græca* omnia, ut *Castor*, *Castoris*; sic *Hecior*, *Nestor*, & similia. Item hæc duo neutrius generis, *aquor*, *aquoris*; *marmor*, *marmoris*, sunt & adjectiva quædam, ut *memor*, *memoris*, & ex eo compositum *immemor*. Talia quoque sunt ex *decus* & *corpus* composita, ut *indecor*, *indecoris*; *tricorpor*, *tricorporis*. Sed hæc apud Grammaticos annotata facilè per te invenies. Nam ista ætas tua majorem indies requirit diligentiam. Huc accedit, quòd hæc ipsa, quæ tuo labore & diligentia inveneris, firmiore tenebis memoriâ. B. Ago tibi gratias, humanissime præceptor, quòd me tantâ humanitate non solùm doces, sed etiam admones. L. Bene facis; sed interim volo memineras, soli Deo acceptum referre quicquid boni ex labore meo in te proficiscitur. Frustrà enim docendo laboramus, nisi laboribus nostris divinus favor accesserit. Nôsti istud *Apostoli*; *Neque qui plantat est aliquid, neque qui rigat; sed, qui dat incrementum, Deus*? B. Essemus profectò plumbo stupidiore, si ista ignoraremus, quæ nobis tam sæpe inculcas, tamque diligenter. L. Tantò diligentius vos oportet tum meminisse tum recordari. B. Sed jam tempus est, ut ad quotidianum pensum te referas. Ego verò interea me abdo in musæolum.

## COLL. 35.

Præceptor, Olivarius.

**D**IC *Latine, A book.* O. Liber. P. Liber, cujus generis ?  
 O. Masculini. P. Quis scis ? O. Ex bene loquendi usu  
 & consuetudine. P. Ostende usum. O. Nam quotidie lo-  
 quentes, sic dicimus, *Hic liber cujus est ?* Dicimus item  
*semper numero Liber meus, liber tuus, bonus liber, & similia.*  
 P. Bene respondisti ? sed quis loquendi usum te docuit ?  
 O. Tu ipse, præceptor. P. Ergone tenes omnem usum lin-  
 guæ *Latinae* ? O. Si tenerem, non essem discipulus. P. Quid  
 igitur ? O. Magister fortasse. P. Abi, responso tuo conten-  
 tus sum. O. Gaudeo sane. P. Age gratias Deo, qui tibi  
 dedit ingenium & mentem bonam. O. Utinam semper  
 agnoscam ejus in me beneficia ! P. Utinam ille favore suo  
 tua studia prosequatur ! Quid hoc sibi vult, *Olivari* ?  
 O. Quod mihi bene precaris. P. Ergo tu quoque mement-  
 o bene ex animo precari omnibus, præcipue verò con-  
 discipulis tuis. O. Meminero, præceptor. P. Addendum  
 fuerat, *Deo juvante.* O. Oblitus sum, fateor.

## COLL. 36.

Ludimagister, Daniel.

**A**ttende, *Daniel*, discas ut *Latina* bene *Anglicè* vertere.  
 D. Attendo, præceptor. L. At diligenter. D. Imò  
 diligentissime, & ex animo. L. Bene facis. D. Propone  
 igitur mihi *Latina* ut nobis interdum soles. L. *Quid opus*  
*est ?* D. *What is needful.* L. *Gallina.* D. *To an hen.* L. *Ut*  
*D. That.* L. *Illà.* D. *She.* L. *Sit.* D. *May be.* L. *Bona.*  
 D. *Good.* Rectè vertisti. Nunc ad singulas partes hujus  
 orationis responde nominatim. D. Respondebo quoad  
 potero, dummodo mihi præieris. L. *Quid.* D. Est nomen.  
 L. *Opus.* D. Nomen. L. *Est.* D. Verbum. L. *Gallina.* D. No-  
 men. L. *Ut.* D. Conjunctio, in hoc loco. L. *Illà.* D. Prono-  
 men. L. *Sit.* D. Verbum. L. *Bona.* D. Nomen. L. Agè, dica-  
 mus iterum, ut singula paulò plenius intelligas. D. Quid  
 nunc respondebo ? L. Indica breviter singularum partium  
 declinatum, ut vos docere soleo. D. Præito igitur ut cœ-  
 pisti. L. *Quid.* D. *Quid, cujus, nomen substantivum ano-*  
*malum.*



malum. L. *Opus*. D. *Hoc opus, operis, ut hoc onus, oneris.*  
 L. *Falleris, Daniel.* D. *Quid ita?* L. *Quia opus hic est ad-*  
*jectivum.* D. *Eho, adjectivum! quomodo declinatur?* L. *Est*  
*indeclinabile.* D. *Me miserum! nunquam istud audie-*  
*ram.* L. *Addendum fuit, quod sciam, vel quod meminero.*  
 D. *Quamobrem?* L. *Quia fortasse audieras, sed memineras*  
*male.* D. *Fieri potest; sed perge (quæso) me docere. Quid*  
*Anglicè significat istud nomen?* L. *Non solet Anglicè ver-*  
*bi, nisi junctum cum verbo Sum, es.* D. *Da exemplum.*  
 L. *Quotidie in ore habes exempla.* D. *Nunc mihi non*  
*occurrunt.* L. *Nonne soles dicere, & audire ex condisci-*  
*pulis, Opus est mihi charta, atramento, pecuniâ, & similia?*  
 D. *Sæpe dico, fateor, & sæpe audio; parum adverto.*  
 L. *Nunc igitur adverte, & manda memoriæ. Opus est mihi*  
*pecuniâ ad libros emendos, I have need of money to buy books;*  
*vel sic, I want money; vel, I have to do with.* D. *Da item*  
*aliud exemplum, quæso.* L. *Opus est tibi virgis, ut tua ex-*  
*pellatur pigritia, Thou hast need of rods, that thy sloth be dri-*  
*ven away.* D. *Fateor equidem, præceptor, sed Deus (ut*  
*ipso) mei miserebitur.* L. *Omnium miseretur Deus, qui*  
*piè illum invocant. Sed de nomine Opus jam satis multa,*  
*quod ad vos attinet: ad cætera redeo, Est.* D. *Sum es, esse,*  
*verbum anomalum.* L. *Gallina.* D. *Gallina, gallina, ut men-*  
*sa, mensæ.* L. *Ut.* D. *Non declinatur, quia est conjunctio;*  
*Anglicè, That, to the end that, for that.* L. *Ille ge-*  
*neris masculini; Illa, foeminini; illud, neutrius.* L. *Declina*  
*in foeminino.* D. *Ille, illius, illi, &c.* L. *Sit.* D. *Jam dictum*  
*est.* L. *Bona.* D. *Bonus, generis masculini; bona, foeminini;*  
*bonum, neutrius, nomen adjectivum.* L. *Confer ad exem-*  
*plum.* D. *Iustus, iusta, justum: bonus, bona, bonum.* L. *Nunc*  
*mutuò vos interrogate, ut plenius omnia tractetis.*

## COLL. 37.

*Blunderias, Hypodidascalus.*

**P**Ræceptor. H. *Quid vis?* B. *Licetne mihi ire domum?*  
 H. *Cur ante horam?* B. *Pater jussit ut nunc adirem.*  
 H. *Quid eget operâ tuâ?* B. *Vult me in villam mittere.*  
 H. *Quid eo?* B. *Petitum uvas, & eâdem operâ nuntiatum*  
 all.

aliquid villico nostro. H. Quid si fallis ? B. Adferam testimonium ut soleo. H. Quando redibis ? B. Horâ primâ, ut spero. H. Quî tam citô ? B. Villa nostra non longè hinc est. H. Ito sanè.

## COLL. 38.

D. H.

**P**ræceptor, placetne audire excusationem meam ? H. Quando abfuiſti ? D. Hesterno die. H. Quotâ horâ ? D. Primâ. H. Quæ fuit causa ? D. Accerſitus fui. H. A quo ? D. A patre. H. Quis tibi nuntiavit ? D. Famulus noſter. H. Cur me non adivit ? D. Quia dicebat ille ſe urgeri feſtinatione. H. Sûntne tibi teſtes ? D. Adſunt, præceptor. H. Abi, ſede in loco tuo ; ego interim eos interrogabo.

## COLL. 39.

*Hypodidaſcalus, Michael.*

**C**UR non veniſti citiùs ? M. Expectabam fratrem. H. Ubi eſt ? M. Reſtitit in foro. H. Cur eum non adduxiſti ? M. Volebat emere atramentum. H. Imò pyra, maia, aut aliquid è cæteris fructibus. M. Nefcio, tamen illud dicebat. H. Cùm ſitis fratres, cur non habetis domi commune atramentum in ampulla ? M. Frater nihil vult habere commune mecum. H. Vult igitur omnia ſibi propria ? M. Illud eſt. H. Admone me, cùm venerit, ego illum docebo quid ſit fraternitas. M. Faciam, præceptor. H. Abi in locum tuum.

## COLL. 40.

D. O.

**L**icetne abeſſe horâ ſecundâ ? O. Quid habes negotiî ? D. Pater eget operâ meâ ? O. Qua in re ? D. Ut ſibi aliquid ſcribam. O. Sed interim non reddes quæ præſcripta ſunt vobis. D. Jam edidici. O. O factum bene ! D. Placetne tibi audire me ? O. Cras audiam, cùm licebit per otium. D. Permittisne igitur ut abſim præceptor ? O. Agé, permitto ; ſed ità ut crastino die ſcriptum adſeras testimonium. D. Ego ſemper tibi adfero aut à patre ſcriptum, aut à noſtro famulo, patris nomine. O. Rectè facit pater. Sunt enim multi, qui me paſcunt mendaciis. Nunc abi, & patri dic ſalutem verbis meis. D. Faciam, præceptor.

COLL.

## COLL. 41.

*Magister, Caperonus.*

**H**eus! *Caperone*. C. Hem! praeceptor. M. Quid flet frater tuus? C. Ægrotat. M. Quis scis? C. Satis apparet. M. Quo signo? C. Quia vomuit. M. Quid illi dolet? C. Caput & stomachus, ut dicit. M. Cur non recepit se domum? C. Non ausus est. M. Tu verò non audebas me admonere? Agè, duc illum tu ipse domum usq; & matri narra diligenter ut ille se habet. Propera; quid cessas? duc eum lento gradu. C. Ducam, Praeceptor.

## COLL. 42.

*Hypodidascalus, Tiliacus.*

**H**eus! *Tiliace*, sequere me in cubiculum; est quod ego te seorsum monere velim. T. Adsum, praeceptor. H. Nunquàmne maturà in scholam venies? T. Non possum venire citius. H. Semper istud dices: quid impedit? T. Nemo est domi nostrae qui me expergefacerit. H. Nemo? T. Prorsus nemo. H. Non habetis ancillam? T. Habemus quidem; sed non curat me excitare. H. Imò, ut (tu opinor) non curas surgere; nonne verum dico? quid taces? responde nunc tandem aliquid. T. Me miserum! quid agam? H. Nihil est quod verearis, fatere verum. T. Quid si confessus ero? H. Ego tibi ignoscam, crede mihi. T. Ah pudet? H. Nè pudeat verum fateri, quæso, alioqui vapulabis. Pergin' tacere? Heus observator, vise ad matrem ejus & roga. T. Nè mittas, oro praeceptor, dicam tibi rem omnem, nihil reticebo. H. Agè, esto animo bono. T. Sic est professò, ut dixisti. H. Non satis istud est: volo audire sigillatim omnia. Narra mihi planè quemadmodum sese res habeat. T. Cùm venit ancilla me excitatum primum nihil respondeo, quasi serio dormiam; deinde, si magis urgeat, attollo ægre caput, sedeo in lecto, thoracem injicio humeris quasi statim surrecturus. H. Quàm pulchrè narras! Ità me Deus amet, nunc te magis amo quàm unquam. Perge. T. Quamprimum egressa est ancilla cubiculo, cum ego reclino caput in pulvinum, ac demitto pedes. H. Etiamne redormis? T. Ego verò redormio bene placidèque.

H. Quam-

H. *Quamdiu* ? T. *Donec ancilla secundò veniat.* H. *Cùm redit, quid tibi dicit ?* T. *Exclamat, vociferatur, insanit,* H. *Quibus utitur verbis ?* T. *Hem ! nebulo (inquit) quando eris in schola ? Ego dicam preceptorì tuo, ut te bene verberet; tu nunquam vis surgere nisi bis aut ter excitatus fueris.* H. *Bonâ fide promittis facturum te posthac officium ?* T. *Si unquam recidero, causam non dico quin palam cædar virgis, idq; acerbissimè.* H. *Bellè quidem promittis, sed quomodo præstabis promissa ?* T. *Adjuvante Domino Deo.* H. *Quâ ratione flectes illum ?* T. *Fide & assiduis precibus.* H. *Alioqui nihil possis obtinere.* T. *Credo equidem.* H. *Non satis est credere, nisi cures efficere diligenter.* T. *Curabo pro viribus, ac dies noctesque id unum meditabor.* H. *Optimè loqueris, dum tamen memor esse pergas.* T. *Quomodo possem oblivisci ? Nunquam desinunt istud monere concionatores, tu verò ferè quotidie ad id nos hortaris, & bene facis, præceptor, quia omnes sumus valde negligentes, sed ego primus omnium.* H. *Da igitur operam, ut tu omnium primus mores istos mures, ac memento præcipue semper verax esse.* T. *Faxit Deus, ut nunquam mentiar.* H. *O quàm felix esses !* T. *Satis in præsentia felix ero, si tantùm me absoiveris.* H. *Faciam quod tibi sum pollicitus; sed eâ lege, ut promissi tui memineris, & re ipsa præstes, quemadmodum nunc mihi recitasti.* T. *Quid igitur restat, quo minùs abeam liber ?* H. *Imò aliquid restat; mane & audi etiam nunc.* T. *Quamdiu voles, præceptor ?* H. *Inter cætera, excutias oportet istam pigritiam, quæ te in lecto detinere solet. Non enim decet studiosum adolescentem somniculosum & inertem esse, sed alacrem & experrectum, cujusmodi vides aliquos ex condiscipulis. Non tenes memoriâ divinum Petri Apostoli præceptum ?* T. *Quid illud est ?* H. *Sobrii (inquit) estote, & vigilate.* T. *O quoties audieram ! sed (proh dolor !)* nunquam usurpavi. H. *Fac ut studiose usurpes in posterum, neque illud solum, sed etiam cætera bene vivendi præcepta, quæ toties audivisti. Quod quidem si diligenter feceris, tibi imprimis bene consules, jucundus eris parentibus,*

bus & mihi, & condiscipulis tuis ; denique (id quod est præcipuum) charus eris Deo, qui studia in gloriam sui nominis magis indies promovebit. T. O quantum fructum sentio ex ista admonitione tua ! H. Vehementer sanè gaudeo, & tuâ & condiscipulorum causâ. T. Quid si nar-  
ras illis meam poenitentiam ? H. Ego verò narrabo primo quoque tempore, ut exemplo tuo discant nihil esse accep-  
tius Deo quàm culpam agnoscere, & ad frugem bonam redire. Vale, fili, & adesto horâ tertiâ in auditorio. T. Ago tibi gratias ingentes, amantissime præceptor.

C O L L O Q U I O R U M  
S C H O L A S T I C O R U M  
L I B E R IV.

Paulò graviora continens, præsertim in moribus  
& Christianâ doctrinâ.

C O L L O Q. I.

*Frysius, Samuel.*

**O**bscuro te, *Samuel*, da mihi operam paulisper. S. Quid istud est ? F. Nescio quid incidit mihi in oculum, quod me habet valde malè. S. In utrum oculum incidit ? F. In dextrum. S. Vis inspiciam ? F. Inspice, amabò te. S. Aperi quantum potes, ac tene immobilem. F. Non queo à nictu continere. S. Mane, egomet tenebo sinistrâ manu. F. Ecquid vides ? S. Video aliquid minutum. F. Exime, quæso, si potes. S. Quin jam exemi. F. O factum bene ! quid est ? S. Cerne tu ipse. F. Est mica pulveris. S. Et quidem usque adeò pusilla, ut vix cerni possit. F. Vide quantum doloris adferat oculis res tam exigua. S. Haud mirum quidem. Nullum enim è membris exterioribus oculo tenerius esse dicitur. Idque etiam fit, ut experiamur nihil esse nobis charius. F. Hoc Deus approbat, cùm de



sua in nobis charitate loquens apud *Zachariam*, (2. cap.) sic ait, *Qui vos tangit, tangit pupillam oculi mei*. S. O immensam Dei bonitatem, qui nos tantopere charos habet ! F. Non mihi rubet oculus ? S. Aliquantulum : nempe qui 2 fricuiisti. F. Credin' tu mihi adhuc dolere ? S. Quidni credam, qui toties talem molestiam sum expertus ? F. *Experientia est rerum magistra*. S. Ità vulgò dicitur. F. Quid pretii dabo isti medico pro labore ? S. Quantum pacti sumus. F. Brevis est conclusio, ergò nihil. Sed tamen habeo tibi gratiam ; atque utinam detur referendi locus ! S. Quin potius avertat Deus. F. Bene correxisti ; dixeram imprudenter, at sine dolo. S. Sic accepi ; sed interimolari licet, præsertim ut in *Latina* lingua nos exerceamus. F. Faxit Dominus Deus, ut omnia studia nostra ad gloriam ipsius referantur. S. Faxit, precor.

## COLL. 2.

*Alexander, Carolus.*

E Cce ! reddo tibi commodatum, & gratias ago maximas. C. Non est quod agas : sed tu satisne usus eras ? A. Satis diu usum concessisti, quæ tua est humanitas. C. Quoties opus erit, quæso nè parcas rebus meis. A. Non parcam, quando ità jubes. C. Pergratum mihi feceris. A. Gratiam habeo maximam ; tu verò nostris utere si quis usus fuerit. C. Non est quod moneas ; satis meâ sponte sum impudens. A. Imò verecundus nimis. C. Esto, aliquando tamen senties. A. Ità velim ; bene vale. C. Te servet Dominus Deus

## COLL. 3.

*Claudianus, Quintinus.*

CUR diligenter audire debemus Evangelium ? Q. Ut discamus Deum colere ex voluntate ejus. C. Nihil aliud respondes ? Q. Quid responderem ? Nihil enim scio præterea. C. Nonne etiam ut sobriè & justè vivamus ? Q. Declara mihi illa duo adverbia, quæso. C. *Sobriè*, i.e. continenter : *justè*, i.e. in iustitia ; nempe, ut suum cuique tribuamus. Ità fit, ut *sobriè* ad vitam cujusque privatam pertineat ; *justè* autem ad charitatem, quam proximo debe-

debemus. Q Sed audi, mi *Claudi*; nonne cultus Dei omnia illa complectitur? C. Probè sentis, *Quintine*: sed volui experiri, an responſionem tuam rectè intelligeres. Q Bene feciſti. Nam de ſincero verbi divini intellectu nihil nimis dici poteſt. Et de hac re quidem tecum pluribus verbis libenter agerem; ſed nos hora ipſa admonet, ut diſcedamus.

## COLL. 4.

*Obſervator, Baptiſta.*

**F**ater tuus ſemper in concione aut garrit, aut ineptit, aut aliquem incitat; ex quo fit, ut ſæpe notandus ſit, deinde vapulet. B. Quid vis faciam? O. Cur non ſæpe mones? B. Nunquam deſiſto monere. O. Perge, precor. B. Nihil eſt quod mihi preceris: nunquam ceſſabo, donec (volente Deo) aliqua ex parte ſe correxerit. O. Sic uſurpabis *Catonis* præceptum. Quando mones aliquem; nò ſi cætera, B. Sed oro te, mi *Nicolae*, ut quoties eum notaveris, id mihi renunties. O. Nunquam finis eſſet, adeò frequens eſt nomen ejus in meis commentariolis. B. Saltem fac me ſemel certioſorem, cùm primùm commiſerit, quo ſit accuſandus; tum ego dicam patri, cujus verba magis timer quàm verbera. B. Iſtud non eſt parvum bonæ indolis argumentum. B. Irà ſpero quidem. Facies igitur quod rogo? O. Ego verò, atque libens.

## COLL. 5.

*Caſtrenſis, Richardus.*

**Q**uid conſilii tractabas modo cùm præceptore? R. Si ſcire cupis, illum percontare. C. Cur me celas? R. Ut nè palàm facias. C. Non ideo (crede mihi) te rogo, ut id proferam: quid enim proficerem? R. Quamobrem igitur tam cupidè rogas? C. Nimirum, ut mecum tacitus gauderam, ſi quid boni audieris. R. Iràne paratus advenis, ut à me extorqueas quod mihi uni, idque à præceptore, creditum eſt? C. Quod mihi dixeris, ſurdo & muto dictum puta. R. Egone tergum meum in fidem tuam committam? C. Id proſectò potes, & quidem ſine periculo. R. Nunquam dices ſat commodè, ut iſtud mihi perſuadeas. C. Dabo ſi-

dem

dem me taciturnum. R. Etiam si ter quaterve sanctissime iuraveris, *Non prodam*. Proinde tu desine percontari. C. Hem? Ubi est illa nostra amicitia? R. Nescis illud dictum Sapientis, *Quid taciturnum esse vis, nemini dicere?* C. Audivi aliquoties; sed quod amico dictum sit, nemini dictum videtur. Est enim amicus quasi alter idem. R. Eadem tibi dicet qui scire ex te volet, & item alius, qui ex illo; atque ita ad aures omnium perveniet. Itaque si me tibi posthac vis amicum esse, me missum facito. C. Non sum Imperator, ut te missum faciam. R. Pergin' molestus esse? C. Abire malim, quam tibi molestiam exhibere.

## COLL. 6.

D. N.

Quando vis adire domum? N. Nescio. Ubi Deo visum fuerit. Id enim pendet ex voluntate ejus, non mea. D. Quid si te accersat pater? N. Tunc intelligam Deum sic velle, ideoque parebo. D. Quid si alia fuerit Dei, alia patris tui voluntas? N. De hoc non est meum disputare, sed, ut confido, pater non temerè me accerset. D. Ego quoque non aliter sentio; sed volui tantisper tecum fabulari. N. Gaudeo hunc nostrum sermonem non fuisse fabulosum. D. Utinam in scholis frequentiores essent sermones ejusmodi! N. Tum erunt, cum Deus ipse puerorum animos timore sui affecerit. D. Ergò precemur eum, ut id brevi contingat.

## COLL. 7.

Antonius, Hieremias.

Quâ pecuniâ emisti librum istum? H. Quâ censes, nisi meâ? A. Miror unde habueris. H. Quid miraris? An tibi debeo reddere rationem? A. Ego ne exigo? H. Videris exigere. A. Non exigo, inquam, sed sic solemus inter nos familiariter & libere fabulari, ut Latine semper condiscamus aliquid. H. Ea res, fateor, plurimum confert nobis ad Latine loquendi facultatem. Sed nemo est tam lenis, quin interdum subirasatur. A. Est ut dicis; sed est brevis puerorum ira. H. Quod autem de pecunia rogabas, jam à patre acceperam. A. Quando venerat? H. Abhinc octo dies.

dies. A. Miror quòd eum non viderim. H. Non est quod mireris. A. Quid ità? H. Quia vix sesquihoram hîc moratus est. Cum enim de equo descendisset, mēque paucis esset alloquutus. *ascendamus*, inquit, *in tuum cubiculum, ut tecum liberiùs colloquar*. A. Sed, antequam narres cætera, velim sciri quid sibi vellet adventus ejus tam inopinatus. H. Falso quondam rumore (ut fit) audierat me ægrotum esse. A. Quid ille, cū præter spem te valentem invenit? H. Mirificè affectus est gaudio. A. Quis dubitat? H. Præterea, Deo optimo maximo maximas egit gratias. A. Libenter hæc audio; perge quæso. H. Tunc me de valetudine percontatur, unà precatur, non sine gratiarum actione; tandem quærit ecquid mihi opus sit. *Opus* (inquam) *Pater. Quâ* (inquit) *re eges? Liber* (inquam) *decem assum*. Tum ille promit ex marsupio decussem, tum mihi in manum dat: & *vale* dictò, statim conscendit equum, atque abit. A. Cur tibi plus dedit quàm petiveras? H. Istud ineptè quæris. Scilicet, ità lætus erat, quia me, præter spem, bene sanum offenderat; quòd si vel coronatum petivissem, tam facilè dedisset mihi. A. O quantum debes illi summo Patri; qui tibi adèd bonum patrem dederit! H. Nè cogitari quidem potest quantum debeam. Nam etiamsi malum dedisset, deberem ramen non parùm. Sed quid cessamus auditum ire prælectionem? A. Jam instat hora tertia. H. Parata sunt mihi omnia. A. Mihi quoque. H. Eamus ergò in auditorium.

## COLL. 8.

*Senerius, Villaticus.*

**U**BI nunc est frater tuus natu maximus? V. Ivit in militiam. S. Quid ais? in militiam? V. Sic res est. S. Sic ergò valedixit literis? V. Jam pridem literarum satietas eum ceperat. S. Quid ità? V. Nescio, nisi quia volebat liberiùs vivere. S. Quomodo permisit pater? V. Quid? puras permisisse? patre absente, matre invitâ, profectus est. S. O miserum adolescentem! V. Imò verò miserrimum. S. Quid faciet? V. Id quod cæteri, qui sequuntur illud vitæ genus:

genus : nempe, spoliabit rapiet, ludet aleâ, potabit, scor-  
rabitur. S. Estne isthæc militum vita ? V. Omnino. S. Un-  
de scis istud ? V. Audiui nuper ex patre, cum coenare-  
mus. S. Quorsum narrabat talia ? V. Docebat nos nihil esse  
certius quàm Deum timere, qui custodit parvulos, eôsq;  
in viam rectam paulatim inducit. S. Et præceptor ipse no-  
ster de iis rebus sæpe nos admonet. V. Tantò magis debe-  
mus esse solliciti, ut parentes charos habeamus & præce-  
ptores, quorum operâ Deus ad nostram institutionem uti-  
tur. S. Utinam utrisque præstemus quod ipse nobis in sua  
lege præcepit ! V. Ità faxit ille. S. Faxit, precor.

## COLL. 9.

*Lucas, Orosius.*

AUDIO fratrem tuum jam rediisse ex *Germania*. O. Sic  
est. L. Solusne rediit ? O. Non omnino. L. Quis  
igitur cum illo ? O. Quidam civis hujus oppidi, qui ferè  
biennium illâc habitaverat. L. Cur iverat frater ? O. Mis-  
sus illâc fuerat à patre, ut *Germanicè* disceret loqui.  
L. Quam igitur ob rem non fuit illâc diutiùs ? O. Jam non  
poterat ferre matris desiderium. L. O tenellum ado-  
lescentem ! quotum agit annum ? O. Septimum deci-  
mum, si rectè mater meminit, ex qua id audiui sæpe. L. A-  
ge quo vultu à patre acceptus est ejus adventus ? O. Rogas ?  
pater non sustinebat aspicere : quinetiam nec salutatio-  
ne dignatus, nec alloquio, jussit eum abire è conspectu.  
L. Quid præterea ? O. Nisi mater cum lachrymis inter-  
cessisset, jubebat apparitorem accersi, qui miserum in  
carcerem conjiceret. L. Atqui non poterat injussu Magi-  
stratûs. O. Nescio ; tamen conabatur. L. Quid postea fa-  
ctum est ? Cubuítne domi vestræ ? O. Minime verò. L. Ubi  
igitur ? O. Sororis meæ virum nostin' ? L. Tanquam di-  
gitos. O. Eò missus est à matre, dum patris ira deservescer-  
et. L. Quid tandem accidit ? O. Egit mater cum propin-  
quis & amicis nostris, ut iratum patrem mitigarent. S. Sic  
igitur frater tuus cum patre in gratiam rediit ? O. Id non  
fuit magni negotiû. Jam enim pater coeperat poenitere,



quòd sic excanduisset, quòdque tam graviter accepisset filium. L. Nempe *dies ejus iram lenierat*. O. Eâ tamen lege recepit illum, ut promitteret se in *Germaniam* rediturum statim à vindemia. L. Vide quàm ineptus sit iste in matres nostras affectus. O. Atqui ipsæ matres sunt in causâ: cur enim adeò tenerè nos adamant? L. Naturam cogere difficile est. O. In hanc sententiam tenesne versum ex *Horatio*? L. *Naturam expellas furcâ licet usq; recurret*. O. Sed quid hoc? dum fabulamur, à lusu cessatum est. L. Nihil inde nobis accidit mali: ad disputationes conveniamus jam.

## COLL. 10.

*Conradus, Linus.*

**U**BI fuisti hodie post prandium? L. In horto præceptoris. C. Quid illuc iveras? L. Ille me miserat petitem olera. C. Quæ tandem olera collegisti? L. Vix enumerare possum omnia. C. Saltem quæ occurrunt memoriæ. L. Sed cur illud quæris? C. Ut interim recordemur aliqua rerum nomina, quæ parvuli didicimus. L. Pulchra est exercitatio; præsertim cùm aliquid nobis suppetat otii. Audi igitur; collegi allia, serpyllum, porros, cepas, nasturtium, cuminum, fœniculum, thymum, amaracum, hyssopum, apium, salviam, satireiam. C. Herbæ sunt olentes, quas adhuc numerâsti. L. Sic institueram memoriz gratiâ. C. Perge porrò. L. Paucæ quædam restant, ut beta, cichorium, lactuca, oxalis, eruca, brassica, portulaca; plures non occurrunt. C. Quî potuisti tot meminisse? L. Præceptor mihi dederat scriptum catalogum. C. Et noveras omnes? L. Noxam, alioquin eum interrogâssem. C. Atqui ego non novi omnes, quamvis nomina didicerim. L. Ego tibi plures etiam demonstrabo, cùm licebit nobis in hortum ire. C. Multumne attulisti? L. Nimis es curiosus: quid vis? De singulis attuli quantum opus fuit. C. Tamen si curiosus tibi videor, tamen hoc mihi velim respondeas: Scin' tu in quem usum præceptor tot olerum genera curaret apparanda? L. Partim ut jus benè condi-

reretur. No

retur, partim ut minuta ex oleribus fieret. C. Quàm bene consulebat nobis? L. Optimè; sed tamen ea non erat causa præcipua. C. Quænam igitur? L. Legist'ne unquam *Moretum Virgilii*? C. Carmen quidem legi: sed moretum nunquam edi, nec vidi, quod sciam. L. At videbis, spero: nam præceptor uxorem docuit conficere, & illa confecit ex ejus præcepto. C. An apponetur nobis aliquid in coenam boni? L. Saltem jus carnum pingue, bene conditum, carnes optimæ, & minuta ex oleribus. C. Unde scis ista? L. Omnia vidi in culina cùm jussus essem adjuvare, præcipuè in meis oleribus repurgandis. C. Quid moretum? non saltem gustabimus? L. Imò dabitur nobis, nam confectum est quod satis sit omnibus. C. Ista mihi sapiunt magis, præsertim æstate, quàm carnes ipsæ, aut piciculi. L. Optarem profectò servari carnes in hyemem, ut tota æstate olera & fructus esitaremus. C. Atqui (ut accepi) ista minùs alunt. L. Id ego audiavi aliquoties; sed quid opus est tanto studiosis alimento? D. Non tanto fateor; si tamen parentes nos viderent palidos & macilentos; statim ejus rei culpam assignarent præceptoribus: nonne sic est? L. Non est dubium; sed quid agas? ferè parentes (præcipuè matres) nobis indulgent nimium. C. Vera quidem dicis; sed tu interim matris indulgentiâ libenter frueris. L. Quasi verò tu minùs. C. Nè mentiar, quod tibi ascribo, in me quoque frequenter experior. L. Non possumus parentum ergà nos affectum, nisi nostris viciis, immutare; tantùm caveamus eorum abuti benevolentia: sed imprimis laudemus illum Patrem nostrum benignissimum: qui nobis tales progenitores dedit. C. Ista libens audio; sed nos hora vocat. L. Age, finem imponamus.

## COLL. II.

Norileus, Dotheus.

Unde redis? D. E foro. M. Quid emisti? D. Carnem. M. Qualem? D. Vitulinam. M. Ostende, quæso; ferè nova res est hoc tempore. D. Vide. M. Bona videtur mihi. D. Non falleris, opinor. M. Quot sunt libræ? D. Nolunt

lanii appendere vitulinam. M. Cur non ? D. Propter novitatem. M. Vide astutiam : scilicet quisque vendit quàm potest carissimè. D. Rem acu tetigisti. M. Quantum putas pendere ? D. Duas libras & paulò ampliùs. M. Quanti emisti ? D. Agè divina. M. Non sum divinus. D. Arquimulti divinant, qui tamen divini non sunt. M. Fieri potest ; sed ex quibusquam conjecturis : alioqui divinatio verita est in divinis literis. D. Divina igitur ex conjectura. M. Emistitotum duobus assibus. D. Paulò minoris. M. Quanti ergo ? D. Tenta iterum. M. Viginti denariolis. D. Nolo te diutiùs torqueri de nihilo. M. Dic igitur sodes. D. Hoc totum constitit mihi sex quadrantibus. M. Profectò fortuna tibi pulchrè favit. D. Quam mihi fortunam narras ? M. Hic mos est loquendi. D. Mos (ut dicitur) tyrannus est pessimus. Atque utinam bonos mores tam studiùsè coleremus, quam obstinatè retinemus malos ! M. Tunc meliùs se haberent omnia. Nos igitur fortunam istam Ethnicis & impiis relinquamus. *Fortuna nihil est : solus est Deus, qui favet nobis, solus est adjutor & protector noster.* M. Illud quidem certo scio, fideliter credo, & verè confiteor : sed quid agas ? *Sæpe labitur lingua, nihil mali cogitante animo.* D. Oportebat te illud meminisse, *Nè lingua præcurrat mentem.* M. Illud quidem didicimus è septem Sapientium dictis ; sed non semper occurrunt ejusmodi pulchrè dicta ; licèt ea mandaverimus memoriæ. D. Tantò igitur magis illa est exercenda, ut nobis, cùm opus est, suppetat. M. Isto tuo admonitu, discam esse aliàs prudentior. D. Sed audio signum dari ? desinamus.

COLL. 12.

*Herus, Famulus.*

Fustine hodie in foro ? F. Fui. H. Quando ? F. Post cionem sacram ? H. Quid emisti nobis ? F. Ferè nihil. H. Quid autem ? F. Butyrum. H. Quanti ? F. Quadrante. H. Tancillum ? F. Non ausus sum amplius emere. H. Quam timebas ? F. Nè bonum esset. H. Satis prudenter facium. F. Cur istud dicis, here ? H. Quia malim te esse hac in timidior, quam audacior. Sed nunquid emisti pra-

cerea

V. no-  
am  
tas  
anti  
requi  
eit ;  
a est  
nisti  
i er-  
o te  
c to-  
una  
Hic  
mus.  
mus,  
ha-  
&  
qui  
stud  
sed  
imo.  
rrat  
tium  
eta;  
agis  
Isto  
udio  
con-  
nihil  
ante  
Quil  
um  
in  
pra  
rea

terea ? F. Nihil. H. Eho ! nihilne ? F. Nihil prorsus. H. Vah, quam parce nobis opsonatus es ! F. Quid aliud emere potuisssem ? H. Quasi nescias quibus cibis oblectari soleam. F. Scio te amare caseum molliusculum, & pyra, & alios fructus recentes. H. Rectè dicis ; cur ergò non emebas ? F. Caseus ipse carior erat pro nostra pecuniola. H. Quid fructus ? F. Alii erant non satis maturi, de aliis ego dubitabam essentne boni. H. Miser, non poteras gustare ? F. Atqui istæ mulieres nihil gustare permittunt, nisi te empturum affirmes. H. Nihil mirum ; multi enim gustarent animi tantum gratiâ. Tu igitur esto aliàs prudentior. F. Quomodo ? H. Si videris pulchrum aliquem fructum, eme aliquantulum denariolo, ut facias periculum. F. Quid tum præterea ? H. Si tibi sapuerit, tum emito amplius ; sin minus, relinquito, & aliò te conferto. F. Bona est ista cautio. H. Memineris igitur, ut ipse postea utaris. F. Ego, ut spero, meminero diligenter. Nunquid vis præterea ? H. Ut cures quæ tui sunt officii, deinde literis incumbas.

## COLL. 13.

*Caroletus, Quintius.*

**A**dfuisti matutinæ precationi ? **Q.** Adfui : tu verò ubi eras ? **C.** Iveram ad patrem in cauponam. **Q.** Quid eo ? **C.** Heri vesperi jusserat, ut se convenirem bene manè. **Q.** Quì ausus es tam manè prodire, idq; inconsulto præceptore ? **C.** Jam heri veniam impetraram, antequam iretur cubitum, sed dic mihi, quid ille à precatione palàm admonuit ? **Q.** *Audiui ( inquit ) esse inter vos, qui sæpe numero Anglicè sabalentur, & nemo interea vestrum mihi quicquam indicat ; quod est argumentum consensionis omnium in eodem peccato. Hæc fuit accusationis summa ; deinde in eam sententiam multa dixit, quæ meminisse non potui. C. Sed quæ tandem fuit conclusio ? Q. Quamobrem ( inquit ) admoneo vos, ut alius alium ad Latine loquendum cohortemini diligenter, & eorum nomina, qui parere noluerunt, ad me quamprimum deferatis, ut huic malo remedium adhibeam.* **C.** Nullum igitur verbum licebit ef-

ferre *Anglicum*. Q. Quantum ex verbis ejus colligere potui, non ità rem intelligit. Non enim (ut scis) usque adeò est severus exactor, ut statim puniat, si cui verbum aliquod inter colloquendum exciderit. C. Aliquoties (ut memini) palàm dixit, edictum suum ad eos demum pertinere, qui cum *Latine* sciant, tamen semper latibula quærunt, ut *Anglicè* fabulentur, idque de rebus ineptissimis. Q. Ea est quorundam pertinacia, ut malint sæpissime vapulare repugnando præceptis honestissimis, quàm laudari atque etiam diligi obsequendo. C. Meministi in' audire ex ipso præceptore, *Nitimur in vetitum?* Q. Memini atque adeò est verissimum: tamen qui doctrinam *Christi* libenter amplectuntur, non studio peccant neque malitià. C. Illud præstat verus ille timor Domini. Q. Tales igitur, quod licet per naturæ infirmitatem, sedulo cavere nituntur, nè quid scientes faciant, dicant, aut cogitent, quo Deus vel minimum offendatur. C. Ergo studeamus & nos id ipsum cavere: studeamus rectè vivere, & Dei nostri parere voluntati; non modò nè vapulemus, sed magis ut illi optimo Patri nostro placeamus. Q. Ità fiet, ut verè simus non *tenebrarum*, sed *lucis filii*. C. Sed de his aliàs pluribus: ad disputationes nos accipiamus. Q. Ecce! vocat signum.

COLL. 14.

*Albertus, Tirotus.*

**N**unc demum redis à foro. T. Quid demum? Tanta est ad lanienam turba, ut vix accedere potuerim. A. Quas attulisti nobis carnes in diem crastinum? T. Bubulam & vervecinam. A. Estne in foro carniū magna copia? T. Tanta profectò, ut mirer adeò caras esse. A. Nihil mirum: Ut multæ sunt carnes; ità multi qui carnes edunt quotidie. Sed quæ potissimum vidisti carnis genera? T. Vidi bubulam, vitulinam, ovillam, vervecinam, suillam, hoedinam, aguinam. A. Nihilne ampliùs? T. Quid velles præterea? A. Nihil erat ferinæ? T. Non queo referre simul omnia; imò etiam ferinam vidi. A. Qualem? T. Cervinam & aprugnam. O quam pinguis est aprugna! A. O quàm ineptus es? T. Quid ita? A. Quia falleris



falleris in rerum nominibus. Nam quod in sue domestico dicitur *arvina*, id in sue fero (id est, apro) *callum* vocatur; & est in eo genere durissimum. T. Istud quidem audisse non memini. A. Nunc audisti, manda (si vis) memoriae. M. Tu verò, doctor, unde illud didicisti? A. Domi nostræ ferina caro res est frequentissima. T. Unde vobis tanta est copia? A. Pater habet ruri ferarum multarum vivarium, ex quo interdum solidi apri in urbem adferuntur. T. Quale est vivarium istud? A. Locus est ferè quadrangulari formâ, amplissimus, muris altissimis septus undique, consitus multis & proceris arboribus; inter quas sunt dumeta maximè densa. T. Quales sunt illic arbores? utrum urbanæ an sylvestres? A. Sylvestres ferè omnes: sed in his potissimum quercus & fagi; quarum glande pascuntur cervi, apri, damæ. T. O quantas meritò gratias Deo debetis, qui vobis largitus est tantam rerum omnium abundantiam! A. Non sumus immemores beneficiorum ejus. Pater enim plurima bona in pauperes erogat; quod tamen tibi uni dictum esse velim. T. Cur ita? A. Quia talia non vult prædicari. T. Tantò magis laudandus, quòd *Christi* præceptum verè sequitur, cujus verba apud *Matthæum* scripta sunt; *Cum facis* (inquit) *elemosynam*, & quæ sequuntur. A. Quoto capite? T. Sexto, nisi me fallit memoria. A. Sed hæc hætenus. Satis enim sumus colloquuti, & jam ad disputandum convenitur. T. Eamus igitur. A. Sequere me, aut (si mavis) præcede. T. Ego neutrum faciam, sed unà ibimus.

## COLL. 15.

*Grinandus, Moverotus.*

**T**Antùm igitur hodie è villa revertisti? M. Hodie tantùm, idque paulò ante prandium. G. Atqui dixeras te futurum illic modò biduum. M. Ità sperabam fore, & sic pater promittebat. C. Quid igitur obstitit, quò minùs redieris citiùs? M. Mater me detinuit, tametsi etiam cum laetitia eam obsecrarem ut me missum faceret. G. Sed cur te tam diu remorata est? M. Ut se comitaret in reditu. G. Quid verò agebas interea? M. Colligebam fructus cum

rusticis

rusticis nostris. G. Quos fructus? M. Quasi non sint tibi noti fructus autumnales & serotini, pyra, mala, juglandes, castaneæ. G. O jucunda exercitatio! M. Non est jucunda solum, sed etiam frugifera. G. Sed hoc malum, quod interim quinque aut sex prælectionum fructus tibi periit. M. Non omnino periit, spero: curabo pro viribus, ut aliqua ex parte recuperem. G. Quid facies? M. Describam quam potero diligentissimè. G. Quid tum postea? M. Ediscam ipsam auctoris orationem. G. Sed sententiam non satis intelliges. M. Ipsa me juvabit præceptoris interpretatio, ut sensum magna ex parte assequar. G. Nec tamen id satis erit. M. Tu (si placet) aderis mihi per otium, ut conferamus unâ. G. Libenter equidem faciam. Sed nè istud quidem sufficiet. M. Non habeo quod possim ampliùs. G. Quantum præstitisset vivam audire magistri vocem! M. Multo sanè præstiterat; sed quando id mihi non contingit, nec mea culpâ factum est, nihil habeo quod me accusem in hac parte. G. Recte dicis; fac igitur habeas animum bonum. Nam quod ego tecum pluribus verbis de hac re disputavi, non ideo feci, ut vellem te adducere in desperationem; sed totum illud profectum est ex meo in te amore singulari. M. Haud mihi dubium istud est; quò fit, ut majorem tibi habeam gratiam. G. Sed ecce! vocat vos ad coenam cinnabulum. M. Nuntius opportunus.

## COLL. 16.

*Johannes, Rubetus.*

**S**Alve, Rubete. R. O *Johannes*, auspiciatò advenis; valésne benè? J. Optimè, gratia Deo: tu verò ut vales? R. Recte sanè, Dei beneficio: sed quando rediisti domo? J. Nudius tertius. R. Bene habet, opportunè venisti. J. Nempe sciebam instare vacationis terminum. R. Placétne ut otiosè aliquandiu confabulemur? J. Maximè, dummodo semoti simus ab hac turba clamorosa ludentium. R. Bene mones; secedamus in auditorium illud quod est apertum. J. Quàm apte hîc sedemus? Agè, loquamur liberè. R. Sûntne perfectæ vestræ vindemiæ? J. Omnino. R. Quantum temporis posuistis in toto opere? J. Dies circiter quindecim.

R. Tu

R. Tu igitur semper interfuisti? J. Nullum intermisi diem.  
 R. Quid agebas? J. Uvas sæpius colligebam. R. Cum verbo *Colligebam* debuisti aliquid addere. J. Quidnam, quæso? R. *Et edebam*. J. Quid opus fuit? De hoc nemo dubitare potest. Quis enim fructus bonos & maturos legit, quin edat etiam ex optimis? R. Profectò rectè loqueris euge! responsum laudo. J. Jàmne putabas os occlusisse mihi? R. Istum ne cogitavi quidem. J. Quid igitur? R. Non expectabam tam promptum, tamque prudens responsum. J. Nihil est quod mireris. Nam, ut est in proverbio, *Sæpe etiam est olitor verba opportuna loquutus*. R. Cui debes hoc proverbium? J. Magistro *Juliano*. Is enim dictat nobis interdum proverbia ejusmodi, & pulchras sententias ex bonis auctoribus. R. Optimè vobis consulit; sed quibus horis solet id facere? J. Noonunquam à cæna, sæpius autem cùm auditorio nihil habemus reddere. R. Utinam sic omnes facerent, dummodo non essent impedimento quotidianis scholæ exercitationibus? J. Bene subjunxisti istam exceptionem per adverbium *Dummodo*. Sunt enim quidam pædagogi, qui suis dictatis & privatis lectionibus sic onerant pueros suos, ut non possint in schola satisfacere. R. Inde fit, ut ipsi præceptores interdum conquerantur de talibus pædagogis. Sed quid agimus? Redeamus ad sermonem institutum. J. Placet. R. Euisstine semper occupatus in uvis colligendis? J. Opus illud in paucis diebus absolvitur, propterea quòd ità magnus operariorum numerus ad id locari solet. R. Quid deinde fit? J. Calcantur uvæ, vinum hauritur à cupis majoribus, eadem operâ diffunditur in dolia: deinde uvæ ipsæ nondum expressæ subjiciuntur prælo in torculari; postremò exportantur & abjiciuntur vinacea. R. Atqui non curabas ista? J. Imò curabam aliqua ex parte. Nam agendis omnibus inteream, maximè ut sollicitarem operarios. R. Eras ergò illic tanquam præfectus, & quasi magister operum. J. Imò etiam reverà magister operum & præfectus: pater enim me præfecerat. R. Quàm gaudebas isto magisterio! Quàm pulchrum erat videre tecum tua gravitate

vitate aliis imperantem, alios adhortantem, alios denique  
 arguentem ! J. Profectò si vidisses me, dixisses alium esse,  
 quam in schola discipulum. R. Ut video, non eras otio-  
 sus. J. Imò, ut bonus paterfamilias, adhibebam sæpenu-  
 mero manus operi, ut ipsos operarios meo exemplo insti-  
 gare. R. Non abs re (apparet) pater te huic muneri  
 præfecerat. J. Nempe aliis in rebus expertus erat meam  
 diligentiam. R. Absit tamen verbo jactantia. J. Ego sic  
 intelligo ; sed liberè sic loquor, quia cum familiari meo.  
 R. Sed pergamus. Quanta est vobis vini copia ? J. Medio-  
 cris, qualis ferè hoc anno ubiq; esse dicitur, tamen vinum  
 rubellum habemus affatim, album non item. Verum quic-  
 quid est, contenti sumus, & de manu Domini cum gratia-  
 rum actione recipimus. R. Quot implevistis dolia ? J. Plus  
 minùs quadraginta : sed sunt alia aliis majora. R. Papæ !  
 Non tibi videtur magnus proventus ? J. Satis quidem ;  
 sed non pro ratione anni superioris. R. Quid refert ? quan-  
 tò minor est quantitas, tantò etiam pluri vendetur. J. Sic  
 ferè solet evenire : sed nonne tibi videor satis narrare de  
 vindemiis ? Quid præterea desideras ? R. Quoniam sic  
 abundamus otio, volo etiam aliquid ex te audire de fru-  
 ctibus arborum, Est enim quasi altera vindemia. Nonne  
 habetis multos ? J. Plenis tabulatis, quæ est Dei benig-  
 nitas. R. Quando collecti sunt ? J. Quo tempore vinum fa-  
 ciebamus, familia colligebat. R. Quæ sunt vobis ejusmodi  
 fructuum genera ? J. Mala, pyra, castaneæ, juglandes : sed  
 malorum & pyrorum multa est varietas. R. Quid coto-  
 nea ? Non etiam habetis ? J. Imò habemus, sed ea sub ma-  
 lorum genere continentur ; unde & alio nomine appel-  
 lantur mala cydonia. R. Quid autem attulisti huc rediens ?  
 J. Nihil nisi quasillum uvarum selectarum ; sed singulis  
 posthac hebdomadibus mihi afferentur plenis saccis ma-  
 la, pyra, castaneæ. R. Interea da mihi, quæso, aliquot ex  
 uvis tuis. J. Eamus in cubiculum meum, illuc dabo tibi.  
 R. Equidem paratus sum ; eamus. J. Illic etiam agemus  
 de repetendo ultimo in diem Lunæ colloquio : nam, ut  
 cp. nor, id præceptor imprimis exigit.

## COLL. 17.

*Eustathius, Boscomellus.*

**A**Udivi patrem tuum venisse hodie in Gymnasium. B. Verum audisti. E. Quâ venerat gratiâ? B. Ut pro meis alimentis præceptorî numeraret pecuniam, simul ut me illi commendaret. E. Nunquâm te commendârat? B. Imò sæpissimè. E. Quid sibi vult istâ commendatione tam frequenti? B. Amore vero me prosequitur. E. Quid tum? B. Ideo cupit me diligenter erudiri. E. Quid si commendet, ut sæpius vapules? B. Ea est fortasse causa; sed quid indè? non propterea me diligit minùs. E. Unde istud colligis? B. Quia *puero tam necessaria est correctio quàm alimentum*. E. Verum quidem dicis, sed pauci ità judicant. Nemo enim est quin panem quàm virgam malit. B. Illud est naturale omnibus; quis negat? sed tamen *patienter ferenda est pœna, præsertim justa*. E. Hæc habetur in libello morali sententia; *Quod merito pateris, patienter ferre memento*. Sed, quid si pœna sit injusta? B. Ea quoque patienda est nihilominus. E. Cujus causâ? B. Propter *Jesum Christum*, qui mortem injustissimam, eamque acerbissimam tulit pro peccatis nostris. E. Utinam id nobis in mentem veniret quoties aliquid patimur! B. Præceptor id nos sæpe monet, quoties occurrit occasio: sed *surdus narratur fabula*, ut est in proverbio. E. Ergo demus operam, ut simus posthac diligentiores. B. Ità faxit Deus.

## COLL. 18.

*Grandinus, Thomas.*

**C**UR non interfuisti hodiernæ concioni? T. Occupatus eram in scribendis literis. G. Non poteras differre negotium? T. Urgebat tabellarii festinatio. G. Atqui præceptor docet nos, omnia postponenda esse Dei negotiis. T. Docet quidem, neque id mihi dubium est; sed nunquam sumus adeo perfecti quin sæpe Deum terrenis istis postponamus. G. Istud malum est. T. Pessimum verò; semper homines sumus, nisi Deus nos Spiritu suo immutaverit. Sed dic, quæso, fuitne frequens



quens auditorium? G. Non admodum; pro more solito. T. Unde fit illud? G. Ignoras populum nunc esse occupatum in vindemiis? T. Non ignoro; sed non possunt homines divinis rebus unicam horam impendere? G. De hoc non est meum tibi reddere rationem; hoc tantum dico, *Turpe est doctori, cum culpa redarguit ipsum.* T. Papæ! quantum colaphum impegit mihi! Vale: verbum non amplius addam. G. Esto igitur aliàs prudentior.

COLL. 19.

*Molineus, Cararius.*

**T**U igitur cras (ut audio) discessurus es. C. Cras, si Dominus permiserit. M. Eho! cur tam citò? C. Urget me pater. M. Imò, tu urges patrem. C. I. ane tibi videtur? Quomodo patrem urgere possum? M. Assiduâ missione literarum. C. Tantum semel scripsi initare vacationem scholasticam. M. Quando misisti literas? C. Hebdomade superiori. M. Quo die? C. *Veneris.* M. Quid facies domi? C. Instat vindemia, interim colligendi sunt fructus arborum. M. Poteras expectare dimissionis diem. C. Nescio quando sit futurus. M. Spero fore ad finem proximæ hebdomadis. C. Sed istud non est in nostro sicut arbitrio. M. Nè in præceptoris quidem. C. Cujus igitur? M. Solius Dei qui hominum consilia suo nutu gubernat. C. Atqui *Satanas* videtur interdum gubernare. M. Quantum Deus ipsi permittit. Sed ista sapientioribus relinquamus. C. Tutius est: monet enim proverbium, *Nè sutor ultra crepidam.* M. Sæpe istud ex præceptore audivimus. C. Idem quoque non semel docuit nos illa *Pauli* sententia, *Noli alium sapere, sed time.* M. Illud etiam frequenter habet in ore, *Altiora tu nè quæsieris.* C. Sed audin' tu ad coenam signum dari? M. Adhuc pulsat aures meas tintinnabulum. C. Eamus in aulam, nè desimus precationi. M. Cras ante discessum te salutabo.

COLL. 20.

*Petrinus, Croteranus.*

**Q**UO ludi genere hodie te exercuisti? C. Juglandium. P. Ecquid lucri fecisti? C. Imò, perdidit. P. *Fortuna* igitur

igitur tibi adversa fuit. C. Nescio quæ fortuna ? tantum scio, meâ culpâ accidisse ; sed ita volente Deo. P. Cur Deus id voluit ? C. Ut hinc discam ferre graviora cum acciderunt. P. Quasi verò Deus lusiones puerorum curret. C. Curat profectò ; quinetiam *nihil fit in rerum natura sine Divina providentia*. P. Siccine philosopharis ? Quisnam te ista docuit ? C. Non tute audivisti toties ex concionatore nostro ? P. Fieri potest ut audierim ; sed quid agas ? fluxa est mihi memoria. C. Nimirum, quia illam non exerceas. P. Quomodo exercendâ est ? C. Primùm diligenti attentione, hoc est, diligenter advertendo ea quæ audivimus, aut legimus ; deinde eadem sæpe repetendo ; denique docendo alios ea quæ didicimus. P. Ista nobis sæpius inculcantur à præceptore ; sed (me miserum ! ) quàm supinâ est hæc mea negligentia ? C. Sic sumus omnes, nisi Spiritus ille Dei nos excitet. P. Quid igitur faciam ? C. Expergiscere, mi *Petrine* toto animo totisque viribus ad Deum aspira, illum assiduè & pro affectu precare, vigilans esto, pravos fugito, versare cum bonis, tum moribus facillimis effice ut eos tibi familiares reddas. P. Quid tandem consequar ? C. Rogas ? Si te istis moribus assuefeceris, Dominus Deus suâ clementiâ tui miserebitur, brevi que animum tuum immutatum senties. P. O quàm opportunus hic mihi congressus fuit ! Obsecro te, mi *Creterane*, ut sæpius colloquamur. C. Per me non stabit, quoties utrique licebit per otium. P. Gratias ago maximas. C. Non est quòd agas ; recipiamus nos in auditorium.

## COLL. 21.

*Ægidius. Massuerius.*

CUR hic dispergebas pisa ? M. Quando ? Æ. Post prandium. M. Id faciebam animi causâ. Æ. Sed pisa illâ unde habueras ? M. Acceperam è conchula, ubi reposita erant ut crastino die coquerentur. Æ. Debuisse animi causâ malum facere ? M. Non putabam id esse

esse malum. Æ. Annon est malum conculcare panem pedibus? M. Illud ego nollem facere. Æ. Cur nolles? M. Quia panis est nobis maxime necessarius. Æ. Et pisa ipsa, & cætera quæ eduntur, Deus in usum nostrum creavit. M. Non ignoro illud; quinetiam pisis libenter vescor, si bene cotta & condita sunt. Æ. Præterea, vellēsne abuti rebus tuis? M. Minimè. Æ. Multo minus alienis debes. M. Illud satis intelligo. Æ. Ergò non rectè fecisti. M. Non rectè, fateor: non tamen animo malo. Æ. Cur igitur fecisti? M. Mea ineptia me ad illud incitavit. Æ. Quid inde meruisti? M. Plagas. Æ. Rectè dicis, sed (opinor) non ex animo. M. Imò certè, nè me accuses, oro. Æ. Quandoquidem sponte fateris, non accusabo: sic enim velle se dixit præceptor sæpissimè. M. Quid ille dixit? Æ. Ut de rebus ejusmodi levioribus neminem ad ipsum deferaamus, qui modò culpam libens agnoverit. M. Illud ergò beneficium tibi debebo. mi *Ægidi*. Æ. Nihil velim mihi debeas hoc nomine; sed mecum precare Deum, ut à malo nos liberet. M. Quotidie in schola quater aut quinque palàm precamur. Æ. Quid tum? M. Præterea privatim quoties cibus sumitur, quoties cubitum itur, quoties cubitu surgitur: Nonne satis hæc sunt? Æ. Præter illa, sæpe monet præceptor, ut interdum pro se quisque precandi causâ succedat aliquo in secretum locum; meministi? M. Memini probè: sed (ut scis) difficile videtur esse, ut pueri secretis precibus assuescant. Æ. Et tamen paulatim assuescere optimum fuerit. M. Progressu temporis Deus ipse noster ad eam rem nos incitabit, atque assuesfaciet. Æ. Ità fore sperandum est; si tamen in verbi ejus tum lectione, tum auditione sedulo proficiamus.

## COLL. 22.

*Varro, Castrinovanus.*

**Q**uid est quòd hodie tam citò à patruo redieris, præsertim cum fuerit convivium? C. Quid illíc fecissem diutius? V. Cænàm expectasses, ut ederes de prandii reliquias.

quii. C. Satis ederam in prandio. Præterea, jussit patruus ut domum reducerem præceptorem, quem ego ad convivium deduxeram. V. Quid frater tuus patruelis? cur in ludum vobiscum non rediit? C. A matre retentus est in unum aut alteram diem. V. Quamobrem? C. Ut illi refarciantur vestimenta. V. Illa est mulierum cura. Sed age, quoniam nunc otiosi sumus, narra mihi (quæso) aliquid de convivio. C. Quid de illo scire cupis? V. Primum, qui convivæ fuerint; deinde, quàm lautum & opiparum convivium. C. Convivæ fuerunt hi præcipui, quatuor Syndici, subpræfectus urbis, & alii duo primæ notæ Senatorum numero. V. Nostine? C. De facie quidem: sed eorum non teneo nomina. T. Nulline præterea? C. Duo ex patrui mei familiaribus. V. Quotus accumbebat præceptor? C. Quotus esset non observavi: sed erat in media ferè mensa, e contraria parte mei patrui. T. Tu verò? C. Hui inepte, qui istud roges! Egone homunculus cum tantis viris epularer? Satis hoc mihi honorificum fuit, quòd ministrarem. N. Nullæne erant mulieres? C. Nulla præter uxorem patrui, quæ quidem sedebat in mensa extrema. V. Quid illa tam remota? C. Sic voluit ipsa, ut identidem commodius surgeret propter ordinem ministerii. V. Quid filius? C. Juxta matrem assidebat. V. Habeo de convivis; nunc expecto de convivio. C. Onus mihi valde magnum imponis ac difficile, maxime propter memoriam: sed quando (ut dixisti) plusculum otii nacti sumus hoc pomeridiano tempore, dabo equidem operam ut aliqua ex parte expleam desiderium tuum. V. Pergratum mihi feceris. C. Eâ tamen lege, ut pari referas, si quando dabitur occasio. V. De hac nihil est quòd dubites. Incipe. C. At ego interea sedere volo, quia longa est narratio. V. Eamus sub pergulam, ut in umbra commodius fabulemur. C. Audi nunc jam. V. Quia (ut ais) longa est narratio, dic mihi primum, quorà hora accubitu est? C. Ferè decimâ. V. Quorà resurrectum? C. Paulò ante meridiem. V. Sedebântne omnes commodè? C. Commodissimè. V. Nunc ad rem aggredere. C. Accipe igitur mensæ præludia. V. Appone, cum voles. C. In-

C. Imprimis apposita sunt tenella, crustula, mellita opera pistoris cum aromate. V. Optimum sanè exordium, & ad conciliandos animos aptissimum. C. Omitte, quæso, istas interpellationes, nè mihi perturbetur memoria. V. Posthac non interpellabo, nisi si quid opus erit requirere. C. Sequuntur sunt pernae salitæ, hilla infumata, lucanica, linguæ bubulæ sale quoque & fumo indurata. Atque hæc ad excitandam appetentiam, & sitim aciendam. V. Quasi verò non satis acueretur Solis æstu & fervore. C. Sic docti solent facere convivatores. V. Isthæc audio libenter, præsertim cum exprimas omnia propriis & significantibus verbis. Perge porrò. C. Eodem ordine interposito sunt aceraria è lactucis capitatis, avium intestina frixa, minutalia ex vitulina, cum ovorum vitellis integris. Et hæc hæstenus de præludiis, qui missus primus fuit. V. Nihil interim bibitum est? C. Indigna homine quæstio. Quis enim vino hic parceret? Vix tres, & quidem strenuissimi, fundendis potibus sufficiebamus. Sed de potibus agam posterius; sine me cibos expedire. V. Agè, sino. C. In secundo missu hæc ferè fuerunt, artocrea, pulli gallinacei elixi cum lactucis, bubula, vervecina, vitulina, suilla recens & salsa, jus carniū ovorum vitellis croco & omphacio suavissime conditum, aliquot item jacula ex oleribus. V. Hic plus opinor fabulatum, quàm esum fuisse, quia scilicet assa expectabantur. C. Vix mensam attrigerant, cum illa tollere iussi sumus. Venio igitur ad tertium missum, in quo assa hæc fuerunt exposita, pulli gallinacei, pulli columbini, anserculi fartiles, & fuculi, item cuniculi, armi vervecini; postremò, ferina duorum generum, opere pistorio incrustata. V. Quid præterea? C. Quid? Hem! (penè prætermisi) duæ perdices interjectæ, cum lepusculo, fabæ virides frixæ, & pisa cocta cum filiquis. V. Nihilne piscium! C. In tempore admones. Erat trocta ingens, quæ divisa fuerat in partes quatuor præter caudam; prægrandis item lucius ad eundem modum quadripartitus. Taceo minutos pisces



pisces & mediocres, partim elixos, partim assos aut frigos, item canculos fluviatiles; magno omnia numero: sed hæc magis ad ostentationem quàm ad necessitatem; de iis enim ferè nihil gustatum est. V. Unum mihi videris prætermisisse. C. Quid illud est? V. Nulline erant intinctus? C. Imò singulis propemodum ferculis addita erant scitissimi saporis embammata, quæ coquus ipse miro artificio concinnaverat. Nec verò defuerunt capparides ex oleo & aceto, mala citrea, olivæ conditivæ cum sua muria, acetum rosaceum, succus oxiliadis. V. O quot & quanta gulæ irritamenta. ! C. Adde etiam, corporis & animi impedimenta. V. Sed quis, quæso, fuit ultimus actus fabulæ? C. Tandem cùm jam nec carnes nec pisces ullus ederet, jubet patruus apponi bellaria; in quibus hæc fuerunt præcipua, caseus recens pinguis, itémque vetus multiplex, scriblitæ, placentulæ, oryza in lacte cocta, & bene saccharata, Persica præcocia, ficus, cerasa, uvæ passæ, caryotæ, tragemata serotina, salgama multorum generum, & alia, quæ nunc mihi non occurrunt. Tanta denique fuit omnium esculentorum affluentia, ut mensa ipsa vix sustineret. Quid quæris? quater aut quinquies mutati sunt orbes & quadrulæ. Cibos crassos & duriores magnâ ex parte integros in culinam referebamus; adeò pauci attingebant, propter deliciarum copiam. V. Quid confert tanta cibarium abundantia & diversitas? C. Ad gravandum stomachum, & morbos complures generandos. Sed quid agis? Sic ferè hoc tempore vivitur. V. Qui talibus viris convivia faciunt, certare videntur de copiâ, de apparatu, de splendore & lautitia. C. Et tamen extant inter hujus civitatis leges quædam (ut audiui) sumptuaria. V. *Silent leges inter convivia*, ut obiter è Cicerone detorqueamus aliquid. C. An putas omnes convivas illâ sumptuum immanitate delectari? V. Non puto, nisi fortè sint lurcones, aut asoti, aut *Apiciani* (ut ità dicam) ventricolæ. Cæterum, quid est causa? C. Rogas? Convivorum non modò stultitia, sed etiam infania. V. *Maxima pars hominum morbo iactatur eodem?* ut

ait *Horatius*. C. Sed nos hanc censuram omittamus juxta proverbium, *Nè fateor*, &c. V. Redeamus igitur ad propositum. Quale vinum appositum est? C. Si de colore quæris? album, nigrum, fulvum, sanguineum, deque singulis coloribus vina multiplicia. Si de bonitate; omnia ferè generosissima: sed imprimis commendabant illud vini genus ex *Burgundia*, quod vulgò vocatur *Ambrosium*. V. Unde hoc petebatur? C. E patruï cella vinaria. V. Habétne multum ejusmodi? C. Duos cados vini *Helvetii*, duos item albi limpidissimi. V. Quis fuit prandii exitus? C. Ubi videt patruus convivas omnes benè defessos edendo, bibendo, colloquendo: tunc vinum fundi jubet singulis, omnes ad extremum potum invitat. Hinc ordine colluntur omnia, intermuntur mensis latiora mantilia ex lino-tenuissimo, datur aqua odorifera manibus leviter abluendis; ego & patruelis, de more, Deo gratias agimus; ipse verò patruus clarà voce agit universo cœtui. Tandem primus Syndicus, convivarum nomine, satis accurato sermone, publicas agit gratias convivatori, simul objurgat eum quòd tam munifico & sumptuoso apparatu convivatus fuerit. Imo (inquit patruus) *mibi quæso ignoscite, quòd vos pro dignitate non satis ampliter tractaverim*. His dictis, surgunt è mensa universi, magna pars vale dicto statim discedit; cæteri manent, stantes & colloquentes in aula. V. Quid vos interea, qui ministraveratis ad mensam? C. In culinam ad prandium nos recepimus, corpus illïc otiosè & ex animi sententia curavimus. V. Ubi erat interim præceptor? C. Patruus illum seorsum vocaverat ad alloquium. V. Credo, ut te & filium suum de meliore nota commendaret. C. Istud est verisimile. V. Nescis quæ fuerit causa tanti convivii? C. Quid meâ scire refert? V. Tantò minus igitur meâ. C. Rectè colligis, & sic expectabam. V. Atqui non sum Dialecticus. C. Tibi est naturalis Dialectica. V. Eandem habent rustici. C. Sed age, dic mihi seriò, non ego te tractavi magnificè? V. Tali convivio nunquam interfueram. C. Gaudio stomacho tuo satis esse factum. V. Est Deo gratia, qui

qui dedit nobis otium tam jucundum. C. Surgamus tandem: nam audio pueros à lusu discedere.

## COLL. 23.

*Pastorculus, Pæfatus.*

**T**ityre qui patulæ resides sub tegmine mori:  
Tūne hic solus eris, tam lætus tamque supinus?

P. O Melibæe, Deus nobis hæc otia fecit;

Ille Deus magnus, qui nostrum fecit in usum

Omnia, datus propriam cunctis animalibus escam:

Qui mare, qui terras, & quod tegit omnia cælum

Condidit ille opifex rerum, qui summus habetur.

Pa. Carmina mitte loqui, nunc me liquere Camæne:

Est mihi mens alibi, cupio certare merendâ.

P. Sed tamen hâc metum poteris residere sub umbra:

Namque hic (ut cernis) locus est satis amplus utrique.

Pa. Mittamus ergò versiculos & merendas nostras con-

teramus. P. Per me non stabit; scrutemur peras; agè

explica tuam. Pa. Expecta parumper; dic mihi prius, quid

habes in merendam? P. Panem. Pa. Quasi verò sine

pane merenda esse soleat. P. Nè panem quidem paupe-

res semper habent. Pa. In tempore admones: ponendæ

erunt reliquæ nostræ in eorum corbulam. P. Quid si

reliquiarum nihil fuerit? Pa. Saltem restabit panis, &

hoc satis erit. Sed dic tandem, nunquid habes opsonii?

P. Etiam dubitas? Mater mea nunquam committeret,

ut me in scholam mitteret sine aliquo opsonio. Pa. Dic

ergò quid est? P. Divina. Pa. Non sum vates, nec ve-

lim hanc merendæ horam in nugis terere. P. Saltem

periculum facies quàm valeas conjecturis; quæ de re jam

aliquid in Rhetoricis audivimus. Pa. Aut caleus, aut caro

est residua ex prandio? P. Neutrum. Pa. Dic sodes, ut ac-

cingamus nos operi. P. Nè te diutius torqueam, sunt py-

ra præcocia. Pa. Ain' tu? res nova; nondum hoc anno

videram. P. Vide nunc. Pa. Quàm matura sunt! P. Cur

non addis etiam, Quàm bona! Pa. Sed nondum gustavi.

P. Satis acutè me reprehendis. Accipe, & gusta. Pa. Papæ!

quàm mitia! quàm boni succi! P. Nonne meritò maximas

gratias agere debemus Deo nostro, tam benigno Patri, qui nobis indignis tot bona, tamq; varia largitur? Pa. Qui non facit, is profectò est ingratiſſimus. P. Agedum, vescamur bonis ejus cum gaudio & gratiarum actione. Pa. Jamdudum esurio. P. Sed tu nullum habes opsonium? Pa. Vide fructum crassum vetusti casei. P. Edamus primum pyra, caseo claudemus stomachum. Pa. Sed maturemus, nè fortè hora nos opprimat. P. Neutrum cessare video: certè quod ad me pertinet, non queo comesse citius. Pa. Nè tamen ita devores, porcorum more. Ecquid pudet! P. Quia dicebas esse festinandum. Pa. *Maturemus* dixeram, non autem *festinemus*. P. Ego non adeò scrupulosè inter hæc verba discrimen facio. Pa. Vult tamen præceptor, ut propriè loquamur, quantum per ingenii captum licebit. Nam bene loquendo bene etiam scribere condiscimus. P. Contrà diligenter scribendo consueſcimus etiam rectè loqui. P. Hæc duo inter se conjuncta sunt. Sed, heus! otiosè (inquam) edamus; satìs habemus temporis. P. Nonne tota hæc hora ad merendam libera est? Pa. Hodie quidem libera: sed tamen desinamus, ne panis deficiat nos, & nihil reliqui fiat pauperibus. P. Famus ergò ad puteum, ut aliquantum potemus. Pa. Hem! verborum proprietate semper abuteris; illud *bibere* est, non *potare*. P. Quòd mihi non parcas, habeo sanè gratiam. Ex prava institutione prima hæc vitia contraxi. Pa. Verissimè igitur *Quintilianus* dixit, *Hæc ipsa magis pertinaciter hærent, quæ deteriora sunt: meministi?* P. Memini; sed interim juva me, ut hauriamus aquam è puteo. Pa. Enitere validius; nimium me laborare finis. P. Tantò bibes jucundius. Pa. Bibitum satiseit; recipiamus nos in aulam, nè precationi desimus, & actioni gratiarum. P. Tu præcede, dum urinam illuc eo redditum.

## COLL. 24.

Leonardus, Petio.

**D**Emiror tuam negligentiam. P. Qua in re tandem? L. Quod te non curas diligentius. P. Ego verò me curo fortasse nimis. Satìs edo, bibo, dormio; quæ est Dei

Dei erga me benignitas : præterea pectus capillum, lavo manus, faciem, dentes, oculos, & hæc manè præcipuè : quinetiam, cùm tempus postulat, corpus exerceo, relaxo animum & ludo cum cæteris. Quid vis ampliùs ? L. Mitramus ista ; non ea sunt, quæ in te reprehendo. P. Quid igitur ? L. Circumspice vestimenta tua, à calce ad verticem nihil integrum invenies ? omnia sunt lacerata & obsoleta. Ista profectò nequaquam vestrum genus decent ; si saltem curares vestitum tuum sarcendum, aut quoquo modo instaurandum. P. Loqueris tu quidem quæ libet : quòd si parentes haberes tam procul remotos, fortasse non esses elegantior. Si mihi pecunia suppeteret, non paterer me usque adeò pannosum esse. L. Nec ideo tamen cares negligentia. Cur enim non petis alicunde mutuò ? P. Unde peterem ? L. Si non alicunde, certè à præceptore posses. P. Quid si dare nollit ? L. Nemini denegat ex discipulis domesticis, siquidem videt opus esse. P. Id ego non ignoro ; sed sum verecundior, quàm ut audeam ex eo petere. L. Ah ! rusticus est ille pudor. P. Malo tamen verecundus esse, quam impudens. L. *Verecundia* (ut dixit quidam) *est bonum in adolescente signum* ; sed ubique adhibenda est mediocritas. P. Ego eo sum ingenio, ut semper vereor offendere quempiam. L. Ingenium laudo ; sed *est modus in rebus*. Nam ille offendendi metus habere locum debet in rebus turpibus, aut certè indecoris : hîc verò nihil tale video. Est usitatum in hominum societate, ut alii aliorum operâ indigeant. Quis igitur mihi vitio dabit, si quid ab amicis aut commodatò petam aut mutuò ? P. Nemo reprehender, nisi fortè rebus ejusmodi abuti velis. L. Tu vero (quantum ego te novi) abuti nollis. P. Apage istum abusum ! L. Quid eîgò jam obstat, quò minus petas, præsertim ab homine facillimo, tuisque (ut apparet) amantissimo ? P. Agè, petam ; sed per epistolium, quod ut reddas, tibi dabo. L. Reddam profectò libentissimè, téque illi commendabo diligenter. P. Equidem non parvam tibi gratiam habeo, quòd me tanti feceris, ut ad hanc aduciam hortarere. L. Nunc restat,



ut scribas quod dicis epistolum, reliqua mihi committas.  
P. Bene vertat Deus quod cœpimus. L. Nè dubites; res  
prosperè succedet.

## COLL. 15.

*Clavellus, Quercetanus.*

**N**escis quid mihi his diebus in mentem venerit?  
**Q.** Quid istud, quæso? **C.** Cogito in gymnasium  
me recipere. **Q.** Quid in gymnasium? Habitandi causâ?  
**C.** Non ut inquitinus habitem; sed ut vobiscum vivam in  
mensa præceptoris. **Q.** Utinam istud ex animo ac verè  
diceres! **C.** Ex nostra mutua consuetudine atque amici-  
tia deberes satis intelligere, me nihil apud te nequè si-  
mulare, neque dissimulare solitum. **Q.** Planè istud jam-  
pridem intelligo: sed, audito ex te isto verbo, me rapuit  
affectus in eam exclamacionem; ità prorsus oblitus eram  
mei. **C.** Non aliter dictum tuum accipio: sed ad rem. Pa-  
ter quidem non cogit me, sed ex vultu & verbis ejus satis  
video, id illi placere maximè. **Q.** Nempe hoc illud est,  
novit pater tuus, vir prudentissimus, *liberalia ingenia*  
*cogi nolle, duci facile.* Sed tamen non dubito id fieri di-  
vini instinctu numinis; tu verò quid judicas? **C.** In ea-  
dem sum sententia, præsertim cum ego quoque in eam  
partem spontè propendeam. **Q.** Magnum argumentum,  
istud esse ex Deo consilium. **C.** Id ego crediderim: nam  
qui ad eam rem coguntur à parentibus, ferè quærunt  
subterfugia quibus detrectent imperium. **Q.** Ego  
(ut fatear ingenuè) aliquando id in me sum expertus,  
antè scilicet quàm ingressus essem. Quid enim censes?  
Audiebam ex istis *Satanae* mancipiis tot maledicta,  
tum de præceptore, tum de disciplina; ut mihi videret  
carcerem aut pistrinum ingredi veriùs quàm gymnasium.  
Quòd si tu quoque in aliquam ejusmodi pestem incidis-  
ses, non dubium est, quin ille manibus pedibùsque ob-  
nixè conatus esset abstertere te ab isto tam sancto propo-  
sito. **C.** Nemini adhuc palàm feceram. **Q.** Quod mi-  
hi dicis, non est palàm facere. **C.** Satis scio, sed mihi  
istud excidit ex *Terentio*. Nunc pefgamus ad reliqua.  
**Q.** Quid

Q. Quid restat, nisi ut Deum preceris, & pergas gnaviter in sententia? Audies de quotidiano victu in vestra mensa, de præceptoris & hypodidascali familiaritate in audienda prælectionum repetitione, de facilitate præceptoris in ipso convictu, de illo à coena placida studiorum certamine, de libertate colloquendi per otium, de honestis, de libera inter nos reprehensione. C. De iis (inquam) omnibus satàs multa narrasti mihi aliàs, quæ quidem valde placent omnia; mihi tamen nihil videtur utilius, quàm illa perpetua *Latine* loquendi exercitatio. Quis enim major est studiorum fructus? Quid honestius? Quid jucundum magis; præsertim ubi alius alium sine odio aut invidia liberè reprehendit? Quid, quòd victi in earum rerum certamine pudore tantùm puniuntur, victores etiam præmio donantur? Omnes denique vestræ excoitationes vel auditu ipso me delectant mirificè. Q.

Quanto magis illud diceres, si videres ista; si, dum geruntur, interesses! C. Ego (Deo volente) interero. Q. Utinam propediem! C. Ità spero quidem; unus tamen restat mihi scrupulus, quo me faciliè (si voles) liberabis. Q. Faciam bonà fide, si potero; sed interim vide nè *nodum in scirpo quæras*, ut antea vidimus in *Terentio*. Agè, qui tandem scrupulus iste est? C. Suspecta est mihi vestra disciplina scholastica: non quòd velim ob id incepto desistere; sed ut alacriùs veniam, & jucundiùs, ubi ea de re te audiero. Q. Nisi tu is esses, qui (ut ego novi) me nec vanum nec mendacem existimas, equidem malletm de hoc omnino tacere, quàm ea tibi referre quæ sentio. C. Quid ità tandem? Q. Quia difficile est ea verisimilia facere, quam alioqui verissima cùm de his vulgus hominum pessima quæque dicat & judicet. C. Quorsum istud, quæso? Q. Nam improborum mendaciis adeò male audit nostra disciplina inter istos idiotas, ut mirum sit unum aliquem habitare in schola nostra velle; tamen si (quod est opus Dei) quò pejus audimus, eò plures ad nos conveniunt. C. Nihil opus est tam longà insinuatione; dic mihi planè omnia: nè timeas, non me absterrebis.

*Omnia percepi atque animo mecum ante peregi.* Q. Adverte igitur animum, dicam brevissimè quicquid alicujus esse momenti videbitur. Imprimis illud velim tibi persuadeas, Præceptorem esse nobis multò humaniorem, quàm in schola palàm apparet. Tam enim familiariter vertatur inter nos, quàm prudens pater solet inter liberos. Cur igitur (inquires) est palàm tam severus? Respondeo, Quia sine tali severitate (ut ex ipso audiui, cum aliquando familiari cuidam narraret) tanta turba scholastica, tamque variis moribus prædita, nec coerceri, nec in officio contineri posset. Suo enim quisque more, suo quisque arbitratu vellet vivere. C. Quin etiam miror ego mecum sapissimè tantam esse in tota schola reverentiam, tantum silentium, tantam denique modestiam. Q. Multò magis mirare, si unquam vidisses scholas paganicas. C. Vidi aliquando, atque consideravi diligenter. Plus est silentii in gymnasio nostro sexcentario, quàm quadraginta puerorum, imò triginta in istis scholis trivialibus. Sed perge, quæso; vereor, ut sis Orator *Asianus*: Jam enim incipit oratio tua quasi longius aberrare. Q. Atqui etiam interpellas ipse. C. Nihil extra propositum dixi; sed nunc proseguere. Q. Vis in summa dicam tibi? Disciplina hæc domestica, licet paucis improbis odiosa videatur, bonis tamen & studiosis propter utilitatem valde placet. Nam, si domi res esset dissoluta, quid nobis tutum foret contra lascivorum & petulantium insultus? quæ nobis quies? quæ studiorum tranquillitas? Iraque disciplina ipsa veris studiorum amatoribus est perfugium, & quasi propugnaculum non secus ac nautis portus in tempestate. Denique quisquis est inter nos pacificus, & ad rectè semper agendum paratus, is est à disciplina tutissimus. Nec verò id agit præceptor, ut nos plagis & verberibus trahat ad literarum studia; sed nos potius inducere nititur his maximè rebus, honestà & liberali tractatione, benevolentia, humanitate, facilitate morum, beneficiis, denique virtutis & studiorum amore. Ex quo fit, ut major pars nostrum sic affecta sit, ut illi ex animo parere studeat, cum

caveat

caveat offendere, eum tanquam parentem diligat, observet, revereatur. C. Alioqui discipulorum officio non fungere mini. Q. At sunt quidam verberones, qui nec Deum timeant, nec parentes, nec verbera, qui & literarum studia oderunt *cane pejus & angus*, ut verbis utar *Horatii*: talibus inquam vera interdum adhibetur disciplina; quia videlicet necessitas cogit. C. Sat habeo. Nunc enim video quorsum spectat vestrae disciplinae severitas. Q. Nimirum, ut mores bonos tueatur, malos autem ut corrigat, aut expellat. C. Ego disciplinam istam sanè deosculor, tantum abest ut reformidem. Te autem, mi *Quercetane*, amo equidem de ista loquendi libertate, quā mihi stimulos acriores addidisti. Q. Ego vero immortales gratias ago Patri coelesti, qui tibi mentem bonam dederit & sincerum iudicium. C. Vale igitur, & me (si Dominus permiserit) expecta in proximam hebdomadam. Iterum vale, & inceptum nostrum tuis precibus *Christo* commenda etiam atque etiam. Q. Precor tibi noctem quietam, & somnum placidum.

## COLL. 26.

*Florentius, Basilus.*

Quid est, quod ita te tristem video? B. Me miserum! vix sum compos animi, ita sum timore percussus. F. Quid (inquam) illud est? B. Præceptor nos deprehendit. F. Qua in re? furto? B. Ah! minimè gentium. F. In quo igitur? B. In secreta compotatione. F. Indignum facinus! B. Heu me miserum! me miserum! quid agam? F. Ah! nè te afflites tantopere. Qui aderant tecum? B. *Fluvianus* & *Forensis*. O perditos, qui me huc impulerunt! F. Ubi id factum fuit? B. In cubiculo *Fluviani*, qui utinam hodie è lecto non surrexisset. F. Quomodo tandem deprehensi estis? Non erat observatum cubiculum? B. Imò erat, Sed (ut scis) præceptor claves habet omnium conclavium; præterea, putabamus illum in conventum hodiernum fratrum accessisse; alioqui pessulum obdidissemus ostio. F. Utcunque res habet, Deo volente accidit. B. Sic omni-

no sum persuasus ; sed ferè ità solemus nostra omnia, sive bona, sive mala, vel prudentiæ nostræ attribuere, vel imprudentiæ. F. Quâ occasione computationem istam occiperatis ? B. Illi duo (quod satis nòsti) non sunt convictores. F. Quid tum ? B. Domo allatæ fuerunt eis ad victum nescio quæ cupediæ ; quæ utinam via periissent. F. Sed noluit Deus : perge. B. Et quia illos interdum per otium doceo, heri post cænam, ad istas epulas me invitârunt in hodiurnum jentaculum. F. Tibi infaustum jentaculum ; sed quid ? erâtne vinum ? B. Imò plùs satis erat vini. Habent enim vini doliola in cella præceptoris. F. Quid præceptor ubi vos sic epulantes vidit ? annon excaudit gravissimè ? B. Nihil prorsus commotus est ; sed subridens, *Volo* (inquit) *esse de isto symposio, si placet.* F. O molestum convivam ! Quid vos ? B. Attoniti omnes obmutescimus. Nam, eo dicto, statim se proripuit. F. Omnia signa video hic esse pessima. B. Quis ità non judicet ? F. Oportet præceptorem aliunde rem olfecisse. B. Suspectus est mihi quidam, qui nos indicaverat. F. Quem suspicaris ? B. Dicam tibi post rei exitum. F. Quod invenietis huic malo remedium ? B. Nescio ; valde stûpemus omnes, tametsi duo illi convivorèes mei nihil videntur esse solliciti ; habent enim in promptu causam. F. Quid tandem causari queunt ? B. *Iveramus jentatum*, inquit : *quia manè, cùm ceteri jentarent, eramus cum parentibus, qui heri nobis attulerant alimenta.* F. Istud quidem est aliquid ; sed non tamen sic poenas evadent. B. Cur non ? F. Quia id fieri debuit in triclinio palam, non autem clanculum in cubiculo. Illud etiam causam gravabit, quòd te (cùm sis convictor) quasi ad crapulandum adduxerint, quod quidem ipsi præceptori est maximè odiosum ; tua tamen causa est longè pessima. B. Cedò igitur quid faciam, mi *Florenti*. F. Agè, conferamus consilia, quibus (si fieri potest) absolvaris. B. Nihil est quod à me expectes in eo genere ; (neque enim consilii locum habeo, neque ullam remedii copiam :) sed tu (obsecro) explica vires ingenii tui ad me citò juvandum. Animus pender



pendet mihi : instat poena satis vides, ea (nisi quid impediat) post coenam exigitur. F. Id nequaquam fiet. Cum enim crimen publicum non sit, non erit poena publica. B. Sive publicè, sive privatim id futurum est, non differetur. F. Rectè judicas. B. Id causæ est, quamobrem nunc ad opem tuam confugerim : quòd si me deseris, actum est : dabo poenas gravissimas. F. Ad Deum potius confugiendum fuit sine quo nullum valet consilium, à quo item salus omnis & petenda & speranda est. B. Res est manifesta satis & ego priusquam te audirem, non prætermisi precandi officium : sed tamen vult ille Pater Clementissimus, ut iis utamur auxiliis quæ nobis offert ipse & quasi in manum dat. Quare te oro per nostram arctissimam necessitudinem, concilio tuo nunc mihi succurras. Hic non est cessandi aut tardandi locus ; huc igitur vires tuas intende ; hanc causam suscipe, obsecro. F. Quandoquidem sic intas, ut vim adferre quodammodo videaris, dicam ex animo & verè quod sentio. Nostin' præceptoris ingenium ? B. Novi (opinor) ex parte aliqua. F. Ergò memoriâ tenes, nihil esse illo clementius, iis quidem quos videt submissos esse & culpam ingenuè confiteri ; superbis autem & contumacibus vix aliquid potest ignoscere. B. Egomet ista non semel observavi. F. Scin' igitur quid facias ? B. Dic mihi, quæso. F. Dum tua res adhuc integra est, tibi suadeo, ut hominem solus adeas in musæum, & orationem habeas in hanc sententiam : " En ego, præceptor humanissime, graviter peccavi, fateor ; sed (ut scis) prima est noxa, quam admiserim. Nunquam enim antea quicquam admiseram quod flagris dignum videretur. Quamobrem clementissime præceptor, hanc primam culpam (si tibi placet) pristinæ integritati meæ condonabis ; quòd si unquam posthac recidero, causam non dico, quin plectar severissimè. Hac aut simili oratione illum (ut spero) exorabis. B. O consilium prudens & opportunum ! F. Utere, si tibi videtur. Tale certè est, quale mihi dari vellem in ejusmodi malo. B. Sed unum restat, de quo sum sollicitus. F. Eho ! quid restat ?

B. Non

B. Non potero tam breviter & commodè dicere in conspectu præceptoris quàm tu nunc dixisti. F. Non debes adeò de verbis meis esse sollicitus, modò teneas sententiam. B. Propemodum teneo. F. Bene habet ; scribe nunc crasso modo ut poteris ; deinde conferamus uná : postea edisces ad verbum diligenter. B. Hoc nihil est neque tutius, neque certius : sed quo tempore censes illum adiri posse opportunè ? F. Cùm primùm videbis eum à prandio se recipere in bibliothecam : aut si fortè (ut solet) ambulatum in horto solus iverit, tunc illum statim sequere. B. Quo tum utar exordio ? F. Non opus est alio, quàm quo apud illum uti solemus omnes. B. Quid est illud ? F. *Præceptor, licetne pauca ?* B. Bene vertat Deus omne consilium tuum. Nunc eo scriptum quod dixisti, deinde te revisam. F. Matura : nam instat hora prandii.

## COLL. 27.

*Ambrosius, Gratianus.*

**S**ubtristis mihi videris, *Gratiane* ; quid rei est ? G. Dies noctèsq̃ue de patre absente cogito & ob eam rem interim mœrore conficior. A. Quamdiu absuit ? G. Quatuor abhinc menses. A. Nihil ad vos interea scripsit ? G. Ex quo discessit, nè verbum quidem audivimus. A. Fieri potest, ut scripserit : sed aut literæ interciderunt, aut fuerunt interceptæ. G. Quod dicis verisimile est. Nam antea, ubicunque esset, solebat nobis scribere. A. Nonne hac æstate iverat *Latetiam* ? G. Eo certè consilio tunc sese in viam dederat. A. Confido saluum esse. G. Ego quoque non diffido ; sed non ideo meus allevatur dolor. A. Quid ait mater ? G. Ferè semper lamentatur : indè fit, ut mihi duplicetur ægritudo. A. Sed tamen non usque adeò te macerare debes ; potiùs enim de illo bene sperare oportet, quàm te sic macerare. Quid enim sunt quatuor menses ? Quotula est pars eorum, qui tot annos domo absunt, interim jactati per varios casus, per tot discrimina rerum ! G. Sed quid me consolantur aliorum casus & pericula ? A. Vide tamen, nè sis nimium delicatus, qui patris desiderium

rium tantillo tempore ferre non queas. G. Ferrem equidem æquo animo; modo illi bene esse saltem intelligerem. A. Cui potest esse malè, qui in Deo spem omnem collocavit? *Sive enim vivimus, sive morimur, Dei semper sumus*; ut divus *Paulus* ait. G. Nihil dubito istud esse verissimum; sed ea est carnis hujus infirmitas. A. Quid faceret igitur, qui in *Christo* spem nullam habet? G. Nescio. A. Sed cave tamen nè ista tuâ impatientia Deus ipse offendantur. G. Delictum meum subinde agnosco, & supplex imploro veniam. A. Facis, ut debes. Sed audi quæso, quid mihi nunc in mentem venerit. G. Quid istud est? A. Quid si pater tuus navigaverit in *Britanniam*, negotiandi causâ? Illic enim nunc est libertas maxima. G. Quam libertatem dicis? A. Evangelium, quod illuc auditur liberrimè. G. Ain' tu Evangelium nunc esse in *Britannia*? A. Certa res est. G. Atque Idololatriam profligatam? A. Omnino. G. O auditu jucunda evangelia? A. Imò jucundissima. G. Sed unde scis ista? A. Unde sciam, rogas? Miror ego te adhuc ignorasse quod in ore est omni populo. G. Mirari defines, si scias ubi nos habitemus. A. Ubi, quæso? G. In angulo totius urbis remotissimo. A. Atqui putabam vobis esse domicilium in vico ad *Molardum*. G. Jam antè migraveramus quàm peregrè pater esset profectus. A. Quod igitur ignorabas, nunc habeto certissimum, utque magis credas, hoc audi præterea; Major pars *Britannorum*, qui ob Evangelium in hanc urbem, tanquam ad asylum, sese receperant, in patriam remigrabant jam ante dies quindecim. G. O mi *Ambrosi*, quantum me isto nuntio de *Britannicis* rebus hodie recreasti! qualem adhibuisti meo dolori medicinam? A. Sic solet Deus noster suis adesse in extremis angustiis. G. Mirum ni pater est in *Britannia*. Jam pridem enim sæpius querebatur, quod non esset tutus illuc accessus ad mercaturas obeundas. A. Quinetiam *Britannus* quidam homo, neque levis, neque nugator, narrabat his diebus patri meo, se literas certas illinc accepisse, in quibus hoc erat inter cætera, omnes undique ob *Christi* nomen profu-

gos in ipsa *Britannia* excipi humanissimè, tractarique benignissimè. G. Quid est igitur, quod amplius dubitemus? A. Nulla (ut audis) restat ea de re dubitatio. G. Tantum superest, ut imprimis Dei optimi maximi bonitatem extollamus, quantà possimus laude & gratiarum actione, deinde sedulo atque assidue precemur, ut sua beneficia non modò confirmet, sed etiam indies magis ac magis augeat. A. Igitur mi *Gratiane*, memineris patris salutem ipsi Deo per *Christum* sæpissime commendare, idque votis & precibus ardentissimis. G. Utinam ille suo spiritu sic afficiat animum meum, ut ex imo pectore ejusmodi preces effundere valeam, quas ipse dignetur exaudire! A. Votum sanctissimum, modò (quod quidem credo) ex animo profectum. G. O mirabilem consolatorem Deum nostrum! O quatum valet in adversis rebus veri amici consilium & consolatio! A. Sed quò nunc is? G. Domum rectà propero, ut hæc matri quamprimum nuntiem, atque ejus animum omni expleam gaudio. A. Faxit Deus, ut illa seriò exhilaretur. G. Ità precor.

## COLL. 28.

*Disfingew, Jonæ.*

**S** Alve, *Fona* optatissime. J. Salve & tu, vindemiator jucundissime. D. Quomodo se habet schola? J. Optimè. D. Jàmne redierunt multi? J. Vix quarta pars nunc abest. D. Quid agitur? J. Docetur, legitur, scribitur, repetitur. D. Ista sunt generalia, & quotidiana; sed quid fit in nostra classe? J. Idem quod in cæteris, & quod fiebat ante vacationem. D. Ergò jam seriò habentur prælectiones? J. Jam abhinc octo dies. Nam quid aliud fieret? D. Solebamus per aliquot dies exerceri in iis repetendis, quæ antea didiceramus. J. Tribus diebus totis nihil aliud actum est. D. Quid probatio? jàmne incepta est? J. Huic incepta? propemodum finita est; cras sexta classis interrogabitur. D. Me miserum! exclusus sum à præmio. J. Etiamne præmium sperabas? D. Quidni sperarem? Unicuique sperare licet, præsertim studioso. J. Malim ego nihil

hil sperare. D. Quid ità ? J. Nam si nihil contigerit, nulla erit mihi frustratio, neque molestia, sin consequar aliquid, id ego in lucro deputabo. D. Nunquàmne legisti, *Vivere spe vidi, qui moriturus erat* ? J. Imo vero legi, & memorià teneo ; sed hoc nihil ad propositum. D. Cur non ? J. Quia illic loquitur *Ovidius* de spe illa quæ in rebus adversis retinenda est ; quem sensum expressit *Cato* noster hoc disticho ;

*Rebus in adversis animum submittere noli.*

*Spem retine. Spes una hominem nec morte relinquit.*

D. Tu igitur nihil speras ? J. Spero vitam æternam. D. Dicebas modò sperandum esse in adversis rebus. Quæ tibi sunt adversa ? J. Ea, quæ me oppugnant quotidie. D. Quæ tandem sunt illa ? J. Propria caro, *Satan*, & improbi homines, qui me injuriis afficiunt. D. Ex quo tempore factus es Theologaster ? J. Nec sum Theologus, nec Theologaster ; sed quod dico, id ego didici è sacris concionibus. D. Laudo equidem : sed agè, dic mihi seriò ; éstne acta classis nostræ probatio ? J. Jam tibi seriò dictum puta. D. Dolet mihi non interfuisse. J. Citiùs venisses : quid agebas ? D. Mater me coëgit vindemiæ exitum expectare. J. Credo ; sed tu tuà voluntate coactus es. D. Ut fatear ingenuè, libenter expectavi. Sed quid agas ? *Homines famus*, ut aiunt. J. Imò pueri. D. Sed vix credam quàm sit jucundum rusticari, præsertim ubi tanta est omnium fructuum affluentia. J. Estne vobis magnus vini proventus ? D. Tantus profectò, ut majorem vidisse non meminerim. J. Quid aiunt rustici in hac tanta ubertate ? D. Nihil aliud quàm potationes & crapulas crepant ; quinetiam, vino jam perinde abutuntur, quasi aqua fontana sit. J. Ea est stultæ plebis dementia, ut Dei beneficiis nunquam rectè uti sciat. D. Scilicet istud est quod dicitur, *Nunquam sapiunt stulti, nisi in angustiis*. J. Ergò plectuntur meritò. D. Quod admonitiones etiam irrident. J. Sunt qui nullam omnino ferre possunt, quin bene & comiter etiam monentibus



tibus irascuntur. D. Audi aliquid gravius; fuerunt, qui mihi verbera minarentur, cum eos humanissime admonerem. J. Istud mihi novum non est. Nam & quidam mihi aliquando pugnum intentavit; quod nisi veritus esset mei patris auctoritatem, profecto vapulasssem acerrime. D. Sed omittamus eos, qui cæci sunt, nec tamen se tales esse intelligunt. Jactant se probè callere quid sit Evangelium; cum reverà Evangelio adversentur. J. Si verbi divini Ministros, & Pastores suos non audiunt; quid putas fieri posse, ut nos audiant? D. Sequamur ergò quod præcepit *Christus*, *Nolite sanctum dare canibus*. J. At sunt quidam simplices & benevoli, qui auditione verbi divini mirum in modum delectantur; hi sunt, quos docere est jucundissimum. D. Quàm gaudeo quoties in tales incido! ut ego illos complector libenter! J. Nec immerito. Nam ubi eos docueris, tum demum fueris laboris tui fructu, non sine voluptate maximâ. D. Sed nos quid cogitamus? Non vides, ut nox ferè nos oppræsserit? J. Discedamus igitur, & cras (si Dominus permiserit) pluribus verbis agemus unâ de studiis alacriter repetendis.

## COLL. 29.

*Rufinus, Sylvestre.*

**P**ATER tuus (ut accepi) rediit è *Gallia*. S. Rediit sanè. R. Quando? S. Die *Lunæ*, vespèri. R. Adventus ejus non tibi molestus fuit? S. Quid? molestus? Imò verò jucundissimus: sed cur istud rogas? R. Quia forsitan illo absente liberiùs vivendi est tibi potestas. S. Nescio quam mihi libertatem narres. R. Potandi, ludendi, cursitandi. S. An igitur putas me nihil aliud agere, dum pater abest? R. Sic ferè solent omnes. S. Dissoluti quidem. Nam, quod ad me attinet, absente patre sic vivo, ut eo præsentem. Non poto, sed bibo quantum satis est; ludo, cum tempus postulat; non discuro, sed cum bona matris venia in publicum prodeò, cum aliquid habeo negotii. R. Etiamne matri tantopere subditus es? S. Æquè ac patri. Quid enim

enim putas? Nonne de utroque æquale est præceptum Domini? R. Honora (inquit) patrem tuum & matrem tuam. S. Quid Ethnicus ille auctor Distichorum Moralium?

\* Dilige non ægrâ charos pietate parentes:  
Nec matrem offendas, dum vis bonus esse parenti.

Quid Paulus noster? Filii (inquit) obedite parentibus in Domino. Nonne parentis nomine pater & mater continentur? R. Istud à Latinis observatur auctoribus. S. Quineriam, si quod esset reverentiæ discrimen, videtur optimo iure plus deberi matribus; ut quæ dolores tantos ac labores propter nos pertulerunt. R. Novi ego ista, & quæ dixisti placent mihi omnia. S. Cur ergo mihi repugnabas? R. Ut eâ quasi repugnantia nobis accerferem sermonis materiam. Nam (ut tute nôsti) præceptor sæpe nos exhortatur, ut nostrum otium ejusmodi sermonibus impendamus. S. Bonum sanè otium, quod honesto in negotio consumitur. R. Huc pertinet illud Africani apophthegma, qui dicebat, *Se nunquam minùs otiosum esse, quàm cum otiosus esset*; ut ex Cicerone didicimus. S. Sed jam tempus monet, ut huic sermoni finem imponamus. R. Rectè mones; fortasse enim tuâ causâ corna trahatur domi. S. Plura (si Dominus permiserit) in proximo congressu. R. Precor tibi noctem prosperam. S. Et ego tibi placidam per membra quietem.

## COLL. 30.

Nomenclator, Desiderius.

NON satîs mirari possum, te non esse diligentiorẽ. D. Qua in re videor tibi negligens? N. Quod manẽ serẽ nunquam ades in tempore; atque indẽ fit, ut penẽ quotidie noteris in catalogo. Cur tu es adeo somniculosus? D. Mea sic fert natura. N. Corrige naturam istam; hoc est naturæ vitium. Quid tibi profuit Catonis nostri dictum? D. Quodnam, quæso? N. *Plus vigila semper, nec somno deditus esto*. D. Nè plurà; ego probè memini. N. Nil prodest meminisse; nisi ad usum tuum accommodes. D. Utinam & hoc, & alia præcepta salubria, tam

facile ad bene vivendi usum transferemus, quàm ea facile ediscimus ! N. Ut verum fatear, præcipere quàm præstare multò est facilius, Sed tamen eniti debemus, ut vel moribus vel precibus proficiamus aliquid, & indies evadamus meliores. D. Qui id non facit ejus salus desperanda est. Sed nihil difficilius emendatur, quàm naturale vitium. N. Omnia ferè vitia nobis sunt naturalia ; &, nisi Dei bonitas servaret nos, essemus omnes sceleratissimi. D. Quid igitur faciendum ? N. Fortiter cum vitiis nostris pugnandum est. D. Quo duce ? N. Ipso Deo. D. Quibus armis ? N. Divinis & spiritalibus. D. Ubi tandem inveniuntur ? N. In epistola Sancti Pauli ad Ephesios. D. Quoto capite ? N. Sexto. D. Quid si locum per me non intellexero ? N. Non omnino intelliges, satis scio : sed præceptor erit consulendus. D. Quid, si mecum adfueris ? N. Adesse volo, certum est : verùm captanda erit opportunitas. D. De hac igitur aliàs consilium capiemus. N. Quando istud erit ? D. Proximo die Mercurii, si tibi ità videtur. N. Quotà horà ? D. Post meridiem primà. N. Placet, sententia. D. Nunc igitur discedamus.

## COLL. 31.

*Trapezita, Raimundus.*

**L** Icetne malum malo rependere ? R. Cur istud quæris ? T. Ut iis respondere possim, qui in hac re mihi contradicunt. R. Breviter interrogasti, respondebo brevissimè, *Non licet*. T. Cur non ? R. Quia vetuit Christus, & post eum, Apostoli. T. Quid igitur faciendum est ? R. Malum bono compensandum. T. Annon satis est bonum bono rependere ? R. Non satis Christiano quidem. T. Quamobrem ? R. Nam Christianum oportet Christum præceptorem imitari. T. Quid fecit Christus in eo genere ? R. Salvavit eum, qui ipsi colaphum impeggerat ; precatus est pro iis, qui ipsum in crucem sustulerant ; alia item multa fecit ejusmodi. T. Nihilne igitur facit, qui gratiam pro gratia rependit ? R. Tantum facit, quantum faciunt Ethnici. T. Quid illi faciunt ? R. Amicos diligunt, & referunt grati-

*gratiam illis, à quibus acceperunt.* T. Nihilne amplius ? R. Nihil ? nam quid amplius expectes ab iis, qui verum Deum non noverint ? T. Quid faciunt inimicis ? R. Quibuscunque modis possunt, eos persequuntur. T. Estne *Christiano* peccatum ? R. Si non licet (ut jam tibi probavi) concludere id peccatum esse. T. Atqui (ut vulgo dicitur) *vim vi repellere licet.* Quam sententiam novis quidam Poeta etiam latius interpretatus est his verbis.

*Pellere Vim vi jura sinunt, & vulnere vulnus.*

Quid ad hoc respondes ? R. Istud quidem permittunt *Ethnicorum* leges ; sed lex divina longè aliter loquitur. T. Quid est divina lex ? R. Idem quod Dei verbum. T. Quicquid ergò sit contra Dei verbum, estne peccatum ? R. Proculdubio peccatum est. T. Potèstne ista probare ex divinis literis ? R. Quidni possum ? nihil facilius. T. Adfer mihi, quæso, sententias. R. Non credis id, quod est omnibus in confesso ? T. Imò verò indubitanter credo. R. Quid igitur opus est testimoniis ? T. Ut contradicentibus certò respondere possim. R. Rectè intelligis : sed, quia non possis extempore memoriæ mandare, expecta dum tibi describam in chartula, in qua etiam sit locorum annotatio, ut possis quibus voles etiam digito demonstrare. T. Optimum extempore consilium ? quantò istud mihi commodius fuerit ! sic enim per otium ediscam ut ad manum habeam, quoties erit opus. Sed quando mihi dabis ? R. Cras (si libet) huc ad me revertere. T. Quotâ horâ ? R. A meridie primâ. T. Sat habeo ; interea vale. R. Te servet Dominus Deus.

## COLL. 32.

*Grimondus, Blevetus.*

VIS emere hoc cingulum ? B. Cur emerem ? Unum mihi satis est ; tu verò cur vis vendere ? G. Quia sunt mihi duo. B. Nec tamen licet ut vendas, nisi vis in poenam incurrere. G. Quid vocat me vendere res meas ? B. Nihil adhuc tuum habes. G. Eia ! nihil ? unde probas istud ? B. Quia

nondum es tui juris ; sed sub patris potestate : deniq; vis audire breviter tibi istud non licere ? G. Maximè velim. B. De hoc lex est scholastica, cujus hæc est sententia ; *Pueri injussu parentum, nec vendant aliquid, nec emant, nec permanent, nec alienent quovis alio modo. Qui contra fecerit, verberibus plectitor.* G. Istud ego non ignorabam; sed volebam periculum facere, an constans esses in observandis legibus. B. Tu igitur es simulator. G. In hac simulatione nihil video esse mali : num tu interpretaris malè ? B. Minimè verò : nihil enim nocuisti mihi. G. Quid si nocuissem ? B. Tulissem æquo animo, ut *Christianum* decet. G. Utinam adversa omnia sic feramus propter *Christum*, qui nihil non tulit salutis nostræ causâ ? B. Feremus certè, si exemplum ejus semper nobis proponamus ob oculos. G. Difficile id quidem est. B. Imò impossibile nisi illius Spiritu semper adjuvemur : quod quidem assiduis precibus est impetrandum. G. O quàm suavi sermone tantillum otii consumpsimus !

## COLL. 33.

*Sartor, Odetus.*

**E**Cquid hodie precatus es domi ? O. Cur quæris istud ? S. Quia non interfuisti matutinæ precationi. O. Quis scis ? S. Observavi. O. Atqui tu non es observator. S. Non sum. O. Quamobrem igitur observabas ? S. Quia es mihi charissimus. O. Quid tum ? S. Dolebit mihi si vapulabis. O. Quid ? an ego notatus fui ? S. Etiam dubitas ? O. Cum recitaretur catalogus, nemo me excusavit ? S. Nemini, quod sciam. O. Si me tantoperè amas ( ut dicis ) cur tunc non excusasti me ? S. Quid causæ dixissem ? O. Commentus esses aliquid. S. Ergò mentitus essem. O. Quid indè ? S. Sed ex verbo Dei mentiri veritum est. O. Fateor : sed erat leve mendacium. S. *Nihil leve judicandum est quo Deus offenditur.* O. Negare id non possum ; sed levia ista faciliè remittet nobis propter *Jesum Christum* ; qui est deprecator noster & advocatus. Nam quotusquisque non peccat quotidie sæpissimè ? S. Profectò nullus



nullus; quinetiam vix precamur, aut aliquid boni operamur, in quo non insit aliqua peccati species. O. Quid ergò futurum esset nobis, nisi Deus facile ignosceret? Unde & quotidie precantes dicimus, *Remitte nobis debita nostra*. S. Nihil dubitare debemus, quin remittat, si errata nostra serio & verè agnoscamus, si ex animo petamus veniam, si fidem habeamus nobis ignosci. O. Quid igitur restat? S. Illud restat, ut neque delectemur peccatis; neque in iis persistamus; neque molitiosè, scienter, & de industriâ peccatum committamus. Nimis enim multa sunt, quæ per carnis infirmitatem peccamus, & etiam per ignorantiam. O. Nihil dubito de peccatis illis, quæ ex carnis imbecillitate perpetramus; qualis fuit *Petri* abnegatio. Sed quâ sit, ut peccemus per ignorantiam? S. De hoc *Pauli* exemplum habes, qui scribens ad *Timotheum*, in priore Epistolâ palàm profitetur se, quamvis Ecclesiam Dei persequutus fuerit, tamen veniam esse consequutum, quia ignorans id fecerit. O. Isto exemplo mihi abunde satisfecisti (nam & ego id legisse memini: ) sed scin', tu quoto Epistolæ capite id scriptum sit? S. Equidem non soleo vexare memoriam in retinendis capitum numeris: mihi hoc tempore satîs esse videtur aliquot sententias quasi raptim annotare, quas memoriæ mandare liceat, si quid interdum otii suffurari possum ex quotidiana studiorum præsentium occupatione. O. Ucinam ego quoque id facere possem! S. Quid impedit? O. Vix ego queo satis præceptori facere in exercitationibus scholasticis; tantum abest, ut aliis studiis aliquid temporis impertiri concedatur. S. Satîs profectò quotidie sumus occupati; sed hæc tamen ferenda sunt, quamdiu nobis opus esse, ipsi Deo & parentibus nostris visum fuerit. O. Ego propterea libenter fero, ac tolero omnes ejusmodi labores. S. Quâ spe toleras? O. Quia futurum spero, ut primi sint gradus, quibus ad majora aliquando perveniam. S. Sed de his aliàs pluribus: nunc agamus quod instat. O. Quid istud est? S. Audin' tu ad cœnam signum dari? O. Bonum signum sentias; jam sentiebam esuriem. S. Nimirum,

quia merendam prætermisisti. O. Utinam eâ tam facile semper abstinere possem, quàm hodie carui libenter! S. Ego vero non libenter careo, nisi occupatus necessario negotio.

## COLL. 34.

*Phrygo, Stephanus.*

**S** Alve, ambulator optatissime. S. Et tu salvus sis, cessator occupatissime. P. Satîsne rectè vales, mi *Stephane*? S. Imò rectissime; quæ est Dei optimi maximi benignitas. P. Equidem ex animo gaudeo, tibi que vehementer gratulor reditum istum incolumem. Ubi fuisti hoc toto anno? S. In *Italia*. P. Quam ob causam animum induxeras illuc proficisci? S. Ob famam regionis, de qua tam multa ubique prædicantur. Nec ignoras quàm simus rerum novarum cupidi. P. Sic est naturâ comparatum: sed quid illic invenisti? S. Certè multò plura quàm ex fama audiveram. P. Sed multa (credo) vidisti, quæ minime velles. S. Nempe scelera: sed, quod ad regionem attinet, terra est longè fertilissima, omni optimorum fructuum genere valde abundans, præcipuè vino præstantissimo. P. Scilicet ea potissimùm res tibi arridebat. S. Ut verum fatear, mirè afficiebat palatum; nam quale dicas hoc nostrum vinum esse; villum verè dicas, si cum illo compares. P. Indè ergò tibi se offerebat pulcherrimum Dei laudandi argumentum. S. Pulcherrimum. Sic enim sæpe cogitabam; Quàm bonus es, Domine Deus, qui nos amavisti usque ad delicias! Non enim solum ea creasti nobis ad victum quæ terra sponte suâ producit; sed etiam tot genera rerum delicatissimarum, quæ (si moderatè sumamus & cum gratiarum actione) & corpus suavissime nutriunt, & ipsum animum mirificè exhilarant. O! quibus verbis, quibus operibus satis dignè glorificemus nomen tuum Domine? Denique sic afficiebar animo, ut nihil magis cuperem, quàm divinas laudes semper in ore habere: sed (proh dolor!) aliis atque aliis subinde conceptis cogitationibus ignis ille paulatim exinguebatur. P. Illud apud me non est novum: nam sæpe tale quid mihi solet acci-

accidere. S. Ea est naturæ nostræ inconstantia. P. Horis  
ferè omnibus istud experimur? sed quid tandem egisti in  
tua Italia? S. Invisi, animi gratiâ, aliquot urbes celebri-  
ores: alicubi etiam studii aliquandiu. P. Quas urbes  
invisisti potissimum? S. Multas quidem vidi in transitu:  
sed paucas contemplatus sum otiosus; nimirum, *Genuam*,  
*Florentiam*, *Venetias*, deniq; *Romam* illam, quæ olim *mun-  
di caput* dicebatur: nunc autem est omnium abominatio-  
num fons & origo. P. Vidistiñe magnam illam *Bestiam*?  
S. Vidi obiter, cum per vicos (opinor) spectaculi gratiâ  
portaretur. P. Sed (ut ad rem) in quibus tandem oppi-  
dis commoratus es studiorum gratiâ? S. *Româ* rediens  
transivi *Bononiam*, *Patavium*, *Mediolanum*. In eorum oppi-  
dorum singulis menses circiter tres versatus sum in vario  
literarum genere. Volui enim è singulis paucula quasi  
degustare. P. Quid autem vidisti novi in tot celeberrimis  
oppidis? S. Rogas? ferè mihi omnia nova videbantur:  
sed longum foret tibi omnia narrare præsertim nunc, cum  
mihi est aliò properandum. P. Quò tandem? S. Ad  
patruum, qui me ad coenam invitavit. P. Nolo igitur te  
remorari diutiùs: sed quando licebit nobis magis otiose  
confabulari? S. Cras à prandio, si volueris. P. Ego verò  
id percipio. S. Ad horam igitur primam expecta me in  
cubiculo. P. Fiet, hora est ad merendam opportuna.

COLL. 35.

*Magister, Hypodidasculus.*

Quid? quod hiis diebus inter nos egeramus satisne  
cogitasti? H. Etiam atq; etiam cogitavi. M. Ecquid  
placet tibi conditio, quam obtuli? H. Maximè. M. Quid  
mensa, seu convictus? H. Nihil in ea re desidero. M. Quid  
restat igitur? H. Ut (si tibi non molestum est) præscribas  
mihi quas operas à me tibi præstari velis. M. Id verò est  
æquissimum: accipe igitur præcipua officii tui capita;  
quorum hoc primum est;

Quotidie manè diligenter curare, ut omnes domestici  
mei discipuli maturè cubitu surgant pro ratione temporis.

cùm hyberni, tum æstivi : ubi surrexerint, ea curent, quæ ad cultum & mundiciem corporis pertinent : postremo, ut adsint privatæ nostræ precationi.

Secundam, Ter quotidie in aulam deducere, manè scilicet, & ante horam undecimam ac tertiam pomeridianam. Illuc (nisi egomet adero) expectare, donec aliquis ex doctoribus adfuerit ; interea curare recitandos catalogos, & precationem dicendam : item observare sedulo, num quis ex ipsis doctoribus absit ab auditorio suo ; si quis aberit, mihi statim renunciare aut ejus partes agere,

Tertium, Manere cum pueris domesticis, quoties non docentur in scholis : interea minores ad lectionem & scripturam instruere ; cæterorumque repetitiones audire, quantum tempus & opportunitas patietur : omnes denique in officio retinere, admonere, arguere, objurgare, virgis etiam, ubi opus fuerit, castigare.

Quartum, Feriatis diebus eos ad sacras conciones ordine deducere, ac domum similiter reducere.

Quintum, Quoties ludere permissum erit, subinde observare, nè quid præter officium & bonos mores vel factis vel dictis admittant.

Sextum, Suppeditare illis ex pecunia quam tibi in manus dabo, chartam, pennas, atramentum, & alia quædam duntaxat parvi pretii necessaria ; cæque omnia in expensorum codicem referre. Id autem *Mercurii* & *Sabbati* potissimum diebus fieri solet.

Septimum, Quæ ad eorum libros, vestimenta & curam corporis pertinebunt non negligere ; hoc est, interdum ab illis librorum & vestimentorum rationem exigere, valetudinis & cultûs corporis rationem habere, & alia ejusmodi (in pueris præsertim minoribus) curanda & observanda.

Octavum, Docere pueros tum in classe mea, tum in cæteris, præter tres superiores ; siquando necessitas postulabit.

Nonum, Interdum (si opus fuerit) me, & domi & foris in privatis negotiis adjuvare.

Hactenus audisti quæ mihi abs te præstari velim officia, quæque etiam ab aliis domesticis hypodidascalis exigere soleam. Eorum tamen omnium non adeò severus exactor fuero, quin ipse quoties per otium licebit, aliqua tibi remittam, in quibus ego quasi vicarii partes agam. Intellexisti hæc omnia? H. Ego verò diligenter omnia; sed unum te oro: ad memoriam renovandam, des mihi eorum commentariolum, & simul cogitandi ac deliberandi spatium. M. Quantum temporis postulas? H. Diem unum naturalem. M. Ego verò duos integros dabo. Interea (ut coepisti) nullo tuo sumptu nobis perges convivere & commorari tam libere, quàm si esses domi tuæ. H. Istud non sine humanitate facis; quò fit, ut majori beneficio me devincias. M. Habebis à prandio quod requiris commentarium, cum primum mea tibi manu conscripsero. H. Quid si mihi dictares? M. Malim egomet scribere, nè quid fortè inter dictandum excidat. H. Ut libet.

## COLL. 36.

*Quæstor, Benignus.*

Quàm doleo me non interfuisse manè repetitioni vestrae? B. Cur non venisti in ludum citius, ut ferè soles? Q. Me miserum! non surrexi in tempore. B. Quamobrem? Q. Quia nemo me expergefecit. B. Quis te solet excitare? Q. Hospes noster, aut ejus ancilla; sed absente illo ancilla sæpe obliviscitur aut cerrè negligit. B. Ubi erat hospes? Q. Sub auroram prodierat ad sua negotia, ut postea rescivi. B. Quid hospita? nihilne curat? Q. Quid putas eam curare? quotidie, ex quo surrexit, semper intenta est partim curandis filiolis, partim cæteris domesticis rebus. B. Nullòne habes contubernales scholasticos? Q. Prorsus nullos. B. Ah puer infelix! qui neminem habes, quocum de studiis conferas! Q. Ob eam rem mea est miserrima conditio, quantum ego judico, Non enim possum arbitrio meo studere propter tantum merca-



mercatorum turbam, qui domum illam frequentant, & mihi toto die obstreperunt. B. Non habes tibi cubiculum? Q. Quid mihi prodest habere? Est enim ita conjunctum gradibus & cochleis, ut nè felis quidem aut ascendat, aut descendat, quin feriat aures meas aliquis strepitus. B. Magna profectò molestia. Q. Illa verò multò major, quod supra meum cubiculum est amplissimum conclave, ubi merces asservantur: unde fit ut horis omnibus aliquæ graves sarcinæ vel importentur, vel exportentur. B. O Deum immortalem! quomodo illic potes vivere? Q. Quid ais, vivere? equidem non vivo, sed langueo potius. Neque nunquam mihi videor esse liber, nisi cum sum in schola tecum unà & cum cæteris nostris condiscipulis. B. Quàm doleo vicem tuam! Q. Utinam liceret mihi tecum habitare in his ædibus scholasticis! B. Nihil esset mihi jucundius: sed quid impedit? Q. Patris vetus amicitia cum illo hospite meo. B. Deberes patrem admonere de studiorum tuorum incommodis. Q. Sæpe quidem monui, & coram & per literas. B. Quid ille respondit? Q. Frustrà monetur; quasi *furdo narratur fabula*. B. Quid ita? Q. Quia nunquam in discendo ludo versatus est: ideòque in studiorum ratione nihil intelligit. B. Ego tamen, si mea res ageretur, omnem moverem lapidem, ut voti compos efficerer. Q. Quid si præceptor ipse ad patrem meum scriberet? B. Nunquam istud illi persuaderes. Q. Cur non? B. Quia non vult ambire quempiam, ut discipulorum turbam sibi comparet: abhorret enim ab omni tum ambitione, tum avaritiâ. Q. Quid igitur mihi faciendum suades? B. Unicum habeo consilium. Q. Nè mihi, obsecro, reticeas. B. Ea res per amicos tentanda est. Q. Idem mihi quoque aliquando in mentem venerat, sed nunquam ausus sum experiri. B. Quid dubitas? Q. Vereor ut hoc parum succedat. B. Rei exitus in manu Domini: sed quid tentare nocebit? Q. Tentemus sanè. Nihil enim mali (ut confido) inde potest accidere. At ego nescio quâ ratione hic utendum sit. B. Dic mihi, non expectas ut brevi pater in hanc urbem veniat? Q. Spero venturum propediem. B. Quan-

B. Quando igitur? Q. Ad calendas Quintiles. B. Oprimè est. Scin' igitur quid sit opus factò? Q. Doce, quæso. B. Fac singulatim convenias duos aut tres, ex paternis amicis præcipuis, qui sunt viri graves & honorati: nempe, ut plus valeat eorum auctoritas apud patrem tuum. Q. Bene mones: quid illis dicam? B. Narrabis diligenter omnes incommoditates studiorum tuorum. Q. Nihilne amplius? B. Docebis insuper quonam modo tibi provideri possit, ut tempus redimas; quod apud istum hospitem tam miserè hæctenus perdidisti; & nisi eo remedio tibi maturè consolatur, actum esse de studiis tuis & eorum progressu. Deniq; nè antè destiteris monere, orare, obsecrare, donec persuaseris, ut tibi promittant te acturos esse seriò cum patre tuo negotium. Q. Quid si recusabunt? B. Vix fieri potest, ut recusent omnes! Q. Non est verisimile, præsertim cum sint mei amantissimi, & mihi patris nomine gratificentur adeò libenter. B. Ad hæc res ipsa urgebit eos, nempe tanta studiorum tuorum jactura. Q. Pluribus verbis opus non est. Auxilio Dei fretus aggrediar primo quoque tempore. B. Sed interim memor esto, ut in divinas preces dies noctesque incumbas. Q. Ipto volente Deo, id curabo pro viribus. Satis enim scio nullum consilium mihi esse profuturum, nisi quoad ille juverit. B. Sed jam tempus est ut domum te recipias, nè fortè hospes offendatur. Quid cessas? Q. Cogita nè quid prætermiserim, de quo esses admonendus. B. Si quid alte utri nostrum præterea occurrerit, cras otiosè tractabimus. Q. Vale igitur, mi Benigne, & perge, quæso, me tuis precibus adjuvare, quemadmodum juvisti optimo consilio. B. A Domino Deo profecta sunt omnia, qui ut consilium dedit, sic dabit effectum. Q. Ita fore confido. Iterum vale. B. Vale, Quæstor suavissime.

COLL. 37.

Athanasius, Benjaminus.

Siccine, me insciente, abiit pater tuus, ut mihi non liceret eum convenire? B. Cur à prandio non venisti in diversorium ejus? A. Quia putabam tantum cras illum esse dis-

discessurum. B. Ego quoque idem arbitrabar ; sed noluit occasionem prætermittere, quæ se extempore obtulerit. A. Adhuc ille meminit *Catonis* distichon illud,

*Quamprimum captanda tibi est occasio prima ;  
Nè rursus quæras, quæ jam neglexeris ante.*

B. Illud opusculum sic memoriâ tenet, ut in eo videatur ætatem contrivisse. A. Vide quanta vis sit memoriæ in iis, quæ rudibus annis didicimus. B. Ea est *Quintiliani* super hac re sententia ; cujus verba (ut opinor) meministi. A. Memini ; sed (ut ad rem) quæ fuit patri occasio, ut antè discesserit quàm instituerat ? B. Quidam *Lugdunenses*, quibuscum ad mercatum huc venerat. A. Aderâsne cùm profectus est ? B. Præstolabar illum in diversorio. A. Unde scîeras mutâsse consilium de profectiōe ? B. Eram in prandio, cùm inter ipsos convenerat, ut (expeditis quibusdam reliquis in urbe negotiis) equos sub horam secundam conscenderent. A. Quod superest, satîsne ex animi sententia rem suam fecit ? B. Itâ feliciter, ut me obeam rem ad divinas laudes vehementer hortatus fuerit. A. Tu nunc igitur (opinor) bene nummatus redis. B. Menerides ? A. ut ego id facerem ? B. Pro tuâ libidine. A. Quasi verò animi graciâ soleam irridere cæteros. B. Atqui ita putabam. A. Longè aberras. Nam aliud est *jocari*, aliud *irridere*. Alterum caret vitio, estque inter amicos satîs frequens : alterum est vitiosum, atque odio dignum ; utpote quod ex contemptu ferè proficiscitur. B. Ignosce igitur mihi. A. Non gravis est culpa. Sed dic, rogo ; nihil tibi pecuniæ dedit pater ? B. Nè petivi quidem. A. Tamen sponte dedit. B. Aliquantulum. A. Quantum igitur ? B. Perpusillum. A. Dic, sodes. B. Cur tam avidè inquis ; A. Ut amicorum more tibi gratuler. B. Nihil est gratulatione dignum. A. Fatere tandem quid sit. B. Soli asses quinque. A. Hui ! tantillum ? O stulte, qui non petieris duos aut tres decusses argenteos ! B. Non ausus sum. A. Quid verebare ? B. Ut planè denegaret, atque ægrè ferrer quod pete-

peterem. A. Nunquam id fecisset, modò petendi causam addidisses. B. Credo equidem; sed quid causæ attulissem? A. Rogas? nonne sunt res sexcentæ, quibus indiget usus scholasticus? B. Multæ sunt, fateor. A. Tu verò adeone abundas rebus omnibus, ut tibi desit nihil? B. Imò defunt plurima; sed quibus facillè caream. Præterea, satis novit pater quæ mihi opus sunt, cum studiorum causâ, tum ad victum cultumque corporis. A. Novit quidem, sed alia multa sunt illi & curanda & cogitanda. B. Credo esse illi præcipuam liberorum curam. A. Sed nimis ab eo remotus es. B. Sine me pervenire quò volo. A. Agè, sino. B. Novit etiam pater me nondum esse idoneam ad rectè tractandam pecuniam. A. Cur non? An tu ad eam rem non satis ætatis habes atque prudentiæ? B. Isthinc absum longissimè. Itaque pater dedit præceptori in mandatis, ut omnia mihi suppeditet ad usus vitæ & studiorum necessaria: ad quam rem præbet illi quantum satis est pecuniæ. A. Esto. B. Ergò si quid à patre peterem, me statim ad præceptorem remitteret; fortassis etiam irasceretur, & me graviter objurgaret. A. Facile est objurgationem pati, modò nè sequantur verbera. B. Facile est, credo; sed iis duntaxat, quos neque pudor movet, neque ulla parentum reverentia. Ego autem ipsa verbera ferre malim, quàm patris irati objurgationem. Ex quo fit, ut sedulò caveam, ne quid illi præbeam causæ ad irascendum; id enim sub quinto præcepto Divinæ Legis continetur. A. Facis, ut pium decet adolescentem. B. Ejus rei laus non mihi, sed soli Deo tribuenda est. A. Nempe à quo proficiscitur quicquid nobis inest boni. B. Faxit ille, ut quæ bona inspirat nobis, ea sequamur animo promptissimo. Sed ut ad rem redeam, seriòne reprehendas quòd nullam pecuniam à patre rogâssem? A. An ego te vellem ad fallendum patrem inducere? B. Mihi quidem non fit verisimile; me tamen ipsum fefellisti. A. Quomodo? B. Quia seriò loqui videbaris, adeò aptè vultum verbis ipsis accommodabas. A. Sed quid censes de hac nostrâ confabulatione? B. Argumentum satis apertum dedisti nobis

nobis in hoc otio nostro vespertino. A. Ecquid habuit sermo noster quod reprehendisset observator, si fortè (ut solet) nos observasset ex insidiis? B. Nihil, ut opinor. A. Profectò verum est quod sæpe nobis præceptor inculcat. B. Quid illud est? A. *Latinae linguae copiam & facultatem comparari his potissimum rebus, sæpe scribendo, confabulando, legendis auctoribus, Anglica Latine, aut Latina Anglice convertendo.* B. Ergò his rebus, diligenter nos exerceamus, adjutore Domino Deo, in cujus manu sita sunt studia nostra omnia. A. Idem faxit, ut ejus erga nos beneficia vero cultu dignisque laudibus perpetuò celebremus.

B. *Hoc opus hoc studium parvi properemus & ampli :  
Hæc sit votorum summa, suprema, precor.*

A. Sed audi horologium. B. Nos opportunè admonet : itaque desistamus. A. Alioqui Solis occasus nos hîc opprimeret.

## COLL. 38.

*Honoratus, Vivianus, Pratenfis, Pædagogus.*

Quod caret alternâ requie, durable non est :  
*Hæc reparat vires, fessaque membra levat. Ovid.*

V. *Nec me offenderit lusus in pueris ; est & hoc alacritatis signum. Quintilianus.*

Pr. *Nulla res est quæ perferre possit continuum laborem. Quintilianus.*

Pæ. Video quorsum spectant ista ; nimirum ut vos ambulatum ducam : sed eandem cantilenam semper ferè recantatis, ut solent nostræ aviculæ. H. Quid ergò vis dicamus, præceptor? Pæ. Dicite posthac tuam quisque sententiam ex *Novo Testamento*. V. Euge ! nihil erit nobis facilius : habemus enim in promptu multam earum copiam. Vis ergò præceptor, ut jam nunc incipiamus? Pæ. Sanè velim ; quando (ut ais) tanta est vobis copia. V. Quis incipiet? P. Tûne, *Honorate*, vis honoris tui causâ hujus rei speciem edere? H. Id ego libenter faciam ; sed Dei honoris causâ. Pæ. Laudo istud verbum, Divinus enim



enim honor & gloria omnibus in rebus est præferenda. Eia ! incipe siquid habes. H. Nisi abundaverit iustitia vestra plus quam Scribarum & Phariseorum, non potestis ingredi in regnum celorum, Matth. quinto capite.

V. Deposito mendacio, loquimini veritatem quisque proximo suo, Ad Ephes. capite quarto.

Pr. Filii, obedite parentibus in omnibus, hoc enim placet Domino, Ad Colossenses tertio.

Pæ. Euge ! bonam speciem : videte ut progressus respondeat ; hoc est, ut pergatis in posterum diligenter. H. Qui nobis principium dedit, dabit idem successus prosperos. Pæ. Ità sperandum est. Parate vos, ut prodire maturemus. H. Mox aderimus paratissimi. Pæ. Sumite suum quisque pallium, ut prodeatis honestius. Sed heus, pueri ! Pr. Quid vis præceptor ? Pæ. Videte ut Psalmos etiam adferatis : alicubi in umbra cantabimus. Pr. Ità fiet ambulatio nostra jucundior.

## COLL. 39.

V. M.

Fuistiñe hodie in Gymnasio ? M. Ubi ergo fuisset ? tu verò quid agebas ? V. Eram domi occupatus. M. Id evenit præter morem tuum : soles enim abesse rarius. V. Quàm possum rarissimè : quid autem actum est ? M. Nihil profus. V. Ergone remissionem habemus ? M. Certo. V. Quamobrem ? M. Propter mercatū hodiernum. V. Quis dedit ? M. Ludimagister ; permissu tamen Rectoris. V. Quid concessit ? M. Vacationem ab omni munere scholastico. V. An in totum diem ? M. A mane ad occasum usque Solis ; tamen diligenter & multis quidem verbis admonuit, ut in otio de negotio cogitarem, nè cras in ludum veniremus imparati. V. Quid igitur nos ? hęcine abutemur otio ? M. Id verò ætatem nostram docet minimè. V. Tu ergò quid putas facere ? M. Me recipere in musæolum, nisi fortè tibi magis placet in sesquihoram aliquò prodeamus ambulatum. V. Ergone recuses ? imò nihil est, quod nunc magis velim. Nam & nos interea tractabimus aliquem sermonem literarum,

& simul corpus exercebimus. M. Eamus igitur extra muros. V. Quonam? M. Usq; ad ripam lacûs. V. Valde illud mihi arridet; sed tu (si placet) me expectabis. M. Quantum diu? V. Tantisper, dum crepidas eo mutatum calceis. M. Ubi vis expectari? V. Ad portam Franciscanam. M. Ac vide nè fallas. V. An ego amicum fallerem, cum sciam etiam inimico servandam esse fidem? M. Abi, festina ego, dum te opperior, aliquid interim legam. V. Salve Marcelle. M. Quis iste saluator? V. Ecce! redii. V. Eho? tam citò? mihi videris volâsse. V. Nimirum effectus ipse pedibus alas addidit. M. Eamus nunc, ducentes Deo. V. Solus Deus est qui suos ducit ac reducit. M. Maturemus: satis longè hinc lacus abest. V. Tantò melius prastebimus, perge.

---

F I N I S.

---